

Juan Jesú^snoa Yoikĩ Keneni

Jesucristoõnoa Juan keneni

¹ (Èkĩa Juan. Iskaratĩa Jesucristoõnoa ã mato yoi mã tâpinõ. Cristo ãfe ane ipaoni, Meka. Nãato Niosnoa noko tâpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioski. ² Taefenakõi Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni. ³ Aõxõ Epa Niospa keyokõi onifani. Akka Jesúsmasxõ afaa onifanima. Nãskaxõ Jesús feta Niospa afama mĩshti onifani. ⁴ Aõnoax keyokõi niafo. Niospa yorafo tii shinãmapaiyai keskafakĩ Jesúsxõ ato shinãmatiro ãto õiti xafakĩakõi inõfo. ⁵ Æfe õiti xafakĩakõifiax yora chakafo mēra Jesucristo ipaoni. Yora chakafãfe ãto õiti fakish keskara, shara shinãkanima. Askafiano yora chakafãfe Jesucristo xĩtirofoma yorafo shara shinãmanaino ãto õiti anã fakish keskara inõfoma.

Niospa Juan Maotista nĩchini ato yoinõ

⁶⁻⁷ Epa Niospa Juan nĩchini Jesucristoõnoa yorafo yoinõ iskafakĩ: “Æfe õiti xafakĩakõi. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

⁸ Juankai Cristoma, Niospa nĩchini Jesucristoõnoa ato yoinõ. ⁹ Cristo fistichi yorafo shinãmatiro ãto õiti xafakĩakõi inõfo. “Mã oi,” ixõ Juan ato yoini. ¹⁰ Oaito yorafãfe tâpinifoma.

Niospa Jesúsxõ ato onifafiano tsõa täpinima Jesús. ¹¹ Nã mai onifani ano nokoni. Nãno nokofiaito ãfe yorafãfe, nãfãfe ifikaspanifo. ¹² Askafafiaifono a ifipaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakẽ ãfe Epa Niospa fakefo mã itiro ea chanĩmara faax,” ixõ Jesús ato yoini. ¹³ Niospa fakefo yorafãfe fakefo keskarama. Yorafãfe fakefo yora keskara, yõramãi ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafõ tii Epa Niospa ãto shinã ato fetsafaxotiro ãfe fakefo inõfo.

¹⁴ Nãskakẽ na Meka aneya Apa Nios ika anoax mai ano oni yorakõi ixikĩ. Nonoax nofe iyopaoni. Apa Nios keskara sharakõi mã nõ õipaoni. Nãato yorafo noikõimis. ãfe meka chanĩmakõi. Nã fisti Epa Niospa Fakekõi. Apa Nios imis keskara nãskakõiriai sharakõi imiski.

Juan Maotista Jesucristoõnoa ato yoini

¹⁵ Jesúsnoa Juan ato yoini iskafakĩ: “Ea nikakãfe, õikapo. Nãõnoa ã mato yoimis. Iskafakĩ ã mato yoimis: ‘Mã oi. Ë taeyoi ofiano ea finõkõia ã fakeamano amãi Apa Nios fe iyopaonixakĩ,’ ” ixõ Juan ato yoini.

¹⁶ Jesús keyokõi noko shara famiski. Noko noikõixõ noko sharafa fafafaĩni. Akka keyokõichi nõko õiti inimasharakõiaito nõ meemis. ¹⁷ Epa Niospa noko amapayai keskara Moisés yoini. Nãskakẽ Niospa noko yoini keskara Moisés noko täpimani. Nãskakẽ Niospa noko õimapai noko noikõi afi chanĩmakĩ. Nãskaxõ Jesucristo nokoki nĩchini. Jesucristo noko keyokõi noimis. Nãskaxõ noko

õimatiro Nios chanĩmakõi. Askatari Epa Niospa noko noi. ¹⁸Tsõakai Epa Nios õimisma. Askafiax ãfe Fakekõi nã afe rafemis, arifi Nioskõi. Apa Niosnoa noko yoimis. Aõxõ nõ tãpitiro afe keskaramãki Epa Nios.

*Juan Maotista judeofãfe ãto xanĩfofo yoini
(Mt. 3.11-12; Mr. 1.7-8; Lc. 3.15-17)*

¹⁹ Nã judeofãfe ãto xanĩfofãfe Jerusalén anoxõ nã ato Nios kĩfixomisfo nĩchinifo, Juan ano. Akka nã Levifori ato nĩchinifo Juan yõkatanõfo: “¿Mĩ tsoamẽ?” fatanõfo.

²⁰ Askafaifono Juan ato kemani: “Èkai Cristoma. A nõ manai nõko xanĩfo èkai aama,” ato faito, ²¹ “¿Akka mĩ Cristoma, mĩ tsoamẽ? ¿Mĩmẽ Elías?” faifãfe, “Èkai Elíasma,” ato faito, “¿Akka mĩ Elíasmaax mĩ tsoamẽ? ¿Mĩmẽ nã nõ manamis Niospa meka yoimis, nã nokoki oai?” faifãfe, “Maa, ãma,” ato fani.

²² Ato askafaino anã yõkanifo: “¿Akka mĩ tsoamẽ? Noko yoife a noko nĩchiafo nõ ato yoitanõ. Mĩ tsoamãki noko tãpimafe,” fanifo.

²³ Askafaifono Isaías kirika keneni keskara nãnorikõi Juan ato yoini iskafakĩ: “Niospa mato yoipaiyai keskara ã mato yoinõ. Tsõa istoma anoxõ ã fãsikõi mekaikai: ‘Nõko Ifo nokoki oxii. Ìkisi itipinĩsharakãfe. Mã ipaoni keskara afianã iyamakãfe. Keyokõichi mãto chaka potakãfe, mẽstekõishara isharaxikakĩ,’ ” ixõ Juan ato yoini.

²⁴⁻²⁵ Nikakata judeofãfe nã fariseofo a Juanki nĩchinifo yõkatanõfo iskafakakĩ: “Mĩ Cristoma-mamãki, mĩ Elíasmamamãki nã nõ manamis Niospa meka yoimis mĩmaraka, akka, ¿afeskakĩ mĩ yorafo faka mẽra ikimapakeimẽ maotisafakĩ?” ixõ

yōkakāfe ato fanifo. ²⁶ Juan ato kemani: “Ēfi ato maotisafapaikai. Ē ato askafafiaino nono fetsa nokoki nokoi. Mākai tāpiama. ²⁷ Ē iskaratīa mato Niospa meka yoifafāini. Askafiano aato chipo mato yoixii. Fāsi ea finōkōia. Ē afaa tāpiama ē sharakeroko ē āfe zapato risfi nexaxopanā,” ixō Juan ato yoini.

²⁸ Nā pexe rasi Betania faka Jordán okirish-taxō Juan ato faka mēra ikimapakekī maotisafani. Nānoax ato fe yoināni.

Niospa āfe oveja fake keskara, Jesús

²⁹ Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō. ³⁰ Ē mato aōnoa yoimis. Ē mato yoia iskafakī: ‘Chipo oi ea keskarama finakōia, nāmāi ē fakeamano iyopaonixakī.’ Nakīa mā oa. ³¹ Ērifi Cristo tāpixoma yorafo maotisafapai a nōko kaifo jude-ofāfe tāpinōfora,” ixō Juan ato yoini Cristoōnoa yoikī.

³² Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúski fotopakekafanaito ē ōia. ³³ Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotisafakī. Akka mikiki fetsa nokoano ēfe Yōshi Shara nā feronāfakeki fotopakekafāxii. Afe nītaxii. Nā mī ōikī mī tāpixii nāato ēfe Yōshi Shara matoya rafemaxii āfe shinā shara māto shinā mēra nanenō,’ ixō ea yoia. Epa Niospa ea anori yoiyamakē Jesús nā Niospa

Fake ěri tãpikeranama. ³⁴ Askafixõ mẽ õia. Askaxõ ě mato chanĩmakõi yoi nafi Niospa Fakeki,” ixõ Juan ato yoini.

Jesúsxõ tãpikĩ taefanifo

³⁵ Pena fetsa nãno Juan aõxõ tãpimisfo rafe ini.

³⁶ Afe niafono Jesús ato finõfaini. Ato finõfainaito Juan ato yoini: “Õikapo. Oa Niospa ina oveja fake keskara,” ixõ Juan ato yoini.

³⁷ Juan ato yoiaito nikakata Jesús chĩfafãinifo.

³⁸ Jesús ifiakekafã ato õikĩ ato yõkani: “¿Tsoa mã fenaimẽ?” ato faito, “Maestro, ¿fanĩ mã ikamẽ?” faifãfe, ³⁹ “Ono õifokãfe, ě mato ispanõ,” ixõ ato iyoni. Askata afe fokakĩ õiafo nã ika ano afe nokoni. Mã nokoafono mã xini kai ini. Nãno afe yãtapakenifo.

⁴⁰ Nã rafe Juan ato yoia keskara nikakata Jesús chĩfafainifo. Fetsa ãfe ane Andrés. Nã Andrés Simón Pedro ãfe exto ini. ⁴¹ Jesús ika ano nokokata Andrés ãfe ochi Simón fenaikai kani. Akiki nokoxõ yoini: “A Niospa nokoki nĩchia Mesías mã nõ fichia. Nã Cristora nõ famis. Õiyotãfe,” fani. ⁴² Askata Andrés Simón Jesúski nokokini. Akiki nokoaino Jesús Simón yoini: “Mĩ Simón, Jonáspa fake. Iskaratĩa ě mia ane fetsafaxonõ. Nõ mia Cefas fanõ,” fani. (Cefas nãfa mekapa yoimis Pedro fakĩ.)

Jesús Felipe yafi Natanael kenani afe fonõfo

⁴³ “Ë Galilea ano kaira,” ixõ Jesús shinãni. Kapaikĩ Felipe fichixõ yoini: “Efe kafe, eõxõ tãpisharakõixikĩ,” fani. Askafaino afe kani.

⁴⁴ Felipenõ Andrésnõ Pedronõ pexe rasi ãfe ane Betsaida ano imisfo.

⁴⁵ Askata Felipe Natanael fichixō yoini: “Moisés Niospa yoini keskara kenekī iskafani: ‘Ĕ mātō xanīfokōi Cristo matoki nīchixira,’ ixō Niospa yoini anori Moisés keneni. Nānorikōi Niospa meka yoimisfāfe kenenifo. Nākai mā nō fichia. Jesús José fake Nazarete ano ika. Nāōnoa Moisés feta Niospa meka yoimis fetsafāfe kenenifo,” faito, ⁴⁶ “¿Afaa shara Nazarete anoax oimē?” ixō yōkaito, “Ofe, ōixikī,” Felipe fani.

⁴⁷ Natanael akiki nokoaino Jesús ōixō aōnoa yoini: “Nafi israelifāfe fakeki. Nato afaa chaka yoimisma. Chanīmakōi fisti shināfafāimiskī. Tsoakai pāramisma,” ixō Jesús aōnoa yoini.

⁴⁸ Askafaito nikakī Natanael kemani: “¿Afeskaxō mī ea ōiyamafikatsaxakī mī ea tāpāmē?” faito, “Mia Felipe fichiyoamano ē mia ōikī taefaita ifi higuera nāmānoa ē mia ōita,” Jesús fani. (Akka Jesús Natanael chai ixō tāpini ōiyamafikī.)

⁴⁹ Askafaito, “Maestro, mīfi Niospa fakeki. Askatari mīfi israelifāfe āto xanīfokī,” faito, ⁵⁰ Jesús kemani: “ ‘Mī ifi higuera nāmā tsaōa ē mia ōia,’ ixō ē mia yoia, ¿nā nikaxō mī ea chanīmara faamē? Afara shara fetsa finakōia mī ōixii. ⁵¹ Chanīmakōi ē mia yoi. Ĕfi yōra fakefiāx ē Niospa Fakekōi. Nai fepekemeano mī Niospa ājirifo ōixii. Epa Nios ika anoax āfe ājiri ekeki fotota, māpeinīfofā fotota, māpeinīfofā ikaito mī ōixii,” ixō Jesús fani.

2

Jesús āfe mekapa fakakōifekē fimi ene onifani

¹⁻² Tres nia oxakata Caná pexe rasi anoxō Galilea mai anoxō feronāfāke kēro fiaino yorafo

ano fisti ichanānifo. Jesús ikaino afa ikaino Jesúsxō tāpimisfori nāfo ato kenamanafono fenifo. ³ Fimi ene mā netsoafono, āfa Jesús yoini iskafakī: “Nafokai fimi eneyama,” fani. ⁴ Āfa askafaito Jesús kemani: “Efa, ¿afeskakī mī ea yōkaimē afara fetsa afeskarafanōra ixō? Iskaratīa ē afara fetsa fena ayoima. Tsōa atiroma keskara ē fena akimakai,” fani. ⁵ Askafaito Jesús āfe āfa a yonoxomisfo ato yoikī iskafani: “Nā Jesús mato yoiai keskara fax-okāfe,” ato fani.

⁶ Nāno tokiri kesho seis efapafo chaimashta tsoa ini. Treinta galon a mēra ikitiro ini. Nāskata nā kesho mēra faka fikaxō, judeofāfe āto chokati mēraxō chokaketsanifo. Nāskakī judeofāfe chokasharaifāfe Niospa ato ōi nafo sharara ato fanō, āto xinifo ipaonifo keskara.

⁷ Nāskata Jesús a yonoxomisfo yoini: “Nā keshofo mēra faka fospifakāfe,” ato faito, faka fospikōi fanifo keshofo mēra. ⁸ Askata Jesús ato yoini: “A ichanāifono ato kexemis na faka ayamatakāfe,” ato faino, nāskata a ato kexemis faka foxonifo. ⁹ A ato kexemisto ayaxō mea faka inima fimi enekōi ini. Nāskakē tāpinima Jesús faka fetsafaano. (Akka nā yonoxomisfāfe ōinifo Jesús faka fetsafaito. Nāskakē tāpinifo.) Nāskakē tāpixoma a ato kexemisto a Jesús faka fetsafaa a rama kēro fīai foxoni. ¹⁰ Nāskaxō yoini: “Fistatīa nā fimi ene sharakōi taefakī nō ato ayamamis. Akka nā fimi ene sharakōi mā mitoxō, nā fimi ene sharama chipo nō ato ayamamis. Akka iskaratīa fimi ene sharakapakōi mī ato ayamani,” fani.

¹¹ Jesús nā pexe rasi Caná anoxō tsōa atiroma keskara taefaito ōinifo Jesúsmai finakōixō tsōa

afama mīshti atiroma keskara atiro. Nāskakē ōikaxō aōxō tāpimisfāfe chanīmara fanifo.

¹² Askata Jesús afanō āfe extofonō aōxō tāpimisfonō nā pexe rasi āfe ane Capernaúm ano fonifo. Nāno oxa ranāyonifo.

Jesús a Nios kīfiti pexefā mēraxō a ato ināifo ato potani

(Mt. 21.12-13; Mr. 11.15-18; Lc. 19.45-46)

¹³ Mā judeofāfe āto fista Pascua mā chaima ikaino Jesús nā pexe rasi Jerusalén ano kani.

¹⁴ Nānoxō Nios kīfiti pexefā mēraxō fakkafo, ovejafo, rififo afo ato minikaxō kori finifo. Nānori a kori kāmiafamisfori tsaofono Jesús ato fichini.

¹⁵ Jesús ato fichita risfi koshati fata ato koshapaita a ato inafō ato pōtaketsani. Ovejafo potakī, fakkafo potakī fani. Askata yorafori potani. Mīsa kamaki āto kori māchiafo saakī fetsani. Mīsari kexkafaya kekēfofā potani. ¹⁶ Nā rififāfe āto ifofo ato yoini: “Na mātō inafōya ēfe Epa Niospa pexe mēranoax fotakāfe. ¿Afeskakī ēfe Ēpa pexe mēraxō mā afarafo ato miniketsaimē kori fixikī? Afianā ēfe Ēpa pexe mēranoax afarafo inānōnāyamakāfe kori fixikī. Na ēfe Epa āfe pexe mēranoaxkai mā afarafo minimit-saima,” ixō Jesús ato yoini.

¹⁷ Ato askafaito nikakata aōxō tāpimisfāfe shinānifo iskakakī: “Chanīma, Niospa meka nānorikōi Jesúsnoa kenenifo iskafakakī: ‘Epa Niosi, ē mī pexe kexesharapai a mēraxō mia fisti shinānōfo. Afara fetsa a mēraxō anōfoma. Afara fetsakai mī pexe mēranoa ē ōipaima,’ ixō kenenifo Jesúsnoa yoikī.”

¹⁸ Jesús askafaito judeofãfe ãto xanĩfofãfe yõkanifo: “¿Afeskakĩ Nios kĩfiti pexefã mëraxõ mĩ ato potaimẽ? Niospa mia yoiaito afara tsõa atiroma keskara noko õimafe nõ mia chanĩmara fanõ,” ixõ yõkaifãfe ¹⁹ Jesús ato yoini: “Mã na pexe pãoikano afianã tres nia oxata ã anã pexe faxii,” ixõ Jesús ato yoini.

²⁰ Ato askafaino, “Kee. Nõko xinifãfe cuarenta y seis xinia anifo Nios kĩfiti pexefã fakakĩ. Akka, ¿mĩ koshikõi tres nia pexe faimẽ?” fanifo.

²¹ Askafafiakakĩ tsõa tãpinifoma Jesús Niospa pexeõnoa yoinima. Aafi anofi yoimeni. ²² Askata Jesús nafiãx oxa rafeta tres nia ãta otoano aõxõ tãpimisfãfe shinãnifo: “Chanĩma, a Jesús ato yoita keskara, nã pexefã pãoikaikiri keparanãkĩ, ‘Ëfi tres nia otoxii,’ ixõ yoita. Iskaratĩa mã nõ tãpia aafi anofi yoimeita,” ixõ aõxõ tãpimisfãfe shinãnifo Jesús otoano. Nãskakẽ Niospa meka kenenifo keskara chanĩmara fanifo. Nãskata nã Jesús ato yoini keskara shinãkakĩ: “Chanĩmakõi Jesús noko yoini,” fanifo.

Jesús keyokõi yorafo tãpini

²³ Askata tsõa atiroma keskara afama mĩshti Jesús fani Jerusalén anoxõ fista Pascuatĩa. Nãskara õikaxõ yorafã rasichi, “Na Cristo,” ixõ chanĩmara fanifo. ²⁴ Askafiaifono a yorafãfe ãto shinã mëraxõ shinãifo keskara Jesús ato tãpini. (“Iskaratĩa ea chanĩmara fakani. Askafikaxõ chipo, ãa chanĩra, ea fakani,” ixõ Jesús ato tãpini.) ²⁵ Yorafãfe ãto shinã mëraxõ shinãifo keskara tsõa Jesús tãpimatiroma. Areskõi Jesús onãtiro a ãto shinã mëraxõ shinãifo

Jesús tãpikõia. Chanĩmara fayoaifãfe Jesús ato onãni nãskax koshi shinãmakĩ fetsenifo.

3

Jesús Nicodemo tãpimani

¹ Nã feronãfake fariseo ini, ãfe ane Nicodemo. Nãri judeofãfe ãto xanĩfo ini. ² Nãato fakishi oxõ Jesús yõkani: “Maestro, nõ tãpia mĩ noko tãpimanõ mia Niospa nĩchini. Mã nõ tãpia Nios fe rafex-oma tsõa afara fetsa atiroma nã mĩ akai keskara fakĩ tsõa atiroma,” faito, ³ Jesús kemani: “Ëfi chanĩmakõi mia yoikai. Tsoari oa fake yome rama kãia keskaraxma Nios xanĩfo ano nokotiro,” fani.

⁴ Askafaito afianã Nicodemo Jesús kemani: “¿Afeskax afianã feronãfake yometatiromẽ? ¿Mã anifofiax afeskai afianã ãfa xaki mẽra nanetiromẽ, fake yomeax anã kãixikĩ?” ixõ Nicodemo Jesús yõkani.

⁵ Askafaito afianã Jesús kemani: “Fake yome rama kãi fakaya kãitiro. (Nãskax yõra fake itiro. Nãskariakĩ ãfe Yõshi Sharaõxõ Niospa mato õiti fet-safaano mã ãfe fake itiro.) Akka Niospa Yõshi Sharapa mãto õiti fetsafayamano mã Nios xanĩfo ano nokotiro. ⁶ A yõra fake fia nã keskara itiro. Nãskarifiakĩ Niospa Yõshi Sharapa mato fake fiano mãri a keskara itiro. ⁷ Ë mia yoiano mĩ ea nikax, ‘Mĩri oa fake yome rama kãia keskara mĩ itiro,’ ã mia yoiano, ‘Aira, ¿afeskax nõ afi-anã yometatiromẽ?’ iyamafe. ⁸ Nefeaito tsõa tãpitiroma fakirinoax oimãkai. A nefe kai ariri tsõa tãpiama fakiri nefe kaimãkai. Nãskari fakĩ Niospa yorafo ãfe Yõshi Sharapa ãto shinã fetsafaano tsõa

tāpitiroma,” Jesús faito, ⁹ anā Nicodemo kemani: “¿Afeskax nō askatiromē?” ixō fani.

¹⁰ Askafaito afianā Jesús kemani: “Mī israelifo tāpimamis, ¿afeskakī na ē mia yoiyai mī tāpīamamē? ¹¹ Ē mia chanīmakōi yoi. Nā nō nikafo nā nō ōiafo nāfo nō mato yoi. Nāskafekē nō mato yoiaino mā noko chanīmara faima. ¹² Nono mai anoafō afarafo afeskaraito ē mia yoiaito mī ea chanīmara faima. Askatari nai mēranoafori afeskaraito ē mia yoiaito mī ea chanīmara faima.

¹³ “Tsoakai nai mēra kaax anā fototiroma. Akka ē fisti ē nai mēranoax fotoa yora fakekōi ikiyoi. Ē afianā chipo kaxii. ¹⁴⁻¹⁵ (Nōko kaifo israelifo tsōa istomanoax chaka iyopaonifo. Nāskakē Niospa rono atoki nīchini ato chachinō. Nāskaxō Niospa Moisés yoini iskafakī: ‘Na rofetaxō rono faxō nīchinīfofāfe ifiki ratāfe yorafāfe ōikanax sharanōfo, a ato chachia tii.’) Nāskari fakī ifi cruz ikakī ea mastakaxō ea nīchinīfofāxikani. Nāskakē nā ea chanīmara faafo tii eōnoax Nios fe nīpanakafo,” ixō Jesús ato yoini.

Epa Niospa keyokōi yorafo noi

¹⁶ Anā Jesús ato yoini iskafakī: “Epa Niospa keyokōi yorafo noikī āfe Fake fisti ato nīchixonī nai mēraxō nono mai anoax atoōnoax naiyonō. Nāskakē nā chanīmara faafo tii omiskōīpakenakafoma afe nīpanakafo. ¹⁷ Niospa āfe Fakekōi mai ano nīchini ato omiskōīmatama āto chaka soaxoniyonō aōnoax isharapakevanōfo,” ixō Jesús ato yoini.

¹⁸ Askata anā Jesús ato yoini iskafakī: “Nā Niospa Fake chanīmara faifokai omiskōīpakenakafoma. Akka nā nikakaspaifo

ato Niospa omiskōimaxii. Niospa Fake nikakaspakanax omiskōipakenakafo. ¹⁹ Pena fe fakish osinātiroma. Nāskarifiai afara chaka fe Niospa fake rafetiroma. Nāskakē Niospa āfe fake nāmā nīchini nā yorafo pena keskara shara inōfo āto chaka xatekanax. Akka yorafāfe āto chaka potakaspakani. Niospa āfe fakeki fekaspakani. Nāskax isharakaspakani, chaka fisti shinākani. Niospa fake ōikaspakani āto chaka xateax isharaxikakima. Nāskakē Niospa ato omiskōimani. ²⁰ Afara chaka fichipaiyaito Niospa Fake ōikaspai. Nā chakafaifo fisti fichipaikani. ²¹ Nā shara nipaiyaifo Niospa Fakeki fekani. Ato ōimasharaxikakī Niospa ato imasharanō,” ixō Jesús ato yoini.

Jesús Judea mai ari kani

²² Nāskata Jesús fe aōxō tāpimisfo Judea mai ari fonifo. Nāno ato fe iyoni. Nānoxō āto chaka potapaiyaifāfe ato maotisafapani. ²³⁻²⁴ Juan karaxa mēra ikimayofafomano nāatori yorafo maotisafapani. Nā Enón nā Salim chaimashta nika ini. Nāno faka noa ini. Nāskata nānoxō ato maotisafapani. Nāno yorafo akiki feaifāfe ato maotisafapani.

Juan Maotista Jesúsnoa anā ato yoini

²⁵ Nāskata Juan aōxō tāpimisfo āto kaifo judeo fetsafo fe feratenānifo. Afeskaxō mā chaka soatromē ikanax feratenānifo. ²⁶ Nāskaxō Juan ano fōkaxō Juan yoinifo: “Maestro, nō mia yoipai. Faka Jordán okixori mī Jesús fichita. Fichixō mī noko yoita: ‘Nā Cristo Niospa noko nīchixona nā nō manamis,’ mī noko feita. Nāatori iskaratīa yorafo maotisafapai. Oa yorafo keyokōi akiki

fokani,” fanifo. ²⁷ Askafaifono nikakĩ Juan ato kemani iskafakĩ: “Nios fistichi yonomatiro a yonoxonõ. Akka Niospa axoyamaino afaa afeska fatiroma. ²⁸ Akka êkai Cristoma. Epa Niospa ea yoia ã Cristoõnoa yorafo tãpimanõ ãto chaka xatenõfo, Cristo nokoaito chanĩmara fanõfo. Nãnori ã mato yoiaito mã nikamis. ²⁹ Afianã ã mato yoinõ ea nikapo. Mã mã tãpia feronãfake ãfe yama yoikĩ iskafatiro: ‘Aicho. Na kãro mĩ ea yoixona iskaratĩa ãfe ãfi iki,’ ixõ yoiaino ãfe yamari aõnoax inimatiro. Nãskarifiã ã Cristoyamaflix fet-safãfe nã Cristo Jesús chanĩmara faifono ãri fãsi akiki inimakõi. ³⁰ Akka nã Cristo finakõia. Êkai Cristoma. Ë afaa tãpiama, Cristo finakõia. Akka ã afianã afaa yoitiro ma ea tanatamaroko, Cristo fisti nikakõinõfo,” ixõ Juan ato yoini.

Jesús nai mēranoax fotoni

³¹ Anã Jesús ato yoini iskafakĩ: “A nai mēranoax nãmã fotoato nãato nãmãnoafo ato finõa. Akka nã nãmãnoax fakeafãfe nãmãnoa fisti yoitirofo. Akka nã nai mēranoax fotoato nãatofi keyokõi finõa. ³² Nãato noko yoitiro a õiafo, a nikafori. Nãskakẽ fisti rasichi chanĩmara fakani. ³³ Niospa meka chanĩmara fakĩ nõko õiti mēraxõ nõ tãpisharakõitiro Niospa noko pãramisma, ãfe meka chanĩmakõi.

³⁴ “A Niospa nĩchiato Niospa meka yoi Niospa ãfe Yõshi Shara a mēra naneeano. Nãskaxõ tãpikõia. ³⁵ Epa Niospa ãfe Fake noikĩ nĩchini nai mēra ikafãfe ãto Ifo inõ, nãmãnoafãferi ãto Ifo inõ. ³⁶ Nãskakẽ Niospa Fake chanĩmara faax nõ afe nipaxatiro. Akka tsõa chanĩmara fayamakẽ Niospa ato omiskõimapakenaka. Akka Jesús

nikayamakanax nakanax afe nīpanakafoma fakishifā mēranoax omiskōipakenakafo.”

4

Jesús kēro samāritanōki nokoni

¹⁻³ Fariseofāfe nikanifo Juan yorafo maotisafapaito. Akka yora ichapa Jesús maotisafapaito fariseofāfe nikanifo. Akka Jesúskai ato maotisafapanima, nā aōxō tāpimisfāfe ato maotisafapanifo. Aōnoa yoinifo keskai mā Jesús tāpiax aōxō tāpimisfo fe Judea anoax Galilea ano kani. ⁴ Judea mai anoax Galilea ano kakī Jesús Samāria finōfaini.

⁵ Askata Samāria ano Jesús nokoni. Nāno nā pexe rasi āfe ane Sicar ano nokoni. Nāno chaimashta Jacobo āfe tare ipaoni. Nā tare āfe fake José ināni māmāi anifoxō. ⁶ Nānori Jacobo kini fani nā kini mēranoa faka fixikī. Nā faka fiti ano xini keya Jesús nokoni. Chai inoaxmāi oax xokenāi Jesús nāno tsaoni. ⁷⁻⁸ Jesús teneyoaino, a aōxō tāpimisfāfe a piaifo pexe rasi anoa fiifokani fonifo. Mā foafono nāno kēro samāritanō akiki nokoni faka fiyoi. Faka fiti ketokonō Jesús tsaoano akiki nokoni. Nāskaxō Jesús a kēro yoini: “Ea faka fexōfe ē ayanō,” fani.

⁹ Judeofo fe samāritanōfo ōikaspā faatanāmisfo. Ato fetakai pimisfoma. Nāskakē nā kēromā Jesús yoini: “Mīfi judeoki. Ēfi samāritanōki. ¿Afeskakī mī, ‘Ea faka fexōfe,’ mī ea faimē?” faito, ¹⁰ Jesús kemani: “Niospa mia ināpaiyai mī tāpiama mī eari tāpiama. Akka mī ea yōkaito ē mia faka shara inākerana. Nā faka sharapa yorafo ni-masharatiro,” Jesús fani. ¹¹ Nāskafaito kēromā Jesús kemani: “Mī keshoyata mī risfi yama. Kini

chaikōi, ¿afeskafaxō mī faka kini mēranoa fimmē a noko nimasharatiro a mī ea yoiyai keskara?” kēromā fani.

¹² Nāskata anā kēromā yoini: “Nōko xini Jacobo kini faxō faka fixō ayapaoni. Āfe fakefāferi ayapaonifo. Āto inafari ayamapaonifo. Nōri nā faka ayai. ¿Mī nōko xini Jacobo finōamē?” kēromā fani.

¹³ Askafaito Jesús kemani iskafakī: “Na faka kini mēranoa ayax chipo afianā mā nōamā iki. ¹⁴ Nāskafixō na faka ě ato ayamani anā nōamākiyamanōfo. Chanīmakōi, nā faka ayakanax isharapakexanōfo,” fani.

¹⁵ Askafaito kēromā kemani: “Mī feronāfake shara. Na faka shara ea ināfe ě ayax anā ě nōamākiyamanō ě afianā nonoa faka fiyamanō,” fani. (Jesús fakakiri keparanākī yoiaito nā kēromā tāpinima.)

¹⁶ Nāskaxō Jesús yoini: “Mī fene ifitāfe afianā nētekaini kaxō mī fene ifitāfe afe oxikī,” faito, ¹⁷ “Ēkai feneyama,” faito, “Mī chanīmakōi yoi. Mīkai feneyama,” Jesús fani. ¹⁸ “Mī fene cincoya mia fimisfo mī fenefo. Akka iskaratīa mī fetsa fe ika a mī fenema fe. Ea mīa yoikōi mī feneyama,” ixō Jesús yoiaino, ¹⁹ “Ē iskaratīa ě mia tāpia mī Niospa meka ato yoimis. ²⁰ Nōko xinifāfe na machi anoxō Nios kīfipaonifo. Akka mī kaifo judeofāfe yoimisfo iskakakī: ‘Jerusalén anoxō nō Nios kīfitiro,’ ixō yoimisfo,” faito, ²¹ “Ē mia yoinō, ea chanīmara fafe. Na machi fisti anoxos nō Nios kīfitiroma. Jerusalén fisti anoxori nō Nios kīfitiroma. Akka fanīma mīshtixō nō Nios kīfitiro. ²² Māfi samāritanōfoki. Nios kīfifikī nōko Epa Nios mā tāpisharama. Akka nōfi judeofoki. Nō nōko Epa Nios

tāpikōia. Niospa noko tāpimani afeskaxō yorafāfe āto chaka soatirofomāki Epa Nios fe ipaxakakī. ²³ Chipō afetiāra nō Nios kīfikōikē, āfe Yōshi Shara fistichi noko tāpimatiro nō kīfisharanō. Āfe Yōshi Sharaōxō nō Epa Nios kīfikōiaito nāskara Niospa fichipai. ²⁴ Nios yorama. Niosfi fero mēsho keskara sharaki. Nāskakē āfe Yōshi Sharaōxō nō Nios kīfitiro,” Jesús fani.

²⁵ Askafaito kēromā kemani: “Mē tāpia a Niospa nīchia chipō nokoki nokoxii. Nā āfe ane Cristo. Nāato afama mīshti noko tāpimaxii,” faito, ²⁶ “Ēfi Cristoki, ē mefe me kai,” ixō Jesús yoini.

²⁷ Askata Jesús kēro fe mekaino aōxō tāpimisfo fenifo. Fēkaxō ōiafo Jesús a kēro samāritanō fe mekaito ōikani ratenifo. Nāskax yoinānifo: “¿Afeskai mī na kēro fe mekaimē?” nō Jesús faima,” fanifo. Nāskata shinānifo: “Nā kēro samāritanō mī yoia keskarari nokori yoife, nōkai faima,” inifo.

²⁸⁻²⁹ Askata nā kēromā āfe kesho potafaini āfe pexe rasi ano kakī. Āfe pexe ano kaxō āfe yorafo yoini: “Oa feronāfake ekeki nokoxō ea yoia. Nā ē afama mīshti ē chakafamis mā ea kāimaxōa. Nāraka Cristo, ōifokāfe,” ixō ato iyoni. ³⁰ Nikakata nā pexe rasi anoax Jesúski fenifo.

³¹ Mā kēro kaano aōxō tāpimisfāfe Jesús yoinifo: “Maestro, piyofe,” faifono, ³² “Ē aya a ē pi ai. Nā ē pi ai mā tāpiama,” ato fani. ³³ Ato askafaito nikakani yoinānifo: “Kee. ¿Tsōa a pi ai ināfanamē?” ikanax yoinānifo.

³⁴ Askata Jesús ato yoini: “Ēfe Epa Niospa ea nīchini ē āfe yono shara yonoxonō. Nāato ea amapayai keskara ē apai. Nā ē pi ai keskara,” Jesús ato

fani. (“Mā nō piax nō anā fonāikima, nō shara iki. Nāskarifiāi Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piāi keskara,” ato fani.)

³⁵ Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarifiakī mā shināimē: ‘Nō Jesúsnoa yorafo Niospa meka yoiano chipo chanīmara faxikani,’ ixō mā shināimē? Akka ē mato yoi: ‘Ōikapo, mā iskaratīa itipinīsharakōiafo Nios Ifofaxikakī,’ ato fani. ³⁶ Akka fētsa āfe yama āfe tare kexexotiro, āfe xiki topixoxiki. Chipo kopi-faxinō, tare ifāfe. Nāskarifiakī fētsa taefakī yorafo Niospa meka yoitiro. Ato yoifiaino chanīmara fayokanima. Askatari chipo fetsa oxō ato yoiaito chanīmara fakani. Nā rafe Niospa ato shara ima-pakenaka nā rafetamāi Niospa meka ato yoimisfono. ³⁷ Nāskakē chanīkima mā yoimis iskakī: ‘Fētsa xiki fanano chipo fētsa nā xiki fimi fitiro.’ Nāskarifiakī fētsa Niospa meka yoikī taefaano fētsari chipo rama oxō nāatori ato chanīmara famatiro. ³⁸ Akka mā taefakī ato yoimisma iskaratīa ē mato nīchia mā ato chanīmara famanō. Taefakī fetsafāfe Niospa meka ato tāpimani, mā ato tāpimayoamano. Mā ato tāpimayoxoma koshikōi mā ato chanīmara famatiro māmāi taefakī ato yoiyomisfono,” ixō Jesús ato yoini.

³⁹ Nāskata Jesús aōxō tāpimisfo yoiaino nā kēro samāritanō āfe kaifo yoikai kani pexe rasi ano. Kaxō ato yoini: “Oa feronāfāke mā ea tāpixō ea yoia nā ē afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichi chanīmara fanifo.

⁴⁰ Askata nã kěro nikakanax Jesúski fonifo ãfe meka nikakani. Akiki nokoxõ yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni. ⁴¹ ãfe meka nikakaxõ yora ichapato chanĩmara fanifo. ⁴² Askata chanĩmara fakaxõ yorafãfe nã kěro yoinifo: “Mĩ Jesúsnoa noko yoia fisti nõ chanĩmara faima. Nõakõi mã nõ ãfe meka nikakõia. Nãskakě iskaratĩa nõ chanĩmara fai. Nãato na yorafo ikafo tii ato ifitiro afe ĩpaxanõfo.”

Jesús sharafani xanĩfo yonoxomisto fake

⁴³ Askata mã oxa rafeta Jesús nã samãritanõfo anoax Galilea ano kani. ⁴⁴ Jesús Galilea anoax yosini, nãnoxori yonopaoni. Afe yorafo nãno inifo. Askata Jesús ato yoini iskafakĩ: “A afe pexkonifãfe a ato Nios yoixomis yoikakĩ iskafatirofo: ‘Akai tsoama, afi nofe pexkoniki,’ fatirofo,” ixõ ato Jesús yoini.

⁴⁵ Askata Jesús Galilea ano nokoni. Jerusalén anoax Galilea ano Jesús nokoamano yorafo Galilea anoax Jerusalén ano fonifo fista aki fokani. Nãnoxõ tsõa atiroma keskara Jesús Niosxõ ani. Nã afama mĩshti Jesús anoxõ akaito õinifo. Nãskakě Galilea ano Jesús atoki nokoano akiki inimanifo: “Aicho, mã mĩ oakĩ,” Galilea anoxõ fanifo.

Jesús xanĩfãfe fake sharafani

⁴⁶ Askata nã pexe rasi ãfe ane Caná ano Jesús nokoni nã Galilea mai ano. A ãfe mekapa faka fetsafani ano fimi ene keskara fakĩ nãno Jesús nokoni. Nãnoa xanĩfo fětsa Jesús õiyoi oni. Nã pexe rasi ãfe ane Capernaúm anoax oni. Nãnoax xanĩfãfe fake isinĩ ini.

⁴⁷ Askata xanĩfãfe nikani Jesús Judea anoax oano Caná ano nã Galilea mai ano. Nikata akiki oxõ yoini: “Xanĩfo, ěfe fake isinĩ iki nai kiki. Ěfe fakeshta ea õixononi ope ěfe fake ea sharafaxoxikĩ,” ixõ iyopaini. ⁴⁸ “¡Ooa! Tsõa atiroma keskara ě fayamakẽ mã ea chanĩmara fakeranama,” ixõ Jesús ato yoini. ⁴⁹ Afianã nã xanĩfãfe Jesús yoini: “Xanĩfo, efe kayoikape ěfe fake nayamanõ,” ixõ iyopaini. ⁵⁰ Askafaito Jesús kemani: “Mĩ fake namaki. Katãfe. Iskaratĩa mĩ fake niaki,” Jesús fani.

Jesús askafaito nikafaini kani. ⁵¹ Mã nokoi kaino ãfe inafõ akiki nokokaxõ yoinifo: “Mĩ fake mã shara, anã isinĩ ikima,” fanifo. ⁵² Askafaiãfe ato yõkani: “¿Fanĩ xini rakano ěfe fake sharamẽ?” ixõ ato yõkaito, “Xini keya mĩ fake ãfe yona mat-sita,” fanifo. ⁵³ Yoiaifãfe nikata ãpa shinãni: “Chanĩma, Jesús ea yoita xini keya, ‘Mã mĩ fake sharaki katãfe,’ ea Jesús feita,” ixõ xanĩfãfe shinãni. Nãskata na xanĩfonõ ãfinõ afe yorafoyaxõ Jesús chanĩmara fanifo.

⁵⁴ Nãskata Jesús Judea anoax Galilea ano nokoxõ afianã tsõa atiroma keskara fakĩ ato õimani. Ato õimakĩ rafe fani.

5

Jesús feronãfake isinĩ imis Betesda anoxõ sharafani

¹ Askata Jesús Galilea anoax Jerusalén ano kani ãfe kaifo judeofo feta fista akikai. ² Nãno Jerusalén ano ovejafãfe ãto kãiti ano ĩa ini. Judeofãfe yoimisfo a ĩamã ãfe ane Betesda. Nã ĩa kesemẽ pexe kafãshara mĩshti tsaofafãina ini, cinco pexe.

3-4 Nãno yora isinĩ imisfo ichapa rasi inifo nãno rakafafãinafo. Fẽxofo, chãtofo, sifitianifo nãfo isinĩ imisfo nã pexe kafãshara mĩshti mẽra rakafafãinafo ini. Akka Niospa ãfe ãjiri nã ãa ano nokomis nã ãa fecha fecha axiki. Nã ãa fecha fecha akaino nã isinĩ ikaifo nã nashi taea nashi ax koshi sharamisfo. Nãskakẽ nã isinĩ ikaifãfe Niospa ãfe ãjiri manamisfo ato ãa fecha fecha axoyonõ nã nashi nã taea koshi sharaxikakĩ.

⁵ Jesús nãno nokoxõ feronãfake fichini treinta y ocho xiniya amis finipaikĩ ranãmis. ⁶ Feronãfake finimisma fichixõ Jesús tãpini nã feronãfake treinta y ocho xiniya amis isinĩ itiani. Nãskaxõ yõkani: “¿Mĩ sharapaimẽ?” ixõ yõkani. ⁷ Askafaito kemani: “Niospa ãjirinĩ ãa fecha fecha akaino tsõakai ea ãa ano iyomisma. Akka ã nashipaiñaino ea xĩtimisfo. Ëkai fena nashitiroma. Nono tsõama ea ãa ano iyoikaxiki,” faito, ⁸ Jesús yoini: “Fininãkafã, mĩ rakati fifaini kasharatãfe,” Jesús fani. ⁹ Askafaito nikai fininãkafãta ãfe rakati fifaini kani.

Nã pena safaronõ finimisma Jesús sharafani. ¹⁰ Nãskano nã judeofãfe ãto xanĩfofõfãfe õinifo nã feronãfake finimismato ãfe rakati fifaini kaito yõkanifo: “¿Afeskakĩ mĩ rakati safaronõ mĩ foikaimẽ? ¿Mĩ tãpiamamẽ nõko xinifãfe yoipaonifo safaroaino nõ afaa metiroma? Akka mĩ rakati na safaronõ mĩ fotiroma,” fanifo. ¹¹ Askafaifono ato kemani: “Oa feronãfãke ea sharafaxõ ea yoia iskafakĩ: ‘Mĩ rakati fotãfe,’ ea faa,” ato faito, ¹² “¿Tsõamẽ a feronãfake anori mia yoia?” fanifo. ¹³ Finimismatokai tãpinima tsõa sharafaamãki Jesúsmaĩ a finimisma sharafafãini koshikõĩ a makinoax yorafã rasi mẽra kaano. Nãskakẽ finimismato anã õinima.

14 Askano chipo Jesús a feronãfake sharafaa Nios kîfiti pexefã mēranoa fichixõ yoini: “Anã mĩ isinĩ ikima. Mã mĩ shara. Anã a mĩ chakafapaoni keskafakĩ afianã chakafayamafe. Mĩ chaka xatefe. Mĩ chaka mĩ xateyamakē afaranã mia anã omiskõimatiroki,” ixõ Jesús yoini. 15 Nãskax nã feronãfake Jesús makinoax kani judeofo yoikai, “Oa Jesús ea sharafaa,” ato fani. 16 Nã Jesús safaronõ yora sharafaa nikakanax judeofo ãto xanĩfofo Jesúski õitifishkinifo. Õitifishkikakĩ Jesús mekafakĩ chakafanifo. 17 Askafafono Jesús ato yoini: “Ëfe Epa pena tii yonofafãini. Iskaratĩari yonoi. Ëri Ëfe Epa yonoai keskafakĩ Ëri yonoi,” ixõ ato yoini.

18 Nãskakē fakirira shinãnifo. Nãskara shinãkakĩ Jesús mekafanifo: “Nõko xinifãfe yoini keskara nõ safaronõ afaa metiroma, akka Jesús yonoi yorafo sharafakĩ. Nãskaxõ noko yoia: ‘Nios Ëfe Epakõ,’ noko faa. Nãskax Nios keskarakõi ipai,” fanifo. Nãskax a ranã yoinãnifo: “¿Afeskaxõ nõ Jesús ato retematromẽ?” ikanax yoinãnifo judeofo ãto xanĩfofo.

Jesús Niospa Fakexõ nã Niospa akai keskara fai

19 Nãskara shinãifãfe Jesús ato tãpini. Nãskaxõ Jesús ato yoini iskafakĩ: “Chanĩma Ë mato yoinõ. Ea nikakapo. Ë Niospa Fakekõikĩ Ëa Ë afara afeskarafaima. Ëfe Epa Niospa akai keskara õixõ Ëri aki. Nã fisti Ë aki. 20 Ëfe Epa Niospa ea noikõi. Nãskakĩ nã akai keskara ea tãpimani Ëri anõ. Akka afara fetsa finakõia ea ispaxii. Askaino mã ea iskafakĩ yoixii: ‘Aira õikapo. ¿Afeskakĩ iskara shara akimẽ?’ mã ea faxii. 21 Epa

Niospa yora naano anã otofatiro. Nãskaxõ anã nimasharatiro. Ëri ãfe Fakexõ nãskari fakĩ ã ato nimapaikĩ ã ato nimatiro shara ipaxanõfo. ²² Epa Niospa ato yoima fatora yora shara nĩpanaka, akka fatorari omiskõipakenaka. Ëfi Niospa Fakeki. Ea nĩchini ã yorafo yoinõ fatofomãki a afe nĩpanakafo, akka fatoforimãki a omiskõipakenakafo. ²³ Nãskaxõ yorafãfe Epa Nios yoixikani: ‘Mĩ fãsi shara. Tsõa mia finõtiroma,’ ixõ yoixikani. Nãskarifiakĩ eari yoixikani ãmã ãfe Fakekẽ. Ea nĩchini. Akka iskaratĩa ea tsõa yoisharaima. Ëfe Epa Niosri askari fakani yoisharakima.

²⁴ “Ë mato chanĩmakõi yoinõ. Fatoto ãfe meka nikasharaimãkai, akka nã ea nĩchiniri, fatotori chanĩmara faimãkai nãfi ãfe Epa Nios fe nĩpanakakĩ. Akka iskaratĩa yorafo oa naa keskara ikafo Nios Ifofaamax. Akka Epa Nios chanĩmara fakanax afe ipanakafo. Nafiãx afianã otoxikani.

²⁵ “Ë afara fetsa chanĩmakõi mato yoinõ. Yorafãfe ãto õiti mẽra shinãsharakõiafoma oa naa keskarakõi ikafo. Akka ã Niospa Fakeki. Iskaratĩa ã ato yoiaito ea nikakanax anã naa keskara ikanima, efe isharapakenakafo. ²⁶ Akka tsõa Epa Nios onifanima. Akõi ika. Nãskarifiakĩ Epa Niospa yoia keskara ãfe Fakeri tsõa onifanima. Ëakõi ã ikaki. ²⁷ Ëfi Niospa Fakeki. Nãskakẽ ea yoia iskafakĩ: ‘Mĩ yorafo yoitiro fatofomãki efe nĩpanakafo, akka fatoforimãki omiskõipakenakafo,’ ixõ ea nĩchini. ²⁸⁻²⁹ Nãskara ã mato yoiaino rateyamakãfe. Akka nã namisfãfe ãfe meka nikakani otoxikani. Afara shara famisfo nikasharakõimisfo nãfo Nios ano nĩpanakafo.

Akka nã afara chakafamisfo afo otokanax omiskõipakenakafo,” ixõ Jesús ato yoini.

Niospa Jesús nĩchini a apaiyai keskara famaxikĩ

³⁰ Anã Jesús ato yoini iskafakĩ: “Akka ěakõi ě yorafo omiskõimanimi. Epa Niospa ea yoiaino ě aki. Epa Niospa keyokõi tãpia. Akka ea mĕstekõi yoia keskara ě yorafo yoitiro fatofo omiskõipakenakafomãki. Ě ato kaxpa omiskõimanimi. Eres fistikai ě apaiyai keskara ě shinãima. Ěfe Epa Niospa ea nĩchini a apaiyai keskara ea famaxiki. ³¹ Ěakõi ě yoimesharaito tsõa ea tãpitiro ma ě afe keskaratiromakĩ. ³² Akka nãno yora fĕtsa eõnoa yoisharamis. Nãato ea chanĩmara fakĕ mãri a nikasharakõitiro. ³³ Akka mã yorafo Juan Maotistaki nĩchimis eõnoa nikanõfo. Juan eõnoa meka shara yoimis nã yorafãfe mato tãpimakani. ‘Jesúsfi Cristoki,’ Juan ato famis. Nã nikakaxõ mato tãpimamisfo.

³⁴ “Ěfi tsõa atiroma keskara fakĕ mã mã õimiski. Akka tsõa eõnoa mato yoiamaĩto nãfo õixõ mã tãpitiro ě mato chanĩkima yoimis. Nãskafekĕ Juan eõnoa mato yoimis keskara ě afianã mato shinãmani mãto chaka mã xatenõ omiskõitamaroko Epa Nios fe mã isharpakexanõ. ³⁵ Juan feronãfake fãsi sharakõi. Oa rãpari fafeai keskara shara. Fakishikakĩ nõ rãpari õtano fai chaxasharano nõ fãi katiro. Oa rãpari fafeai keskara shara mato Juan tãpimanano mã mãto chaka xateax mã Nios fe mã isharpakexatiro. Mato yoimis keskara mã shinãmis iskafakĩ: ‘Aicho, Juan noko mĕstekõi Niospa meka yoimis. Nõ nikashara,’ ixõ mã shinãmis. ³⁶ Juan eõnoa yoikõimis; akka ěfe Epa

Niospa Juan finōkōia. Ēfe Epa ea nīchini a apaiyai keskara ē anō. Iskaratīa a ea yonomanai keskara ē aki. Akka a ē akai keskara ōixō mā tāpitiro Epa Niospa ea nīchini a ea yonomanai ē mitonō. ³⁷ Epa Niospa ea matoki nīchini. Nāatori eōnoa yoimis. Mākai Epa Niospa āfe meka nikamisma, askatari mā ōimisma. ³⁸ Niospa ea nīchifinino mā ea chanīmara faima. Nāskax āfe meka shara māto shinā mēra naneama.

³⁹⁻⁴⁰ “Moisés feta a Niospa meka yoimis fet-safāferi kenenifo keskara mā mā ōisharai māmāi shinākī iskafakī: ‘Ē Niospa meka anekī ē tāpitiro afeskax ē Nios fe isharapakenakamāki,’ ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimisfāfe eōnoa kenefinifono mā ekeki opaima ē mato imasharapanā.

⁴¹ “Epa Niospa ea yoikī iskafaino: ‘Ēfe fake shara,’ ea faino ē inimatiro. Akka yorafāfe, ‘Jesús sharaki,’ ea faifono ē askafamapaima. ⁴² Ē mato tāpikōia. Mākai Epa Nios noima. ⁴³ Epa Niospa ea nīchini ē matoki onō. Ē matoki ofiakē mā ea ifipaima. Akka yora fetsa āakōi matoki oaito mā ifitiro. ⁴⁴ Akka mā yora fetsafo, ‘Na yorafo sharafora, noko fanōfora,’ ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

⁴⁵ “Mā ea chanīmara fayamakē ēfe Epa Nios ē yoima. Nāskakē, ‘Nā Jesús noko chakafai,’ ixō shināyamakāfe. Mā shināmis iskakī: ‘Moisés meka nikai nō Epa Nios fe nīpanaka,’ ixō mā shināmis. Anori mā shināfiaino Moisés Epa Nios yoixii mākauroko āfe meka nikakōimiskē. ⁴⁶ Moisés eōnoa

yoikĩ keneni. Nāskaxō Moisés āfe meka chanĩmara faxō eari mā chanĩmara fakerana. ⁴⁷ Nāskafixō a Moisés kirika keneni mā chanĩmara faima. Nāskaxō eari mā chanĩmara faima,” ixō Jesús judeofāfe āto xanĩfofo yoini.

6

Jesús cinco mil feronāfakefo ato pimani

(Mt. 14.13-21; Mr. 6.30-44; Lc. 9.10-17)

¹ Askata Jesús anā ĩamāfā āfe ane Galilea pokefaini. Āfe ane fetsa Tiberias. ² Nāskaxō Jesús isinĩ imisfo āfe mekapa ato sharafaito ōikani yorafā rasichi chĩfafainifo. ³⁻⁴ Nāskaifono judeofāfe āto fista Pascua mā chaima pakeaino Jesús māchi keya ano nokoax aōxō tāpimisfo fe tsaoni. ⁵⁻⁶ Nāno tsaofono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikĩ Jesús shināni oa yorafo fonāikani rakikā. Nāskaxō Jesús āa tāpini afeskaxō ato pimaimākai.) Nāskaxō Jesús Felipe tāpimapaikōini a āfe mekapa afama mīshti atiro. Nāskaxō Jesús Felipe yōkani: “¿Fanĩ afaa ato pimaxikĩ nō fimē?” ixō Jesús Felipe yōkaito, ⁷ nikaxō Felipe kemani: “Kee, Ifo, nō dos cientos nia oxata yonoxō nō kori fitiro akka a tiikai nokotiroma na yorafā rasi nō ato pimapanā,” Felipe fani. ⁸ Nāskafekē Jesúsxō tāpimis fetsa Andrés nā Pedro ěto yoini: ⁹ “Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiroma,” fani.

¹⁰ Askafaito Jesús yoini iskafakĩ: “Ato yoikāfe tsaonōfo,” ato fani. Nāno fasi ichapa ini. Nā

Jesús ato yoiai keskai fasi mēra tsaoi fetsenifo. Cinco mil feronāfakefo tsaoi fetsenifo. Kērofori, fakefori tsaonifo. ¹¹ Nāskax tsaofafono Jesús nā cinco pāa fita Apa Nios yoini: “Aicho, Epa,” ixō Apa Nios yoita pāa yafi nā foe rafe kaxkepaketa aōxō tāpimisfo ato ināni, afāferi ato inānōfo. Fikaxō pikani māyakōinifo. ¹² Nāskax keyokōi yorafo māyakōiafono Jesús ato yoini: “Nā pāa yafi foe texefafo fikāfe fēta mēra nanekāfe afaa pishta fenoyamanō,” ato fani. ¹³ Ato askafaito nikakaxō nā pāa yafi foe texefafo finifo. Doce fēta fospifanifo.

¹⁴ Nāskata Jesús āfe mekapa foe rafe yafi cinco pāa ato pimaito ōikanax yoinānifo: “Chanīmakōi Jesús Niospa meka yoimis. Nā Epa Niospa aōnoa yoipaoni. Nokoki nīchini,” ikanax yoinānifo. ¹⁵ Askafaifono Jesús tāpixō āfe ōiti mēra shināni: “Na yorafāfe ea kerexkai āto xanīfokōi ea ima-paikani,” ixō tāpini. Askata ato makinoax machi fetsa ari kani.

Jesús ĩamāfā femākā kani
(Mt. 14.22-27; Mr. 6.45-52)

¹⁶⁻¹⁷ Askata mā xini kaino aōxō tāpimisfo kanōanāfā mēra nanefainifo ĩamāfā pokefainifo nā pexe rasi Capernaúm ano fokani. Nokoafomano mā fakishaino Jesús atoki nokonima. ¹⁸ Nēfefaino ĩamāfā pooitifikōini. ¹⁹ ĩamāfā chai naisti nēxpakīaxō nēfefānē ato akaino ĩamāfā pooitifikōini. Jesús ĩamāfā kamaki kaitokai tsōa tāpinima mā fichifikaxō. Tāpīamax ratekōinifo. ²⁰ “Ēkīa. Rateyamakāfe,” Jesús ato fani. ²¹ Nāskaxō yoinifo: “Aicho. Kanōa mēra naneyofe,”

fanifo. Mā Jesús naneano nāskax ĩamāfā kesemē nokorisanifo.

Yorafā rasichi Jesús fenanifo

²² Nāskaino mā penano yorafā rasi okiri ĩamāfā kesemē nētenifo. “A aōxō tāpimisfo fe Jesús kaito nō ōiama. Nonokai kanōa fetsama. Akka Jesús nonoki,” ikanax yoinānifo.

²³ Nāskatari Tiberias chaimaxō kanōa rasi fenifo. A Jesús yorafā rasi ato pimaita ano fenifo. ²⁴ Askatari Jesúsxō tāpimisfo ano inifoma. Jesúsri ano inima. Nāskaxō yora rasichi Jesús fenaifokani fonifo kanōanāfānē Capernaúm anoa.

Jesúsfi a nō piyai keskaraki. Akka nō piaxma nō nitiroma. Nāskarifiakī nō Jesús chanīmara faaxma nō afe nīpaxatiroma

²⁵ Mā fichikaxō Jesús yoinifo: “Maestro, ¿afetīa mī nono oamē?” ixō yōkanifo. ²⁶ Askafaifono ato kemani: “Chanīmakōi ē mato yoi. A yōra atiroma keskara ē mato ispafekē mā ea fenaimea. Akka ē mato pimaino keyokōi mā māyakōita. Nāskakē mā ea fenai. ²⁷ Shinākapo. a piyai fisti mā shināfafāini. Akka a mā piyai pisiāx payokometiro. Nāskaxō mā yonofafāini a mā piyai fixiki. Akka a mā piyai fisti shināyamakāfe. A ē mato inātiro shinākāfe. A mā piyai ē mato inātiro a keyonakama. Nā piāx mā efe isharpakenaka. Ĕfi yōra fakekōiki. Ĕfe Epa Nios ekeki inimai ea katōxō matoki ea nīchini ē mato imasharapakexanō,” ato faino, ²⁸ nikakakī yoinifo: “¿Nō afeskatiromē Nios nokoki inimanō?” ixō yoinifo. ²⁹ Askafaifāfe Jesús ato kemani: “Epa Niospa ea matoki nīchini. Akka mā Epa Nios inimamapaikī ea chanīmara fakāfe,” Jesús

ato faino, ³⁰ kemanifo: “A tsõa atiroma keskara fakĩ noko afama mĩshti ispafe nõ mia chanĩmara fanõ. ³¹ Akka Niospa meka kenenifo iskafakĩ: ‘Tsõa atiroma keskara Moisés a piaifo ato inãpaoni. Nã pena tii nai mēranoax pakepaoni a piaifo,’ ixõ kirika kenenifo. A nõko xinifãfe pipaonifo tsõa istoma anoxõ ãfe ane mãnã. Nãskakẽ mĩri a Moisés aka keskara fafe, nõ mia chanĩmara fanõ,” ixõ yoinifo.

³² Askafaifono Jesús ato yoini: “Ë mato pãraima na Moisés kai a nõko xinifãfe pi ai ato inãnima, nai mēraxõ Epa Niospa ato inãni. Akka Epa Niospa mã iskaratĩa mato mēra nĩchia a mã pi ai keskara nai mēraxõ mato õiti mēra nanenõ. ³³ Nã fistichi yorafo nimapakekõixatiro. Epa Niospa nãmã nĩchini yorafo ato imasharapakexanõ,” ato faito, ³⁴ “Ífo, a nõ pi ai noko inãfafãife a mĩ noko yoiai,” fanifo. ³⁵ Jesús ato kemani: “Ëfi nã mã pi ai keskarakĩ. Ë yorafo nimasharapakexatiro. Mã nõ pi ax mãyatiro. Nãskax nõ anã fonãitiroma. Nãskarifiakĩ ea shinãifãfe ã ato shinãmafafãini. Ë ato potanakama. Nãskakẽ ãto õiti mēra inimakõitirofo. Askatari mã nõ faka ayax nõ anã nõamãitiroma. Nãskarifiakĩ ea shinãkanax efe isharapakenakafo. ³⁶ Nãskafekẽ ã mato yoiaito mã ea nikakĩ mã ea chanĩmara faima. ³⁷ Akka nã ea Ifofaafõ Epa Niospa ea atoya imasharapakenaka nãfãfemãi ea Ifofakõiafono. Akka fatorafãferi ea Ifofaifãfe nãfo ã ato kexesharapakenaka. Ë ato potapakenakama. ³⁸⁻³⁹ Epa Niospa ea nĩchikĩ ea yoini iskafakĩ: ‘Nã mefe ipaikani mefe ipanakafo tsoa pishta fenonakama. Nãfo mã nafiamisfono mĩ anã fotoxõ mĩ ato õtofaxii nofe nipaxanõfo. Nãskara ã fichipai,’ ixõ

ea nĩchini. Nāskakē nā ěa ě apaiyai keskara faxiki ě mai ano onima. Akka nā ea nĩchiato ea amapaiyai keskara faxikĩ ě mai ano ftoni.

⁴⁰ “Ĕfi Niospa Fakeki. Ea chanĩmara fakanax nāfo ěfe Epa Nios ari efe isharapakenakafo. Nafiafāfe ě afianā mai ano fotoxō ě ato ōtofaxii isharapakex-anōfo. Nāskara ěfe Epa Niospa fichipai,” ixō Jesús ato yoini.

⁴¹ “Ĕfi nai mēranoax onikĩ a mā piyai keskaraxō yorafo imasharaxikĩ,” Jesús ato feito nikafikaxō chanĩmara fatama judeofāfe Jesús mekafakakĩ yōachepenifo: ⁴² “Kee, nikakapo. Na Jesús, āfe apa José yafi āfe afa María nō ōimis. Nakai afaama. Akka, ¿afeskakĩ noko yoimē: ‘Ĕfi nai mēranoax Nios ika ariax onikĩ?’ Nāskakē na meka nō chanĩmara faima. Iskara meka nō nika-paima,” ikanax yoinānifo. ⁴³ A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe. ⁴⁴ Ĕ chanĩma. Epa Niospa ea nĩchini. Nāskafekē Epa Niospa āto ōiti mēra ato shināmayamaino ea tsōa chanĩmara fatiroma. Akka nā ea chanĩmara faax nakē ě anā nai mēranoax fotoxō ě ato otofaxii efe ĩpaxanōfo. ⁴⁵ Niosnoa yoimifāfe kirika kenenifo iskafakakĩ: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ěfe Epa Nios nikaifono ato tāpimaxii. Nāskaxō afāferi ea chanĩmara faxikani.

⁴⁶ “Tsōakai Epa Nios ōimisma. Eres fisti ě Epa Nios ōimis, ěmāi a makinoax onixakĩ. ⁴⁷ Ĕfi mato chanĩmakōi yoikai. A ea chanĩmara fai ěfe Epa Nios fe ipanaka.

⁴⁸ “Ĕfi nā mā piyai keskaraki. Nā ea chanĩmara faafo tii Epa Nios fe isharapakenakafo. ⁴⁹ Nōko

xinifo Moisés fe tsõa istoma ano ipaonifo. Nã pipaonifo, ãfe ane mǎnã. Akka mǎnã pipaofnixakĩ mǎ nai mitokomenifo. ⁵⁰⁻⁵¹ Ë nai mēranoax ěfe Epa Nios ika anoax oni. Ěfi na mǎ piyai keskaraki. Nã ea chanĩmara fai nãfi efe nĩpanakakĩ. Nã nõko xinifãfe pipaonifo nai mēranoax pakeaito aatokai ato nimasharamisma. Iskaratĩa afianã Epa Niospa nai mēraxõ mato inãi a mǎ piyai. Nã piyax yorafo isharapakenakafo anã nanakafoma. Ěfi nã mǎ piyai keskaraki. Nãskakẽ ě keyokõi yorafo ě ato nãxoxii nisharapakexanõfo,” ixõ Jesús ato yoini.

⁵² Nikakani judeofo fochishpanã faatanãnifo. “¿Afeskaxõ na feronãfãke ãfe nami noko inãtiromẽ nõ pinõ?” ikanax yoinãnifo. ⁵³ Jesús ãfe namikiri keparanãkĩ ato yoini: “Ë mato pãraima. Ěfi yõra fakekõiki. Mǎ ěfe nami piyamata ěfe imi ayayamata ikax mǎ nipaxatiroma. ⁵⁴ Fatorafãfe ěfe nami pikani ěfe imiri ayakani isharapakexikakĩ. Nãskakẽ ě afianã nai mēranoax fotoaitĩa a namisfo ě ato otofaxii Epa Nios ari nisharapakexanõfo. ⁵⁵ Ěfe nami na mǎ piyai keskara. Ěfe imiri a mǎ ayatiro keskara. ⁵⁶ Fatorafãfe ěfe nami pikani, ěfe imiri ayakani, nãfo efe rafesharapakenakafo. ⁵⁷ Akka ěfe Epa nĩpanakato nãato ea nĩchini. Nãskai ěri aõnoax nipanaka. Nãskakẽ efe rafesharakanax eõnoax nĩpanakafo.

⁵⁸ “Afianã ě mato yoi. Nõko xinifãfe a pipaonifo ãfe ane mǎnã. Nã pifiakanax mǎ nai keyonifo. Akka ěfi Epa Nios ariax ě matoki oni. Ěfi a mǎ piyai keskarakĩ. Ea pikanax eõnoax nisharapakenakafo,” ixõ Jesús ato yoini. ⁵⁹ Judeofãfe ãto ichanãti pexe mēraxõ Capernaúm anoxõ ãfe meka

Jesús ato yoini.

Jesúsnoax yorafo nĩpaxatirofo

⁶⁰ Jesúsxõ tãpimisfo a ranã yoinãnifo: “A Jesús noko yoia keskara fekaxkõi. Tsõakai tãpitiroma. Nõkai na keskara meka nikamisma,” ikanax yoinãnifo. ⁶¹ Jesús ato onãni a ranã yoinãifãfe. Akka atirifãfe Jesús nikapainifoma. Nãskaxõ ato yoini: “¿A ã mato rama yoia keskara mã nikapaimamẽ? ¿Anã mã ea chanĩmara faimamẽ? ⁶² Ë yõra fakekõi fiãx a ã ipaoni ano nai mẽra ã anã kaito mã ea õiki, ¿mã ea chanĩmara faimamẽ? ⁶³ Akka Niospa Yõshi Sharapa nã fistichi yorafo nimasharapaketiro. Yorafokai yõra nimapaketiro. Akka ãfe Epa Niospa Yõshi Sharaõxõ ã mato yoimis. Nãskakẽ ãfe meka chanĩmara faax mã nisharapakexatiro. ⁶⁴ Nãskafekẽ fetsafãfekai ea chanĩmara fakanima,” ixõ Jesús ato yoini. Jesús taefakĩ ato ifini. “Fatotokai ea chanĩmara fatama ea ato achimaximẽ,” ixõ Jesús tãpiyoni. ⁶⁵ Askaxõ anã ato yoini: “Ë mato yoia iskafakĩ, Epa Niospa ãto õiti mẽra ato shinãmayamaino ea chanĩmara fatirofoma,” ixõ ã mato yoia.

⁶⁶ Nãskaxõ Jesús ato yoiai keskara nikakaxõ a chĩfamisãfe Jesús potakaxõ anã tananifoma. ⁶⁷ Akka Jesús a aõxõ tãpimis doce ato ifini. Afetĩama ato ifiyoni aõxõ tãpimisfo inõfo. Nãskaxõ ato yoini iskafakĩ: “¿Mãri emakinoax kapaimẽ?” ato faino, ⁶⁸ Pedro kemani: “Ifo, nõ fato fetsakai Ifofatiroma. Mĩ fistichi mĩ noko yoitiro afeskax nõ isharapakexatiromãkĩ. ⁶⁹ Mĩfi mĩ Nios ariax nokoki oniki. Mĩfi sharakõi Cristokĩ. Nios nã

nipanakato nãato ãfe Fakekõi mĩ. Nã nõ chanĩmara fai,” askafaito, ⁷⁰ “Ë mato doce feronãfake ifini mã eõxõ tãpimis inõ. Akka ã mato ifininino a mato fe rafea fetsa mã a mẽra Satanás chaka nanea,” ixõ Jesús ato yoini. ⁷¹ Nã Simón Iscariote ãfe fake Judas ini. Nã Judasnoa Jesús ato yoini. Jesús nã Judasri ifininino nãato Jesús ato achimani fetsafãfe retenõfo.

7

Jesús ãfe extofãfe chanĩmara fanifoma

¹ Askata Jesús Galilea ano kafãsani ato tãpimafofãsafai. Judea ano kayopainima judeofãfe ãto xanĩfofãfemãi retepaiyaifono. ²⁻⁵ Judeofãfe ãto xinifãfe tapas fapaonifo shinãkakĩ fista anifo. Askata judeofo ichapa rasi Judea mai ari Jerusalén anoxõ fista aki fokani fonifo. Mã fista chaima ikaino Jesús Judea mai ari kayotama, Galilea ano nẽteni. ãfe extofori nã Galilea ano afe inifo. ãfe extokõifofiakaxõ Jesúskai nafi Cristoki Niospa nĩchini ixõ tsõa chanĩmara fanifoma. Nãskaxõ yoinifo iskafakakĩ: “Nonoax Judea mai ano katãfe nã mia Ifofamisfãfe nã mĩ ato axomis keskara õinõfo. Nã mĩ amis keskara mĩ ato õimanamano fetsafãfekai mia tãpitirofoma. Nã mĩ afama mĩshti akaifo ato ispafofãfe,” faifãfe ⁶ ato kemani: “Ë iskaratĩa ari katiroma. Ëfe Epa ea nĩchiyoima. Akka afetĩara kapai mã katiro,” ato fani. ⁷ “Na yorafãfekai Epa Nios yafi ea chanĩmara faafoma. Nãfãfe ea noikaspakani. ‘Mãfi afarafo chakafamis,’ ã ato famis. Nãskakẽ ea noikaspakani. Akka mato noikaspakanima. ⁸ Akka mãri fista axiki Jerusalén ano fotakãfe. Ë

kayoikaima. Ĕfe Epa Niospa ea nĩchiyoima,” ixõ Jesús ãfe extofo yoini.

⁹ Mã ato yoita Galilea ano Jesús nēteni.

Jesús kani fista akikai

¹⁰ Nãskata mã ãfe extofo fista akikai, Jerusalén ano foafono Jesústri chipo kani. Tsõa tãpiamano onekõi Jerusalén ano kani. ¹¹ Nãnoxõ nã judeofãfe ãto xanĩfofofãfe Jesús fenakani yoinãnifo: “¿Fanĩmē nã feronãfake?” fanifo. ¹² Nãno yora ichapa rasi inifo. Atirifãfe iskafanifo: “Jesús feronãfake sharakõi,” ikaxõ yoinifo. Askafafiaifãfe atirifãfe yoikĩ iskafanifo: “Maa. A feronãfakekai sharama. Yorafo pãramis,” ikaxõ yoinifo. ¹³ Nãskax a ranã yoinãnifo judeofãfe ato nikayamanõfo judeo xanĩfofoki mesekakĩ.

¹⁴ Fista mitokomeamano Jesús Nios kĩfiti pexefã mēra ikikaini a mēraxõ ato yoixikĩ. ¹⁵ Judeofãfe ãto xanĩfofofãfe nikakaxõ yoinifo: “Aira. Nikakapo. ¿Afeskakĩ na feronãfake kenekĩ tãpikĩ finayamafixõ tãpifinakõiamē?” ikanax yoinãnifo. ¹⁶ Nã yoiaifo keskara onãxõ Jesús ato yoini: “Ĕfe shinãmã shinãkõixõ ě mato yoima. Epa Niospa ea nĩchini nã ea shinãmanai keskara ě mato yoi. ¹⁷ Fatotora a Niospa yoiai keskara apaikĩ tãpitiro akka ěa ě shinãxõ ě mato yoima, Epa Niospa ea shinãmanaino ě mato yoi. ¹⁸ Fatora yora fētsa ãfe shinãmã shinãxõ ãakõi ato yoi. Nãato yorafo shinãmapai iskafakĩ: ‘Nã feronãfake mekakĩ tãpikõia, ea fanõfora,’ ixõ anori ato shinãmapai. Akka yõra fētsa ãa ãfe shinãmã shinãx mekaima. A nĩchinito shinãmanaino mekai, a nĩchini fisti yoisharanõfo. Nãskakē nã yõra ato chanĩkima yoi,

ato pāraima. ¹⁹ Nōko xini Moisés Niospa meka mato kenexoni. Akka mā nikasharamisma. Nāskakē pena tenetitīa ē feronāfake sharafaano mā ea retepai,” ato faino, ²⁰ “Kee. Tsoakai mia retepaima. Mī mēra niafaka yōshi chaka nanea,” faifāfe ²¹ ato kemani: “Ē feronāfake pena tenetitīa sharafaino akka mā ea yoikī iskafamis: ‘¿Afeskakī Jesús pena tenetitīa feronāfake sharafaimē?’ ixō mā eōnoa yoimis. ²² Ē pena tenetitīa afara shara faa keskafakī māri pena tenetitīa afara memis. Moisés kirika kenekī yoini keskafakī māri mātō fake feronāfakefo rama kāikē mā ocho nia oxano mātō fake feronāfakefo mā foshki repa xatemis. (Akka Moiséskai askara noko yoinima, nōko xinifāfe askara yoinifo.) Akka iskaratīa pena teneti ikaino mā mātō fake feronāfakefo mā foshki repa xatemis.

²³ “Moisés yoini keskara nikakī pena tenetitīari mā mātō fake feronāfakefo mā foshki repa xatemis. Akka, ¿afeskai mā ekeki ōitifishkikimē na pena tenetitīa ē na feronāfake sharafaano? ²⁴ Nāskakē a yōra afara shara fakē ōixō yoikī iskafayamakāfe: ‘Nāto afara chakafai kiki,’ fayamakāfe. Mēstekōi yoisharakāfe,” ixō Jesús ato yoini.

“Ē ēfe Epa Nios ariax ē oni,” Jesús ato fani

²⁵ Askata yora rasi Jerusalén ano ikanax yoinānifo: “¿A na feronāfakemē xanīfofofāfe retepaiyaifo?” ikanax yoinānifo: ²⁶ “Ōikapo, yorafā rasichi ōifiaifono mā ato yoi. Akka tsōakai afaa fama. Mā xanīfofofāfe mā tāpiafo rakikīa nā Cristo, a Niospa nokoki nīchini. ²⁷ Ētsa, aama rakikīa Cristo. Cristo oaito nō tāpitiroma fakiranoax oi.

Akka na feronãfake mã nõ tãpia fakiax oamãki,” ixõ yoinifo.

²⁸ Askafaifãfe nikaxõ Nios kĩfiti pexefã mēra ik-ixõ Jesús ato yoini iskafakĩ: “Chanĩma, mã mã ea tãpia ě fakiax oamē,” ato fani. “Akka ěa ěfe shinãmã shinãx ě oama. Akka ěfe Ĕpa ea nĩchini. Nãfi chanĩmismaki. Akka mãfi ěfe Epa mã tãpiama. ²⁹ Ĕ ěfe Epa ariax oni. Nãato ea nĩchini. Nãskakē ě a tãpikõia,” ixõ Jesús ato yoini.

³⁰ Ato askafaito nikakani akiki õitifishki ikakĩ achipainifo karaxa mēra ikimapaikakĩ. Akka a reteaifo ěfe pena nokoamano achipainifo. Tsõakai Jesús afeska fanima. ³¹ Nã yorafã rasichi Jerusalén anoafãfe yoinifo: “Tsoa fĕtsa atiroma keskara fakĩ Jesús Niosxõ afama mĩshti noko ispa. Nã Jesús afama mĩshti fai tsõa atiroma keskara fakĩ. Akka yora fetsa oax ăa is kai yoi: ‘Ĕkĩa Cristo,’ iki yoi. Akka atokai afama mĩshti fakĩ Jesús finõtiroma,” ikanax yoinãnifo. Nãskakĩ Jesús chanĩmara fanifo.

Fariseofãfe ăto inafõ nĩchinifo Jesús achitanõfo

³² Nã yorafã rasichi Jesúsnoa meka shara yoiãifãfe fariseofãfe nikanifo. Nãskaxõ judeofãfe ăto xanĩfofo feta fariseofãfe a Nios kĩfiti pexefã kexemisfo nĩchinifo Jesús achitanõfo karaxa mēra ikimaxikakĩ.

³³ Askata Jesús ato yoini: “Ĕ anã nono mato fe samarakaima. Ĕ samamashta kai a ea nĩchini shinãfãini. ³⁴ Ĕ mato anoax kaino mã ea fenakĩ mã ea fichitiroma. A ě kai arikai mã katiroma,” ixõ Jesús ato yoini.

³⁵ Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichi-tiroma? Nā nōko kaifo griegofo nā peXe rasi anoax paxkafainifo nāno kai rakikīa. Nānoxō griegofo tāpimaxikī kai rakikīa,” fanifo. ³⁶ “¿Afaa noko yoipaimē iskafakī? ‘Mā ea fenafikikai mā ea fichi-tiroma. Ē ika arikai mā katiroma,’ ixō noko yoiai. ¿Afaa noko yoipai iskaimē?” ikanax yoinānifo.

Niospa Yōshi Sharapa yorafo nimapaketiro

³⁷ Askata mā fista mitokomeaino Jesús nā yorafā rasi mēraxō niinākafā fāsi mekainākafā ato yoini iskafakī: “Nikakapo. Nā mā nōamā iki faka aya-paiyai keskai ekeki fekāfe. ³⁸ A ea chanīmara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax,” ixō āfe Yōshi Sharaki keparanākī Jesús ato yoini. ³⁹ Akka faka ato yoinima, Niospa Yōshi Sharaōnoa ato yoini iskafakī: “A ea chanīmara fai ēfe Epa Niospa āfe Yōshi Shara fe rafepakenaka,” ixō Jesús ato tāpimani Apa Nios ari kayoxoma yorafāfe āto xanīfokōi ixikī. Nāskakē Jesús kayoamano Niospa āfe Yōshi Shara ato fe rafeama.

Jesúsnoa yoinifo. Askafikaxō anoris shinānifoma

⁴⁰ Jesús nikakaxō atirifāfe yoinifo: “Chanīmakōi nā feronāfake Niospa meka yoimis a nō manai,” ikanax yoinānifo. ⁴¹ Atirifāferi yoinifo: “Nāfi Cristoki,” ixō yoinifo. Akka fetsafāfe yoini: “Maa, nakai Cristoma. Cristokai Galilea anoax kāitiroma. ⁴² Niospa meka kenenifo keskara, ‘David āfe fena inō Cristo. Nā David ipaoni Belén ano. Nānoaxri Cristo kāixira,’ ixō kirika kenenifo.

Akka Cristokai Galilea anoax kãitiroma,” ixõ yoinifo. ⁴³ Nãskakẽ nã yorafãfe Jesúsnoa nikakaxõ anoris shinãnifoma. Fetsafãfe Jesús chanĩra fanifo, fetsafãferi chanĩmara fanifo. ⁴⁴ Atirifãfe Jesús achipainifo karaxa mẽra ikimapaikakĩ. Achipaifikakĩ tsõa Jesús afeska fanima.

Judeofo ãto xanĩfofofãfe Jesús chanĩmara fanifoma

⁴⁵ Askata fariseofãfe ãto Nios kĩfiti pexefã kex-emisfo fenifo. ãto xanĩfofoki feaifono ato yõkanifo: “¿Afeskakĩ mã Jesús achiamamẽ noko efexoxikĩ?” ixõ ato yoinifo. ⁴⁶ Ato askafaifono ato kemanifo: “Na feronãfãke ãfe meka sharakõi, tsõa anori yoimisma,” ato fanifo. ⁴⁷ Ato nikakaxõ fariseofãfe ato yoinifo: “Kee, Jesús mã matori pãra. ⁴⁸ Akka nõfi mãto xanĩfofo feta a Moisés kirika keneni nõ tãpikõiakĩ. Akka nõ fatotokai nõ Jesús chanĩmara faima. ⁴⁹ Akka nã yorafãfe mã rama Jesús nikafo nãfãfe a Moisés kirika keneni tsõa tãpiafoma. Niospa ato omiskõimaxiki,” ikaxõ ato yoinifo.

⁵⁰ Askafafiaifono Nicodemo taeyoi nãato pena fetsa Jesúski kani fakishi afara yõkaikai. Nãrimãi fariseoax nãskaxõ afe rafeafo yoini: ⁵¹ “Efe yora mĩshtichi, ã mato yoinõ. Nõko xinifãfe ãto xanĩfofãfe yoinifo keskara nõ fatora feronãfake nikasharayamaxõ, ‘Afara chakafaira,’ nõ fatiroma iskafakĩ: ‘Nãto afarafo chakafai kiki nõ omiskõimanõ,’ ixokai nõ askafatiroma,” ato askafaino kemanifo: ⁵² “Mĩ noko yoi Galilea anoxõ yoiaifo keskara. Galilea anoxõ Niospa meka tãpiafoma. Shinãpo. Fato feronãfakekai a Galilea anoxõ Niospa meka yoimis oama. Akka

nono fistixõ Niospa meka noko yoitirofo,” ikaxõ Nicodemo kemanifo.

⁵³ Nãskax yoinãkanax ãto pexe rasi ano fonifo.

8

Këro ãfe fenema fe ikaito xanĩfofofãfe retepainifo

¹ Nãskata Jesús machi ãfe ane Olivos ano kani.

² Penaino Jerusalén ano nokoax anã a Nios kĩfiti pexefã mēra Jesús oni. Nãno yorafã rasi afianã akiki fenifo nikai fekani. Askata tsoaxõ ato yoini.

³ Ato yoiaino a Moisés yoikĩ kirika keneni keskara ato tãpimamisfo fe fariseofo fenifo. Këro ãfe fenema fe ikaito fichikaxõ Jesúski efenifo. Yorafã rasi nēxpakĩa këro nĩchinifo keyokõichi õinõfo. ⁴ Askafakaxõ Jesús yoinifo: “Maestro, na këromã afarafo chakafaa. ãfe fenema fe ikaito nõ fichia. ⁵ Moisés iskafakĩ noko yoini: ‘Këro ãfe fenema fe ikaito õikĩ nõ tokirinĩ tsakakĩ retetiro,’ ixõ Moisés noko yoini. Akka, ¿mĩ noko afaa faimẽ?” fanifo.

⁶ Nãskaxõ Jesús kemamapainifo, “Fakiri noko yoimãkai,” ikaxõ ãto xanĩfofo yoipaikakĩ. Askafai-fono Jesús ãfe mēkemã mai keneni. ⁷ Yõkarifaifono Jesús atoki fininãkafã ato yoini iskafakĩ: “Fatotokai mã afaa chakafamismamẽ na këro mã tokirinĩ tsakakĩ taefai,” Jesús ato fani.

⁸ Mã ato yoixõ afianã ãfe mēkemã mai keneni.

⁹ Nãskano mã ato yoiaino nikakaxõ a Jesús mai kenai õikanax nã këro mekafakĩ chakafamisfo fisti rasi tsekefaifainifo. Nã anifo tii foi taenifo. Chiponaetapafo fonifo. Mã foafono Jesús fisti nãno këro fe nēteni. ¹⁰ Nãskax Jesús fininãkafã nã këro yõkani: “¿Nã feronãfakefo mia yõafo mã foafomẽ? ¿Tsoa

fisti nēteamamamē anā mia yōaxikakĩma?” ixō Jesús yōkaito, ¹¹ “Īfo, tsoa pishta nēteama,” faito, “Ērikai mia mekafakī chakafaima. Iskaratīa mī katiro. Afianā mī chaka ipaoni keskara anā askayamafe,” ixō Jesús nā kēro yoini.

Jesús pena xafashara keskara

¹² Askata mā kēro kaano Jesús yorafā rasi yoini. Ato yoini iskafakī: “Ēfi pena keskarakī. Ē nā yorafo tii imasharatiro shara ĩpaxanōfo, anā fakish keskara inōfoma. A ea Ifofai fenotiroma,” ixō Jesús ato yoini. ¹³ Nikakakī fariseofāfe yoinifo: “Na mī noko yoiai anorikai tsōa mīōnoa noko yoima. Mīa mī yoimei. Akka a mī noko yoiaikai tsōa mia nikatiroma,” faifāfe ¹⁴ Jesús ato kemani: “Ē fakiax oamē fakiri ē kaimē mē tāpia. Akka ēa ē yoimeai ēfe meka chanīmakōi. Askafiax fakiax ē oamē ē fakiri ē kaimē mākai tāpiama. ¹⁵ Mā ea tāpixoma, mā ēfe meka chanīmara faima. Ea tāpixoma mā ea shināi oa chanīai keskara ē mekaito. Mā askara shināi Niospa mato askara anori shināmanainoma. Ēkai tsoa mekafakī chakafaima. ¹⁶ Akka, ‘Na yorafāfe afara chakafamisfo,’ ēa ē mato faima. Ēfe Epa shināi keskara nānorikōiri ē mato yoi. Askaxō chanīmakōi ē yoimis. Ēfe Epa nāto ea nīchini, nā ea tāpimanai ē yoimis. ¹⁷ Moisés mato yoini iskafakī: ‘Feronāfake rafeta nānoris mato yoiaito mā nikatiro,’ ixō mato Moisés yoini. ¹⁸ Akka ēakōi ē yoimei. Akka nā ea nīchinito ēfe Ēpari eōnoa nānorikōi yoimis,” ato faito, ¹⁹ nikakakī yōkanifo: “¿Fanīmē mī Epa?” faifāfe, “Mākai ēfe Epa yafi mā ea tāpiama. Ea tāpixō ēfe Epari mā tāpikerana,” ixō ato Jesús yoini.

²⁰ Nios kīfiti pexefã mēraxõ ato yoini. Nãno nã kene mēra judeofãfe ãto kori naneti ini. Niospa meka yoimisfo ato inãmisfo. Jesús ato yoiaino judeo xanĩfofofãfe achipainifo. Askafixõ tsõa achinima ãfe penakairoko nokokẽ achipanãfãfe.

Jesús yorafo yoini: “Ë kai arikai mã katiroma,” ato fani

²¹ Askata Jesús afianã judeofo ãto xanĩfofo yoini: “Ë chai mẽ kai. Ë kaano mã ea fenafikĩ mã ea fichitiroma. Mãto chaka soaxoma nãskax mã nai. Ë kai arikai mã nokotiroma,” ixõ Jesús ato yoini. ²² Jesús ato askafaito nikakaxõ yoinifo: “¿Akõi retemeimẽ? Nã noko yoiai: ‘A ã kai ari mã nokotiroma,’ noko fai,” ikanax judeofo xanĩfofo yoinãnifo.

²³ Jesús ato tãpixõ ato yoini: “Mãfi na mai anoakĩ. Akka ěfi nai mēranoakĩ. ²⁴ Nã ěa ě yoimea keskara mãto chaka potaxma mã nai eakairoko mã ea chanĩmara faax. Nãskakẽ afara chakafaxõ mãto chaka soaxma mã naax Epa Nios ari mã nokotiroma. Mã mã naano mãto chaka mato fe ipanaka.”

²⁵ Ato askafaito kemanifo: “¿Mĩ tsoamẽ?” ixõ yõkaifãfe, “Nã ě mato yoitaifamis ěkĩa. ²⁶ Matoõnoa afama mĩshti ě yoitiro. A mã afara chakafamis ě yoitiro. A ea nĩchinito ea yoiaito ě nikai. Nãskakẽ nã ě mato yoifafãini. A ea nĩchinito yoiai chanĩmakõi,” Jesús ato fani.

²⁷ Apa Niosnoa ato yoifiaitokai tsõa tãpinifoma.

²⁸ Nãskaifãfe Jesús ato yoini: “Ëfi yõra fakekõiki. Mã ea ifi cruz ikakĩ mastaxõ mã ea fininĩfofãxõ mã ea õixii ě tsoamãki mã ea tãpitiro. Nãskatari eõnoa mã tãpitiro ěa ě mato yoimisma. Epa Niospa

ea yoia keskara ã mato yoimis. ²⁹ Nã ea nĩchini efe ika. Eres ã ikama. A ea amapaiyai keskara ã amiski. Nãskax ekeki inimasharamiski,” ixõ ato Jesús yoini. ³⁰ Yoiaito nikakaxõ yora ichapato chanĩmara fanifo.

Niospa fakefãfe Nios ãto Ifo, akka afara chakafamisfãfe afara chaka ãto ifo

³¹ Nãskaxõ Jesús a chanĩmara faafo yoini: “Ë mato yoiaito mã ea nikasharakõiax mã eõxõ tãpimiskõifo mã itiroki. ³² Ëfe meka nikakõixõ mã Nios tãpitiro, Nios chanĩmismo. Askax mã isharatiro. Afara chanĩ mãto ifo itiroma.”

³³ Ato askafaito kemanifo: “Nõfi Abraham ãfe fenaki. Fato fetsa nõko ifo imismo. Nõkai tsõa yonomatifoma. ¿Afeskakĩ ‘Afara chanĩ mãto ifo itiroma’ noko Jesús faimẽ?” fanifo.

³⁴ Askafaifãfe anã Jesús ato yoini: “Chanĩmakõĩ ã mato yoi. Nã afara chakafamisfãfe nã chaka ãto ifo ixii. ³⁵ Mã mã tãpia peixe ifãfe ãfe yonomati ãfe peixe mẽra ipaxatiroma. Akka ãfe fake fisti ãfe peixe mẽra ipaxatiro. ³⁶ Nãskarari Niospa Fãke mato chaka soaxonano afara chaka mãto ifo itiroma. Niospa mato fakekõifai, mã afe isharakõipakenaka. ³⁷ Mẽ mato tãpia mãto xini Abraham. ãfe fenafofi-axõ ãfe meka mã nikakaspai. Nãskaxõ mã ea retepai. ³⁸ Ëfe Epa amis keskara mẽ õimis. Nãõnoa ã yoimis. Mãri a mãto epa mato yoimis keskara mãri yoimis,” ato feito, ³⁹ kemanifo: “Akka nõko xini Abraham,” faifãfe, “Akka mã Abraham ãfe fenafofĩ ¿afeskai mã Abraham apaoni keskara mã amismamẽ? ⁴⁰ Epa Niospa ea yoimis keskara chanĩma ã mato yoifiaino mã ea retepai. Abrahamkai mato keskara ipaonima. ⁴¹ Mãto epa

akai keskara mări mã amiski,” ato feito, “Nõkai Epa ichapayama. Nõko Epakõi fisti Nios. Nõfi ãfe fakekõifoki,” faifãfe ⁴² Jesús ato yoini: “Ëfi Nios fe imiski. Ë Nios ariax oni. Ëa shinãx na mai ano ã onima, ãfe Ëpa ea nĩchini. Akka mãto Epa Nioskẽ mã ea noikerana. ⁴³ ¿Afeskakĩ ãfe meka mã nikaimamẽ? A ã mato yoiaito mã nikakaspai. ⁴⁴ Akka mãto epa Satanás. Mã ãfe fakekõifo. Nãskaxõ mãto epa apaiyai keskara mări mã apai. Nãfi taeyoi retemitsamis iyopaoni. Afi iskaratĩa nãskara. Atokai afara shara yoimisma, chanĩkõi. ãfe shinã mẽraxõ chanĩ fisti shinãmis. Nãskaxõ chanĩ fisti yoimis. Nã chanĩai shinãifãfe nã chanĩmis nãfi ãto apaki. ⁴⁵ Nã keskara chanĩ ã mato yoyamafiaito mã ea chanĩmara famisma. ⁴⁶ Ë afaa chakafaito mã ea õimisma. Ëkaj afaa chakafamisma. Ramashara ã chanĩmisma. Ë askafiaito mã ea chanĩmara famisma. ⁴⁷ Nã Nios fe rafeafãfe Niospa meka nikatirofo. Mãkai Nios fe rafeama. Nãskaxõ mã ãfe meka mã nikaima,” ixõ Jesús ato yoini.

Abraham fakeamano Cristo Apa fe iyopaoni

⁴⁸ Judeofãfe Jesús kemanifo: “Chanĩma nõ yoimis. Mĩfi samãritanõ chakaki. Askatari mĩ mẽra niafaka chaka nanea,” faifãfe, ⁴⁹ “Niafaka chaka ã mẽra naneama. Ë ãfe Epa Niosnoa meka shara ã yoimis. Akka mãfi eõnoa meka chaka yoimis. ⁵⁰ Askafixõ, ‘Ea yoisharakãfe,’ ã yorafo famisma. Ëfe Epa Niospa meka shara eõnoa ato tãpimapai. Nãato ato yoitiro fatofomãki yora sharafo, fatoforimãki yora chakafo. ⁵¹ Chanĩmakõi ã mato yoinõ. Nã ãfe meka nikaifo nakanamax nĩpanakafo,” ato feito kemanifo, ⁵² “Iskaratĩa

mã nõ mia tãpikõi mĩfi niáfaka chakaya. Akka mã Abraham nani, Niospa meka yoimisfori mã nanifo. Nãskafikẽ mĩ noko yoia: ‘Nã ẽfe meka nikakõiaifo nãtamaroko nĩpanakafo,’ ixõ mĩ noko yoi. ⁵³ Mã nõko xini Abram nani. Niospa meka yoimisfori mã nanifo. ¿Akka mĩ Abram finõkõiamẽ? ¿Mĩ shinãimẽ ‘Ë ato finõara’ iki?” faifãfe, ⁵⁴ Jesús ato kemani: “A ẽa ẽ yoimesharai ẽfe meka sharama. Akka ẽfe Ëpa eõnoa yoisharai. Mã a yoimis: ‘Nõko Epa Nios,’ fakĩ. ⁵⁵ Mãkai ẽfe Epa Nios tãpimisma. Akka ẽfi ẽfe Epa tãpikõia. Akka ẽ mato keskaraxõ, ‘Ëfe Epamara,’ ẽ fakerana mato keskara chanĩmis ẽ ikerana. Askatamaroko ẽfe Epa Nios ẽ tãpikõia. Ea yoiai keskara ẽ amis. ⁵⁶ Mãto xini Abram yoini: ‘Cristo oaito ẽ õixii,’ ixõ yoi inimani. Mã ẽ oaito ea õini askax fãsi inimani,” ato faito, ⁵⁷ “Mĩkai cincuenta xiniya akama. Mĩkai nõko xini Abram õimisma. Afetĩkai nanima. Akka, ¿afeskakĩ, ‘Ë Abram õimis,’ ixõ mĩ noko yoimẽ?” faifãfe, ⁵⁸ “Chanĩmakõi ẽ mato yoinõ. Abram fakeamano ẽfi iyopaoniki,” ixõ Jesús ato yoini.

⁵⁹ Askaito nikakani nã judeofãfe ãto xanĩfofo õitifishkikaxõ tokiri fikaxõ Jesús tsakapainifo. Askafapaifiaifono Jesús ato makinoax yamarisatani, Nios kĩfiti pexefã mẽranoax. Kaitokai tsõa õinima.

9

Feronãfake fẽxo kãini Jesús sharafani

¹ Jesús kakĩ feronãfake fẽxo nãskarapa kãini fichini. ² Õikakĩ aõxõ tãpimisfãfe yõkanifo: “¿Maestro,

afeskai na feronãfake fêxo kãinimê? Afara chakafakatsaxakĩ ikaraka, apa feta ãfa afara chakafamisfono ikaraka,” ixõ Jesús yõkanifo. ³ “Afara chakafayamafikatsaxakĩ nãskarapa fêxo kãini. Apa feta ãfari afara chakafamismano nã feronãfake fêxo kãini. Nãskarapa kãini. Akka Niospamãi afama mĩshti fatirokê nãskax fêxo kãini ato õimasharaxikĩ. ⁴ Niospa ea nĩchini ã yonoxonõ. Nã ã akaitĩa ã yonoxotiro. Akka fakishikai nõ yonoxotiroma. Nãskarifiakĩ mã nõ naxõ nõ anã Nios yonoxotiroma. ⁵ Ë nono mai ano iyoax ã pena keskara. Ë ato õimayoi afeskax isharakanimãkai,” ixõ Jesús yoini.

⁶ Nãskara yoita maiki kemo mechota a mai kemõ mechanafaxõ a feronãfake fêxo aõ fetekere ani. ⁷ Askafata, “Iãmã fechokometãfe,” fani. Nã Iãmã ãfe ane Siloé, ãto mekapa anemisfo na Siloé ãfe ane “Nĩchia” famisfo.

Nãskata fêxo Iãmã kaax fechokomeni. Fechokomexõ õiakefaini. Nãskax oni. ⁸ Nãskata nã chaima nikafãfe a õimisfãferi yoinifo: “Nã fêxo tsaoux afara yõkakameaito nõ õimis. ¿Nãmê?” faifãfe ⁹ atirifãfe, “Nãkĩa,” fanifo. Atirifãfe yoinifo: “Akerokõi,” fanifo. Nãskafikaxõ yoinifo: “Nã keskarakõi,” faifãfe, ato yoini: “Ëkĩa. Ëfi fêxo iyopaoniki. Nãskafixõ iskaratĩa mẽ õisharai,” ato faito, ¹⁰ “¿Afeskaxõ mã iskaratĩa õisharaimê?” faifãfe, ¹¹ “Nã feronãfake ‘Jesúsra’ faifãfepi ãfe kemõ mai mechanafaxõ ea fetekere axõ: ‘Nã Siloé Iãmã fechokometãfe,’ ea faano, Siloé Iãmã fechokomexõ ã õishara,” ato fani. ¹² Ato askafaito nikakaxõ, “¿Fanĩmẽ a feronãfake Jesús?” faifãfe, “Ëtsa ã tãpiama. Mã fakira kaa,” ato fani.

Nã fêxo kãinito õisharaino fariseofãfe a yõkanifo.

¹³ Askaito yorafãfe nã feronãfake fêxo iyopaoni fariseofo ano iyonifo. ¹⁴ Jesús nã feronãfake pena tenetitã sharafani. ¹⁵ Fariseofãfe nã feronãfake anã yõkanifo: “¿Afeskax mĩ fero sharamẽ?” faifãfe, “Ea Jesús sharafaa ãfe kemõ mai mechanafaxõ ea aõ fetekere akano. Ë ãamã fechokomexõ ë õisharakõia,” ato fani.

¹⁶ Nikakakĩ fariseo fetsafãfe yoinifo: “Akai Nios fe rafeama. Moisés kirika kenexõ noko yoini iskafakĩ: ‘Pena tenetitã nõ yonotiroma,’ ixõ yoini. Nãskakẽ nõ yora sharafatiroma pena tenetitã,” faifono, fetsafãfe ato kemanifo: “Akka yora chakapa fêxo sharafatiroma. Yora chakapakai nãato akai keskara fatiroma,” ikanax fariseofo fochishpanã faatanãnifo. Atirifãfe fariseofãfe yoinifo: “Jesús-kai sharama,” faifono, atirifãferi, “Jesús sharaki,” fanifo. ¹⁷ Nãskata afianã fariseofãfe a yora fêxo ipaoni yõkanifo: “Mĩ noko yoia, ‘Nãto ea fero sharafaxõa,’ fakĩ. ¿Akka afaa mĩ shinãimẽ tsoamãki?” faifãfe, “Nã Nios ato yoixomisto ea sharafaa,” ato fani.

¹⁸ Ato askafaito nikakakĩ judeo fetsafãfe, “A chanĩra,” fanifo. “Na fêxo ipaonima,” ixõ. Nãskaxõ fariseofãfe apa yafi afa kenaxõ yõkanifo. ¹⁹ “¿Namẽ mĩ fake fêxo ipaoni? Akka, ¿afeskakĩ iskaratã õimẽ?” faifãfe, ²⁰ “Nãkã nõko fake, nã fêxo kãini. Mã nõ tãpia nõko fake. ²¹ Tiiri afeskara axora mã õi nõkai tãpiana. Akka fakefomaki, xiniki mato yoitiroki afeskax sharamãki. Yõkakãfe,” afa feta ãpa ato fani. ²² Judeofoki mesekakĩ nãnori yoinifo. Akka judeo xanĩfãfe yoiyoni iskafakĩ: “Tsõa yoitiroma: ‘Epa Niospa Jesús nĩchini nõko Ifo

Cristo inõ,' ixõ yoitiroma. Akka askara yoixõ anã nõko ichanãti pexe ano ikitiroma," judeo xanĩfãfe anori ato yoiaino nã fẽxo ipaonito ãfe afa fe ãfe apa mesenifo. ²³ Nãskaxõ ato yoinifo: "Xiniki fakefomaki. Yõkakãfe," ato fanifo.

²⁴ Nãskata fariseofãfe nã feronãfake fẽxo ipaoni yõkanifo: "Noko yoikĩ iskafafe: 'Niospa ea sharafaa,' ife," fanifo. "Jesúskai sharama. 'Niosfi sharaki,' ife. 'Jesús sharara,' fayamafe. Nõ tãpia Jesús chakaki," fanifo.

²⁵ "Ëtsa. Ë tãpiama chaka iyamai shara rakikã. Ë tãpia ã fẽxo iyopaoni ã iskaratã õisharai. Nã fisti ã tãpia," ato faito, ²⁶ "¿Afeskafaxõ mia sharafaamẽ?" ixõ yõkaifãfe, ²⁷ "Ë mato yoiaito, ¿mã ea nikamamẽ? ¿Afeskakĩ mã afianã ea yõkaimẽ? ¿Mãri aõxõ tãpimis mã ipaimẽ?" ato faito, ²⁸ nikakakĩ ìchaketsanifo. Nãskaxõ yoinifo: "Mifi a Ifofaikai. Akka nõfi Moisés meka nikamiski. ²⁹ Nõ tãpia Moisés Nios fe mekapaoni. Nõkai na Jesús tãpiama. Fakira anoax oa afe keskarara a feronãfake nõ tãpiama," faifãfe anã ato kemani: ³⁰ "¿Mã tãpiamamẽ fakira anoax oxõ ea sharafaa ã fẽxokẽ? ³¹ Nõ tãpia yõra chakafamisfokai Niospa ato nikapaitiroma. Fatorato Nios Ifofasharapai isharatiro. Nãskara Niospa nikapai. ³² Nã Niospa mai onifani chãikai nõ afaa nikayomisma yora fẽxo kãini tsõa sharafai. Akka iskaratã mã ea Jesús sharafaa. ³³ Na feronãfake Niospa nìchiyamanokai afaa afeskafakeranama," ato faito, ³⁴ nikakani akiki õitifishkinifo. "Mifi chakakõi kãini. ¿Afeskakĩ mĩ noko tãpimapaimẽ mĩ chakafixõ? Anã nõko ichanãti pexe mẽra mĩ ikitiroma. Nonoax kariskatãfe. Nõkai anã mia

õipaima. Anã nõko ichanãti pexe mēra ikiyamafe,” fanifo.

Fatorafāfe Jesús chanĩmara fayamakanax nã yora fẽxo keskarakõifo

³⁵ Nãskano nã fẽxo imis ãto ichanãti pexe mēraxõ potaifāfe nikafaini Jesús kani. Nãskaxõ fenakĩ a fẽxo imis fichini. Fichixõ yõkani: “¿Mĩ Niospa Fake chanĩmara faimē?” ixõ yõkaito, ³⁶ “¿Fatomē ã chanĩmara fanõ?” faito, ³⁷ “Nã mĩ ea õi. Ēkĩa,” Jesús fani. ³⁸ Askafaito ratokonõ mai chachipakefofã yoini: “Ifo, ěfi mia chanĩmara faikai. Mĩ fãsi sharakõi. Ē mia Ifofai. Mĩ Niospa Fakeki,” ixõ yoini.

³⁹ Askata chipo afianã yorafo akiki feafāfe Jesús ato yoini iskafakĩ: “Ēfe Epa Nios ika anoax ã nono mai ano oni. Fato yorafomãki a ea nikayamaifo, fatoforimãki a ea nikaifo ã ato õiyoi oni. Fatotora shinãi iskaito: ‘Mē afara chakafamiski. Ea chaka soaxope,’ ixõ anori shinãito ã ěfe chaka soaxotiro afianã afara chakafayamanõ. Ē na fẽxo fero sharafaxõa keskafakĩ ã yorafo ãto chaka soaxotiro shara inõfo. Akka fetsafāfe shinãi iskakani: ‘Ē afaa chakafamisma, ã yora sharakõi. Ē tãpikõia,’ ixõ shinãkani. Askarafofi yora fẽxo keskarafokĩ, a ato sharafamis ano fopaikanima ato sharafapanã. Nãskarafāfekai yoipaikanima ãto chaka soapaikanima. Nãskarafo fenopakenakafo,” ixõ Jesús ato yoini. ⁴⁰ Fariseofāfe a Jesús yoiai nikakaxõ yõkanifo: “Kee. ¿Mĩ noko yoimē nõmē fẽxo?” faifāfe ⁴¹ Jesús anã ato yoini: “Mã ea yoikerana: ‘Nõ fẽxo keskarafo. Mã nõ afara chakafamis,’ ixõ mã ea yoiaito ã mato chaka soaxokerana. Akka

mākai ea askafamisma. Mā yoimis: ‘Nō ōisharatiro. Nōkai fenoama. Nō sharakī. Nōkai chakama,’ ixō anori mā yoimis. Akka māto chaka soaxma, mā fenokōiax Epa Nios ika ano mā nokopakenakama,” ixō Jesús ato yoini.

10

Oveja keneaki keparanākī Jesús ato yoini

¹ (Askata Jesús ato tāpimani nāatomāi āto kexekatsaxakī. Oveja kexemisto āfe ovejafo kexemis keskari fakī nāskarifiakī Jesús ato kexemis.) Nānori Jesús ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, faki fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro. ² Akka nā ovejafo kexemis nā oveja kāitinī ikikaitiro. ³ Kāiti ano nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfafāitirofo. ⁴ Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfafaitirofo. ⁵ Akka a kexeamatokai iyotiroma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotirofo,” ixō Jesús ato yoini. ⁶ Jesús nā ovejafoki keparanākī ato yoini. Ato yoiaito tsōa tāpinifoma.

Jesús noko kexesharamis

⁷ Nāskano Jesús afianā ato yoini: “Ē chanīmakōi mato yoinō. Nā ovejafo kene mēra ikikani nā kini fisti mēra ikitirofo. Ēfi na oveja kini

keskaraki. Nā Epa Nios ano ikipaikani eōnoax fisti ikitirofo. ⁸ Ē matoki nokoamano fetsafāferi mato yoikī iskafakani: ‘Ēfi Cristoki. Ē mato tāpimatiro afeskax mā Epa Nios ari nokotiomāki afe ipaxakī,’ ixō anori yoikani āa chanīmisfo. Yometso keskarakōifo. A Nios chanīmara faifo ato pārapaikani: ‘Noko fisti nikanōfora,’ ikaxō. Nāskakē Niospa fakefāfe ato nikakanima, ‘Noko fisti nikanōfora,’ ixō ato pārapaiyaifono. ⁹ Akka ěfi na kini kāiti keskaraki. Nā ěfe Epa Nios ika ano ikipaikani eōnoax ikitirofo afe ipaxakakī. Nāskatari eōnoax isharatirofo anā fekaxtetirofoma. ¹⁰ Akka fetsafāfe efe yorafo ato pārapaikani: ‘Ea ifofakāfe. Ē mato tāpimasharanō,’ ixō ato yoifikakī anorima ato pārakani. Nāskakaxō emakinoa ato ifipaikani. Yometso keskarakōifo. A ea chanīmara faafo ato kexesharapaikanima. Ato chakafata ato retepaikani. Akka ě askarama. A ea Ifofamisfo ě ato kexesharai efe isharapakexanōfo, nono nāmānoaxri isharapakexanōfo. Nāskax ě nono nāmā oni ato kexesharaxikī.

¹¹⁻¹³ “A ea chanīmara faifo ovejafo keskarafo. Ēfi nā oveja kexesharamis keskaraki. Nāskakē ě efe yorafo ě ato nāxoxii. Oveja ifāfe feronāfake fetsa kori inātiro āfe oveja kexexonō. Nāskaxō mā kori ināno nā feronāfāke oveja kexesharatamaroko, kori fisti shinātiro. Nāskakē poomā oaito fichiax ovejafo kexetama ichotiro. Nāskaxō shināi iskakī: ‘Na poomā mesekōi. Na ovejafo ěfenākōima, aa poomānā pinō ěfenākōimakī. Nāskakē ě ichoikai ea poomānā afeska fanōma,’ ixō shinātiro. Akka ovejafāfe ifokōi askarama. Āfe oveja kexesharai. Poomā oaito fichixō ato kexesharatiro, poomānā

ato afeska fanõma. Nãskaxõ shinãtiro iskakĩ: ‘Èfe ovejafõnoax ã natiro afokai afeskatiroma,’ ixõ shinãtiro.

14-15 “Èfi nã ovejafãfe ifo keskara sharakĩ. Ovejafõ ãfe ifãfe ato tãpia atomãi kexesharakatsaxakĩ. Èri nã ea chanĩmara faafo ã ato kexesharamis. Èfe Epa Niospa ea tãpikõia. Èri èfe Epa ã tãpia. Nãskarifiakĩ a ea chanĩmara faafo ã ato tãpia. Afãferi ea tãpiafo. Nãskax ã atoõnoax naxii. 16 Yora fetsafãferi ea chanĩmara faxikani. Afokai nono ikafoma. Mai fetsa ano ikafo. Nãfãfe ea nikasharaxikani. Nãfo èfe Epa ika ano ã ato iyotiro. Akka nã yora fetsafãfe a nono ikafãferi ea chanĩmara fakanax yora fisti keskara ixikani. Nãskax Epa Niospa yorakõifo ixikani. Eres fisti ã ato kexesharai. 17 È ato kexeax ã atoõnoax naxii. Nãskaito èfe Epa Niospa ea noi. Naax ã anã otoxii. 18 A ea chanĩmara faafoõnoax ãakõi ã nai, ea tsõa retekeraanama. Èfe Èpa ea yoini keskara ã atoõnoax naikai. Èfe Epa Niospa ea yoini keskara ã atoõnoax nafiax ã anã otoxii,” ixõ Jesús ato yoini.

19 Nikakaxõ judeofãfe chanĩmara fanifo. Akka atirifãfe chanĩmara fanifoma. 20 Atirifãfe yoini iskafakakĩ: “Nĩafaka yõshi chaka a mẽra nanea. Afaa tãpiana. Noko yoiai nõ tãpitiroma. ¿Afeskakĩ na feronãfake nõ nikatiromẽ?” ixõ yoinifo. 21 Akka atirifãfe yoinifo: “Niafakakai a mẽra naneanaka iskara meka shara yoikeranama. Nĩafakakai feronãfake fẽxo õimatiroma,” ixõ yoinifo.

Judeofãfe ãto xanĩfofofãfe Jesús chanĩmara fanifoma

22-23 Askafafono Jesús kani judeofãfe ãto Nios kĩfiti pexefã mēra Jerusalén ano mã mechakaino. Nāno tapas keskara ini pexe kachiori. Ano Jesús kani. Nā tapas ãfe ane Salomón. Nāskatari judeofãfe ãto fista anifo. Nā fistatīa shinānifo a Niospa pexe onifani.

24 Judeofãfe ãto xanĩfofo Jesúski fenifo yōkai fekani: “¿Mĩmē Cristoki? Noko yoife. ¿Afeskakĩ mĩ noko yoisharaimamē? ¿Afetiākairoko mĩ noko xafakīa yoimē?” faifãfe, 25 “Ē mato yoifimiskē mã ea chanĩmara faima. Ēfe Epaōxō a yorafãfe atiroma keskara fakĩ mē mato ispa ěmāi Niospa Fakexō. 26 Akka mākai ea chanĩmara faima mākairoko Ēpa Niospa yorafoxō. 27 A ea chanĩmara faifãfe ea nikasharatirofo. Mē ato tãpia a ea Ifofakōinafo. 28-30 A ea Ifofaafoma omiskōipakenakafo mēra fokani. Akka a ea Ifofamisfokai ari fokanima. Askatamaroko ě ato imasharapakenaka. Epa Niospa atoya ea rafemani. Epa Niospa keyokōi ato finōkōia. Ē ěfe Epa Nios fe nã yora fisti keskara. Nāskakē a ea Ifofamisfo emakinoa tsōa ato ifitiroma, ěfe Epa makinoari tsōa ato ifitiroma,” ixō Jesús ato yoini.

31 Nikakaxō judeofãfe ãto xanĩfofofãfe anã tokiri fikaxō aō Jesús tsakapainifo retepaiyanã. 32 Nāskafaiãfe Jesús ato yoini: “Epa Niosxō afama mĩshti ě mato ispa tsōa atiroma keskafakĩ. Akka, ¿afaōxokai mã ea tokirinĩ tsakaimē?” ato faito, 33 “Akka na afama mĩshti mĩ noko ispaōxokai nō mia tokirinĩ tsakaima. Akka nã mĩ meka chakaōxō nō mia tokirinĩ tsakapai, ě Nios keskarara mĩ ikaito. Anã ano Nios fetsama. Mĩri noko keskara yora. Akka mĩ noko yoia: ‘Ēri Nios keskara,’ iki.

Akka mĩ Nios chakafai. Nāskakē nō mia tokirinĩ tsakai,” faifāfe, ³⁴ Jesús ato kemani iskafakĩ: “Mā is kai: ‘Anā ano Nios fetsama,’ mā imis. Akka nā Niospa meka yoimisto kirika keneni iskafakĩ: ‘Ĕ mato yoi māfi Nios keskarakōifokĩ. Niospa mato nĩchia,’ ixō kirika keneni, Niospa meka yoikĩ. Akka nā meka tsōa chanĩra fatiroma. ³⁵⁻³⁶ Akka Niospa anori yoifiano çafeskakĩ mā ea yoimē ĩ Nios chakafai? Akka Niospa ea nai mēraxō nāmā nĩchini. Nāskakē ĩ mato yoitiro ĩfi Niospa Fakeki. ³⁷⁻³⁸ Mā kai ea nikapaima. Ĕfe Epa Niospa aka keskara ĩ ayamakē, āa chanĩra mā ea fakerana. Akka ĩfe Epa akai keskara ĩri akaito mā yoikerana: ‘Chanĩma Epa Niospa atiro keskara Jesús aki,’ ixō mā yoikerana. Nāskakē a ĩ afama mĩshti akaōxō ea chanĩmara fakāfe. Ĕfe Ĕpa akai keskara ĩri akaito mā ea tāpitiro ĩfe Epa fe ika,” ixō Jesús ato yoini.

³⁹ Nikakaxō anā Jesús achipaifiaifono, ato maki-noax kaitokai tsōa tāpinima. Nāskakē tsōa achinima.

⁴⁰ Ato makinoax kai, faka Jordán ari kani nā Juan yorafo maotisafapaoni ano. Nāno chaimashta Jesús nēteni faka kesemē. ⁴¹ Nāskakē yorafo akiki fēkaxō yoinifo iskafakakĩ: “Jesús Niosxō afama mĩshti fakĩ noko ispa. Juankai askafapaonima. Askafixō Juan Jesúsnoa noko yoini chanĩmakōi,” ikanax yoinānifo. ⁴² Nāskakaxō yora ichapato Jesús Niospa fakera fakaxō Jesús chanĩmara fanifo.

Lázaro mã nani
(Mt. 12.46-50; Lc. 8.19-21)

¹ Askata feronãfaka Lázaro isinĩ ini. Nã Lázaro Betania ano ikax isinĩ ini. Poi rafe fe ikax María ikaino, Marta ikaino, nã rafe ato fe ikax. ² Nã María pirofomã sharakapa Jesús ãfe tae pemãkĩa nachiyoni. Nãskaxõ ãfe fõo otekere ani.

³ María feta Marta iskafakĩ Jesús yoitanõfo ato nĩchini: “Ifo, mĩ yamakõi Lázaro isinĩ iki kiki,” ikaxõ yoitanõfo. ⁴ Kenamanaifãfe nikaxõ Jesús aõxõ tãpimisfo ato yoini iskafakakĩ: “Nã Lázaro isinĩ ikai naima. Akka yorafãfe õikani ã afara afeskarafaito. Nãskakẽ ea tãpikani ãmãi Niospa Fakekẽ. Nãskaxõ yorafãfe yoikani: ‘Epa Nios fãsi sharakõi,’ ikaxõ yoinõfo,” ixõ Jesús ato yoini.

⁵ Jesús poi rafeya Lázaro noikõini. ⁶ Lázaro isinĩ ikaito nikafi Jesús oxa rafeyoni. ⁷ Nãskata a aõxõ tãpimisfo Jesús yoini: “Nõ Judea mai ano nõ anã kanõ,” ixõ Jesús ato yoini. ⁸ Ato askafaito kemanifo: “Maestro, nõko xanĩfofãfe Judea anoxõ mã mia retekeraitafo. ¿Afeskai mĩ afianã ari kapaimẽ?” ixõ yoiãifono, ⁹ Jesús anã ato kemani: “Penata nõ õisharatiro. Xinĩ chaxaino nõ õisharatiro. Nãskax nõ otisikax nõ paketiro. Nãskarifiakĩ pena tii Niospa ea amapaiyai keskara ea tãpimani. Nãskaxõ ea kexeano ã mesetiroma. ¹⁰ Akka fakishi yora kai xafasharayamano otisikax paketiro. Nãskarifiakĩ Nios fe rafeamato tãpisharatiroma afeskax isharatiromãki. Askax fenotiro,” ixõ Jesús ato yoini.

¹¹ Nãnori ato yoita anã Jesús ato yoini iskafakĩ: “Nofe yora Lázaro mã oxakẽ ã mõikai,” ato faito, ¹² a aõxõ tãpimisfãfe nikakaxõ yoinifo: “Ifo,

akka oxakōiax naima. Chipo sharatiro,” fanifo. ¹³ “Nofe yora Lázaro mā oxaki,” Jesús ato fani. Mā Lázaro nafiakē ato tāpimapainima. Nāskakē shinānifo: “Lázaro oxara,” ikaxō tsōakairoko tāpixō. ¹⁴⁻¹⁵ Nāskaxō Jesús ato xafakīa yoini mā Lázaro nakōinano: “Mā Lázaro naki. Nāskax ē inimaikai ē ano ikamano Lázaro naki. Akka mā ea chipo ōitiro ē afara afeskarafaito. Nāskaxō mā ea chanīmara fai. Nāskakē iskaratīa nō Lázaro ano kanō,” ixō Jesús ato yoini. ¹⁶ Ato askafaito nikakata Tomás nā Rafe Naneni nāato Jesúsxō tāpimis fetsafori ato yoini: “Nō kanō nōri afe naxikī,” ixō ato yoini.

Jesús fistichi naafo ato otofatiro

¹⁷ Askata Betania ano nokoxō Jesús nika: “Mā Lázaro naa,” nikani. Mā cuatro nia oxa nikani a maifaitafo mafa kini mēra, Betania ano. ¹⁸ Betania fe Jerusalén chaima ini. ¹⁹ judeofo ichapa María fe Marta ika ano fenifo ato ferarofai fekani, mā āto poi naano.

²⁰ Nāskata Marta Jesús oaito nikai akiki nokoikai kani María pexe mēra nīchifaini. ²¹ Marta Jesúski nokoxō yoini: “Ifo, mī nono ikanokai ēfe exto nakeraitama. ²² Ē tāpia mī iskaratīa afara fetsa mī Nios yōkaito mia axorisafatirokī,” faito, ²³ “Extofi anā otoi kiki,” faito, ²⁴ “Ē tāpia nā namisfo mā mai keyoaino afianā otoxikani. Ēfe extori otoxii,” ixō Marta yoiaino, ²⁵ Jesús kemani: “Eōnoax nā nafo tii otokani. Akka eōnoax niafori. Nā ea chanīmara faax nafiax anā otoxii kiki. ²⁶ Nāskakē ea chanīmara faax anā nanakama. ¿Nāskakē mī ea chanīmara faimē?” faito, ²⁷ “Ēje, Ifo, ē mia chanīmara fai mīmāi Cristokē, Niospa fake. Nō

mia manamis. Akka nõko xinifãferi Cristo manapaonifo. ‘¿Afetĩa na mai ano Cristo oimẽ?’ ikaxõ nõko xinifãfe mia manapaonifo,” Marta fani.

Lázaro mafa kini mẽra maia õi Jesús oiani

²⁸ Nãskata mã yoikĩ xateta, Marta ãfe chiko María yoikai kani. Kaxõ õia a María fe rafeafo oiyakani inifo. Nãskata Marta ãfe chiko María one mẽshanãxõ yoini: “Mã nõko Ifo oakĩ. Mia kenamana, õikofe,” fani. ²⁹ María nikata fininãkafãta kani Jesúski nokoikai. ³⁰ Jesúskaĩ pe xe rasi ano nokoama ini. Nã Marta akiki nokoano Jesús nẽteni. ³¹ Mã María ato fe oiafai kaino a afe oiafaiyaifãfe õinifo. “María poi maia mãnãonoax oiaĩ kai kiki,” ikaxõ chĩfafainifo.

³² María Jesúski nokota ratokonõ mai chachipakefofã yoini: “Ifo, mã nono ikanokai ãfe exto nakeraitama,” María fani. ³³ María oiaito Jesús õini. Judeofori a María fe feafori oiaifãfe Jesús ato õini. Nãskaxõ ato shinãkõini. ³⁴ Nãskaxõ ato yõkani: “¿Fanĩ mã maifaitamẽ?” ato faino, yoinifo: “Ifo, ono nõ akitakĩa õiyopo,” fanifo. ³⁵ Askafaifono Jesús oiani. ³⁶ Oiaito õikakĩ judeofãfe: “Õikapo. Lázaro manoi oiaĩ,” fanifo. ³⁷ Nãskaxõ fetsafãfe yoinifo: “Nã fẽxo sharafaita keskafaxõ, ¿afeskafakĩ nonoxõ Lázaro sharafaitamamẽ?” fanifo.

Jesús Lázaro otofani

³⁸ Nãskata Jesús anã shinãmitsani Lázaro maia ano nokoax. Nã Lázaro maia ano nã kini tokiri efapato fepoafõ ini. ³⁹ Nãno nokoxõ Jesús ato yoini: “Na tokiri aõ fepoa fepekãfe,” ato faito, nikakĩ Marta yoini: “Iskaratĩa mã pisiaki,” faito,

⁴⁰ nikakĩ anã Jesús yoini: “¿Ë mia yoiaito mĩ ea nikaimamẽ? Ea mĩa nikaino Niospa afara shara faito mĩ õitiro,” fani. ⁴¹ Askafaito nikakakĩ fẽpexonifo. Fẽpexonaifono nai foisnĩfofãta Apa yoini: “Epa, ã mia kĩfiaito mĩ ea nikai. Ë mia aicho fai. ⁴² Ë tãpiaki ea mĩa nikafafãimiskĩ. Nãskakĩ ã mia kĩfi na yorafãfe mia chanĩmara fanõfo. Nãskakaxõ ea tãpinõfo ea mĩa nĩchiniki.”

⁴³ Apa kĩfikĩ askafata fãsikõi Lázaro kenani: “Lázaro, kini mẽranoax kãikerafe,” faino, ⁴⁴ Lázaro kãikerani nã aõ rakoitafoya. Nãskaxõ ato yoini: “Na mã aõ rakoita pekakãfe kãisharanõ,” ato fani.

*“¿Afeskaxõ nõ Jesús retetiromẽ?” ixõ shinãnifo
(Mt. 26.1-5; Mr. 14.1-2; Lc. 22.1-2)*

⁴⁵ Nãskata judeofo a María fe feafãfe Jesús Lázaro otofaito õikakĩ Jesús chanĩmara fanifo. ⁴⁶ Nãskafaito õikani atiri fariseofoki chanifokani fonifo. ⁴⁷ Ato yoiãifãfe nikakanax fariseofo fe a Nios ato kĩfixomisfãfe ãto xanĩfofo ichanãnifo. Ichanãkanax yoinãnifo: “¿Nõ Jesús afeska faimẽ? Tsõa atiroma keskara fai kiki. ⁴⁸ Nõ afeskafayamaino keyokõichi chanĩmara fakani kiki. Romano xanĩfokõifo fẽkaxõ noko yoitirofo iskafakakĩ: ‘Mãkai anã xanĩfoma,’ noko fatirofo. Nãskaxõ nõko kĩfiti pexefã noko põtatirofo,” ikanax yoinãnifo. ⁴⁹ Nãskaifãfe Nios ato yoixomis xanĩfokõichi Caifás ato yoini: “Mãfi tatimakõikĩ,” ato fani. ⁵⁰ “¿Mã tãpiamamẽ? na feronãfake fisti a yorafoõnoax naxiai. Nãfi sharaki. Ares fisti natiro nõ nanõma, nõko kaifo fetsafori nanõfoma,” ixõ ato yoini. Chanĩmakõi Caifás yoini a ixiai keskara yoikĩ.

⁵¹ A Caifás yoiã ãa shinãkĩ yoinima. Niospa ãfe shinãmã shinãmanaino yoini. Nios kĩfixomisfãfe ãto

xanĩfokẽ Niospa ãfe shinãmã shinãmanaino, “Jesús judeofonoax naxira,” ixõ yoini. ⁵² Jesús kai judeofo fistiõnoax naima. Mai fetsa ano ikafãferi chanĩmara faafono ato nãxoxii. Nãskata Niospa fake ixikakĩ noinãkõikanax, nã yora fisti keskara ixikaki.

⁵³ Nãskata nã penata judeo xanĩfofofãfe shinãnifo: “¿Afeskaxõ nõ Jesús retetiromẽ?” ikaxõ pena tii shinãpaonifo. ⁵⁴ Mã retepaiyaifono tãpiax judeofo ano anã Jesús kanima. Yorafã rasi ano katar-maroko pe xe fisti rasi ano kani, nã pe xe ãfe ane Efraín ano, tsõa istoma ano. Nã aõxõ tãpimisfo fe nãno iyoni.

⁵⁵ Judeofãfe ãto fista Pascua mã chaima ikaino, yora rasi Jerusalén ano fonifo, Pascua fista aki-fokani. Moisés ãto xinifo yoipaoni keskai akairi ãto chaka soapaikani Nios kĩfiti pexefã mẽra iki-fokani, fista ikamano fonifo. ⁵⁶ Nãskaifono jude-ofãfe Jesús fenanifo. Nãskakanax Nios kĩfiti pexefã mẽra ikinifo. Nãnoax yoinãnifo: “¿Fanĩmẽ Jesús?” ikanax yoinãnifo. “ ‘Nonoxõ Jerusalén anoxõ Jesús fista akiyoirã,’ ¿mã ikimẽ?” ikanax aa ranã yoinãnifo. ⁵⁷ Askakaxõ judeofo ãto xanĩfofo feta fariseofãfe ato yoinifo iskafakakĩ: “Jesús fichixõ noko tãpimakãfe nõ achinõ,” ato fanifo.

12

Kẽromã Jesús shinãkĩ pirofomã ãfe tae pemãkã nachini

(Mt. 26.6-13; Mr. 14.3-9)

¹ Nãskano seis nia Pascua fista mã chaima ikaino Jesús aõxõ tãpimisfo fe Betania ano kayoni. Nãno Lázaro ika ini. Nã Lázaro nakẽ Jesús otofani.

² Nãnoxõ Jesús pimaxikakĩ pĩchanifo, a Jesús fe

foafãferi pinifo. Lázarori ato feta pini. Nã Marta ato pimani. ³ Mã piafono María Jesúski oni ãfe pirofomã sharaya. Oxõ nã pirofomã ãfe tae pemãkĩa nachini. Nãskaxõ ãfe fõo otekere ani. Nãskafaano yorafãfe nã pexe mëra ikafãfe nã pirofomã sharakõi xetenifo. ⁴ Nã Jesúsxõ tãpimis fëtsa nã Judas Iscariote, Simón fake, nã ato achimaxi-aito yoini, ⁵ “Kee. ¿Afeskakĩ na kërromã pirofomã shara potaimë? Ato minixõ kori ichapa fixõ noko inãkerana a afaamaisfo nõ ato inãpanã. Nãskax shara ikerana,” Judaspa fani. ⁶ Anori Judaspa yoifikĩ ato kori inãkeranama. Nã Judasfi yomet-sokõi iniki. Nã Judaspa ãto kori kexexopaoni. Yometsofixõ nãskakë tsõa tãpipaonima. Nã kori fixõ a afaamaisfo ato inãkeranama, nã a kori onekerana. ⁷ Nãskafaito nikakĩ Jesús Judas yoini: “María fekaxtefayamafe. Ë samamashta naito mã tãpixõ ekeki pirofomã nachia,” fani. ⁸ “Nã yora afaamaisfo mato fe ipanakafo. Nãskakë mã ato mëxotaima afarafo inãtiro. Akka êkai mato fe nono mai ano ipanakama, ã mato yoi. Akka na María iskaratĩa ea shara faa,” ato Jesús fani.

Judeofãfe ãto xanĩfofofãfe Lázaro retepainifo

⁹ Nãskata judeofo ichapa rasi Jesúski fenifo, Betania ano ikano mã tãpikanax Jesús fistikai õifekani fenifoma. Lázarori õifekani fenifo. Nã Lázaro Jesús otofaita nikakaxõ õipainifo. ¹⁰⁻¹¹ Nã Lázaro Jesús otofaita nikakaxõ judeofãfe ranãrito anã ãto xanĩfofo tananifoma Jesús fisti chanĩmara fakakĩ. Nãskaifono nã xanĩfofo õitifishkikanax yoinãnifo: “Jesús yafi Lázaro nõ retenõ. Jesús fistima. Lázarori nõ retenõ,” ikanax yoinãnifo.

Jesús nokoni Jerusalén ano
(Mt. 21.1-11; Mr. 11.1-11; Lc. 19.28-40)

¹² Nāskano pena fetsa judeofāfe āto fistatīa yorafā rasi Jerusalén ano fenifo. Jesús nokoaito nikakani nāskax akiki fenifo. ¹³ Epe pei tsoமானax akiki fekani. Nāskakanax fāsikōi tai tai ifenifo iskakani: “¡Sharafinakōi nokoki oi kiki Niospa nīchiano! Israelifo mī nōko xanīfo oi nokoki. ¡Sharafinakōia!” ikaxō fāsikōi yoinifo. ¹⁴⁻¹⁵ Askafaifono Jesús burro fakeshta kamaki tsaoax oni. Niospa meka fētsa keneni iskafakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamaki tsaoax, ikaxō kirika keneni. ¹⁶ Nāskafikē Jesúsnoa yoikī kirika keneni keskara aōxō tāpimisfāfe tāpiyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika keneyoni. Nōko xinifāfe Jesús fakeyoamano a inōpokoai aōnoa yoikakī kirika keneni,” ikaxō Jesúsxō tāpimisfāfe āto ōiti mēraxō shinānifo.

¹⁷ Jesús Jerusalén ano nokoaino nikakakī yorafā rasichi a mananifo ōipakakī. Atirifāfe mā Lázaro nakē Jesús otofaitano ōinifo. Nāskakē mā Lázaro Jesús otofaita ōikanax fetsafoki chaninifo akairi tāpinōfo. ¹⁸ Jesús Lázaro mā nakē otofaita nikakaxō nāfāferi ōipainifo. Nāskaxō fai nēxpakīaxō mananifo. ¹⁹ Nāskakē fariseofo yoinānifo: “Kee. Shinākapo. Nōkai na yorafo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

Griegofãfe Jesús fenanifo

²⁰ Nãskata Jerusalén ano nã yorafã rasi mēra griegofori ato fe inifo judeofãfe ãto fista akaifono.

²¹ Nãnoax Felipe ano fonifo, Felipe yōkai fokani. Nã Felipe Galilea mai anoax fakeni, nã pexe rasi ãfe ane Betsaida anoax. Felipe ano fokaxō griegofãfe Felipe yōkanifo: “Nō Jesús õipai noko efexōfe nō afe yoinãnō,” Felipe fanifo.

²² Askafaifãfe nikaxō Felipe Andrés yoini: “Na griegoforo Jesús fe mekapaikanikiki. Nō Jesús ato yoixonō,” fani. ²³ Yoiaifãfe nikakĩ Jesús ato kemani: “Ëfi samamashta ěfe Epa ari ě kaikai afe xanĩfo ikikai. Akka ěfe Epa ari kayotama ě yorafonoax nayoxii. ²⁴ Akka ě mato tãpimani mã tãpinō. Xiki fero fisti nō fanayamano kãitiroma. Akka nō fanasharano foaikax ěfe fimi ichapa itiro. Nã nō fana ěfe exe fisti payokometiro, akka ěfe kaya yositiro. Nãskarifiai ě matoõnoax nayamakẽ mã efe ipaxatiroma. Eres fisti ě ipaxatiro. ²⁵ Akka ãa fẽtsa shinãi iskai: ‘Niospa ea amapaiyai keskara ě shinãima, ěa ě apaiyai keskara ě shinãi,’ ixō anori shinãi fenotiro. Akka nã iskakĩ shinãi: ‘Ë nono mai ano niyoxō ě apaiyai keskara ě shinãpaima, Niospa ea amapaiyai keskara fisti ě shinãpai,’ ixō shinãi afi Epa Nios fe nipanakaki. ²⁶ Akka a ea yonoxopaikĩ ěfe meka nikakõixō a ě yoiai keskara atiro. Ea Ifofax a ě ika ano nãri efe ipaxatiroki. Ea yonoxomis a ě yoiai keskara ea axõaito ěfe Epa Niospa yoixii iskafakĩ: ‘Aicho. Mĩ ěfe Fake Jesús nikasharamiski. Mĩ fãsi sharakõiki,’ Epa Niospa yoikĩ iskafaxii a ea Ifofamis.

²⁷ “Iskaratĩa ěfe õiti mēra ě shinãimitsai.

¿Ë afeskaimẽ? Akka, ‘Epa, ea ifife ea omiskõimayamanõfo,’ ã faima. Akka ãfe Ëpa ea nĩchini ã ato omiskõixonõ,” ato Jesús fani. ²⁸ Nãskaxõ Jesús Apa yoini: “Epa, eõxõ ato ispafe mĩ fãsi sharaki,” ixõ Jesús Apa yoini. Askafaito nikakĩ nai mẽraxõ fãsikõi Niospa kemani: “Ë mĩõxõ mẽ ato ispa ãmãi afama mĩshti shara fakĩ afianã afama mĩshti ã ato ispai,” ixõ yoini.

²⁹ Nã yorafã rasichi anoxõ nikakani yoinãnifo. Atirifãfe yoinifo: “Mã nai tiri ika,” fanifo. Atirifãfe yoinifo: “Epa Niospa ãjirinĩ Jesús yoia,” ikanax yoinãnifo. ³⁰ Nãskaifono Jesús ato yoini: “Na meka nai mẽranoa mã nikai ea tãpimatama, mato tãpimaxikĩ yoia,” ato fani. ³¹ “Iskaratĩa nã ea Ifo-faifoma Niospa ato omiskõimani. ãto ifori nã yõshi chaka Satanãs nãri ãfe Epa Niospa potaxii anã xanĩfo inõma. ³² Akka ãfi yõra fakekõi. Ea retekaxõ ifi cruz ikakĩ ea mastakaxõ ea fininĩfofãxikani. Ea askafaifono ã yorafo ã ato ifi efe rafenõfo,” ixõ Jesús ato yoini. ³³ Nãnori ato yoini nã ifi cruz ikakĩ mã mastaxiaifono ato tãpimani.

³⁴ Nikakaxõ yorafãfe nãno nixõ yoinifo iskafakakĩ: “Niospa meka sharaõnoa kirikaki kenekĩ yoikĩ iskafanifo: ‘Cristo, nã Niospa nĩchia nĩpanaka nanakama,’ fanifo. Akka, ¿afeskakĩ mĩ noko yoimẽ iskafakĩ?: ‘Na yõra fakekõi retekaxõ ifi cruz ikakĩ mastakaxõ fininĩfofãxikani,’ mĩ noko fai. ¿Akka tsoaõnoa mĩ noko yoimẽ?” fanifo. ³⁵ Askafaifono Jesús ato yoini: “Ë nono ika pena keskara shara. Nãskakẽ ã anã mato fe nono ifãinakama. Ë mato yoiaito nikasharakãfe fenoxikakima. Pena yamaino fakish itiro.

Nāskakē yora fenotiro. Tsōa fakish mēra ōitiroma, fāi kai fenotiro. Nāskarifiai a chaka shināmis fenotiro. Fenokī tāpitiroma afeskax Nios fe rafetiromāki. ³⁶ Ē mato fe iyoano ea Ifo shara fakāfe fenoxikakima. Mā ea nikasharaino ē mato pena keskara shara fatiro, xafakīa mā inō. Ēfi pena keskarakī. Ea Ifo shara fakaxō māri fetsafo pena keskara shara fatiro mātoxō eari Ifo sharafanōfo,” ato Jesús fani. Mā ato yoikī senēfax, nāskax ato makinoax kaitokai anā tsōa ōinima.

Judeofāfe Jesús nikanifoma

³⁷ Yorafāfe ferotaifi tsōa atiroma keskara Jesús fafiaino tsōa chanīmara fanima nā Niospa Fakekōi fiano. ³⁸ Nā Isaías Niospa meka ato yoipaoni. Nāato kirika keneyoni a inōpokoai yoikī. Iskafakī yoini:

Ifo, nō mī meka nō ato yoifiainokai tsōa noko chanīmara faima. Yōra atiroma keskafakī mī ato ispafiaino tsōa tāpiama,
ixō Isaías a inōpokoai yoikī kirika keneyoni.

³⁹ Nāskakē tsōa Jesús nikanima. Askatari afianā Isaías kirika keneni a inōpokoai yoikī iskafakī:

⁴⁰ A nikaiyamaifo Epa Niospa fēxo keskara ato imapakenaka Niospa meka chanīmakōi mā tāpifikaxō tsōa nikayamaito. Niospa ato shinātimafai anā shināsharanōfoma. Nāskakē Niospa meka ōifikakī tsōa shināima āto ōiti kerexkōi fakani mā nikafikaxō. Āto chaka xateaxma ekeki fekanima ē ato fetsa keskara shara fapanā,
ixō Niospa ato yoini. Nānori a Jesús inōpokoai yoikī Isaías kirika keneyoni.

⁴¹ Isaías Niospa shināmanaino Jesús tāpini xanīfo sharakōi ikiyoai. Nāskaxō Isaías Jesúsnoa yoini.

⁴² Judeofāfe xanīfofo atirifāfe Jesús chanīmara fanifoma. Akka atirifāfe chanīmara fanifo. Akka afaa tsōa yoinifoma fariseofoki mesekakī noko potayamanōra ikanax āto ichanāti pexe mēraxō.

⁴³ Yora fetsafāfe ato yoiaito nafo sharakōifora nā yorafāfe atoōnoa meka shara yoiaifono nikapaimisfo. Akka Niospa atoōnoa nafo sharakōira ixō yoiaino fichisharapainifoma.

Jesús mekaōxō nō tāpia nō chakakōifo

⁴⁴ Nāskata Jesús fāsikōi mekainīkafā ato yoini iskafakī: “Nā ea chanīmara fatto ea fisti chanīmara fatama nā ea nīchiniri chanīmara fai. ⁴⁵ Nāskafakīri mā mā ea ōia nā ea nīchiniri mā mā ōia. ⁴⁶ Nono mai ano fakish keskara. Nāskakē ēfe Epa Nios ariax ē nono mai ano ē oni pena keskara ikiyoi. Fakishi tsōa ōitiroma. Akka nā ea chanīmara fatto Epa Nios Ifo sharakōifatiro pena keskara shara ixiki.

⁴⁷ “Mā ēfe meka nikafikaxō ea nikayamaifono ēkai ato omiskōimanima. Akka ē mai ano oni yorafo omiskōimatama ato ifiyoi ē oni efe ipaxanōfo.

⁴⁸ Akka nā iskakī shināi: ‘Ēkai Jesús Ifofapaima, askatari āfe mekari ē nikapaima,’ ixō shināi nā ē mato yoimis keskara nikayamax Nios ari katama omiskōipakenakafo mēra kaxii. Nāskakē ē mato yoiaito mā ea nikayamax mā mai keyoaino mā omiskōipakenaka. ⁴⁹ Ēfe Epa Niospa ea yoia keskara nānorikōi ē mato yoimis. Ēa ē mato yoima. Ēfe Epa Nios nā ea nīchinioxō ē mato yoimis. ⁵⁰ Mē tāpia Epa Niospa yoia keskara chanīmara faax mā nīpaxatiro. Nāskakē, ‘A ē ato yoimis keskara nānori

ato yoife, 'Ēfe Epa Niospa ea famis," ixō Jesús ato yoini.

13

Jesús aōxō tāpimisfo āto tae chokapakeni

¹ Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofaafo nā nono mai anoafō ato noini. Mā atoōnoax nakī ato noikōini.

² Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanás yōshi chaka nanetani. Nā Simón fetsa āfe fake Judas Iscariote. Nā Judas mēra niafaka nanexō shināmani iskafakī: "Ato tāpimafe afeskaxō na Jesús achitirofomāki," ixō Satanás shināmani.

³ Akka Epa Niospa āfe Fake yoini: "Nā nai mēranoafoya nā mai anoafori mī ato yonomatiro. Mī āto xanīfo," ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini. ⁴ Nāskata pikī keyotama Jesús fininākfā āfe rapati pekata āfe rakotinī pinixemeni.

⁵ Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otekere apani āfe rakotinī.

⁶ Ato askafapakī Pedrori āfe tae chokapaiyaito yoini: "Ifo, ¿afeskakī mī ēfe Ifo fixō mī ea fāka ochopaimē?" faito, ⁷ Jesús kemani: "Na ē mato fāka ochofai mī tāpiama. Akka mī chipo tāpixii," faito, ⁸ anā Pedro kemani: "Maa, Ifo, mīakai ea fāka ōchopakenakama," Pedro faito, anā Jesús kemani: "Ē mia ōchoyamainokai mī efe rafetiroma," fani. ⁹ Askafaito nikakī Pedro yoini: "Ifo, taekis

ea chokakima ěfe mifikiri ea afe, ěfe mapokiri ea mǎchofe,” faito, ¹⁰ “Nǎ rama yora nashiax ǎfe yora choshtanatiroma, ǎfe tae fisti choshtanatiro. Nǎskakē nō tae fistiki nō chokatiro. Akka keyokōi mǎ choshtama, ranāri mǎ shara,” ato Jesús fani. ¹¹ Nǎnori ato yoini mǎmǎi tǎpixō fatoto ato achi-maximǎkai.

¹² Mǎ ato ōchopaketa ǎfe rapati safeni. Mǎ ǎfe rapati safeta afianǎ tsaopakekafǎni. Nǎskaxō ato yoini: “ǎMǎ mǎ tǎpamē na ē mato fǎka ōchofaito?” ato fani. ¹³ Nǎskaxō anǎ ato yoini: “Mǎfi, ‘Maestro,’ mǎ ea fayanǎ, ‘Ifo,’ mǎ ea famis. Chanǎmakōi ěmǎi mǎto Ifo ita ē mǎto maestrori.” ¹⁴ Askata anǎ ato yoini: “Ě mǎto Ifokǐ, askatari ē mǎto maestrokǐ ē mato fǎka ōchopakea oa mǎto ina keskarakōixō. Akka nǎ ē mato fǎka ochopakea keskariai mǎ ranǎ fǎka ōchokome faatanǎkǎfe oa mǎto inafō keskarax. ¹⁵ Ě mato ōimana keskariai mǎri askakǎfe,” ato fani. ¹⁶ “Ě mato chanǎma yoi. A yonoxomistokai ǎfe xanǎfo finōtiroma. Akka ē mato nǎchia mǎ fetsafo ěfe meka yoinō. Nǎskafixokai fetsafo ěfe meka ato yoifikǐkai mǎ ea finōama. Ě mato fǎka ōchomis oa ē mato yonoxomis keskaraxō. Nǎskaxō, ‘Nō fetsafo finōa, nō ǎto inama,’ iyamakǎfe,” ato Jesús fani. ¹⁷ “Na ē mato yoiaito mǎ nikakōiax, nǎskax mǎ fǎsi inimakōitiro.

¹⁸ “Nǎskakē ē mato yoi, akka keyokōiōnoa ē mato yoima. Ě tǎpia fatomǎkǐ ē katoa a nofe kai, askatari a nofe kaima. Nǎskakē ē mato yoi, eōnoa Niospa meka yoikǐ kirika keneyonifo nō nikakǐ nō chanǎmara fatiro. Iskafakǐ kirika keneyonifo, Niospa meka: ‘A feta piai fētsa ea ōikaspakǐ ea chakafaxii,’ ixō kirika keneyonifo. Chanǎmakōi mǎ

õifainaka,” ato Jesús fani. ¹⁹ “Ea askafayoamano ã mato yoiyomis. Akka nã ã mato yoiã keskara ea askafafono mã ea õikĩ, nãskakẽ mã ea chanĩmara fatiro. ²⁰ Ë chanĩkima mato yoi ã mato nĩchi mã ãfe meka ato yoitanõ. Mã ato yoiãito nikakaxõ eari nikakani. Nãskatari ea chanĩmara fakaxõ nã ea nĩchiari chanĩmara fakani,” ixõ Jesús ato yoini.

*“Mã fẽtsa ea ato achimaxii,” ixõ Jesús ato yoini
(Mt. 26.20-25; Mr. 14.17-21; Lc. 22.21-23)*

²¹ Mã yoikĩ keyota Jesús fãsi shinãmitsakõini. Nãskaxõ xafakĩakõi ato yoini: “Ë chanĩma mato yoi. Fatora mã fẽtsa ea mã ato achimaxii,” ato faito, ²² nikakani fesenãkefainifo tãpikanaxma. ²³ Afe ketaxamei tsoa Jesús fichisharapaikõini. ²⁴ “Fatora mã fẽtsa ea mã ato achimaxii,” ato faito nikakĩ a Jesús fe ketaxamei tsoa Pedro fenãmãshita yõkani: “Tsoaõnoa yoimãkai, yõkafe,” fani. ²⁵ Nãskafaito nikakĩ a Jesús fe ketaxamei tsoato chaimashta fani yõkaxikĩ: “Ifo, ¿tsoaõnoa mĩ yoimẽ?” faito, ²⁶ Jesús kemani: “Na pãa tore pishta nami ene mẽra mechanafaxõ ã inãito nãatofi ea ato achimaxii kiki,” Jesús fani. Nãskafaxõ nami ene mẽra pãa mechanafaxõ Judas Iscariote Jesús inãni, Simón fetsa ãfe fake. ²⁷ Jesús pãa mechanafaxõ Judas inãino Judas mẽra Satanás chaka nanerisatani. Nãskaxõ Jesús Judas yoini: “Nã mĩ apaiyai keskara farisafafe,” fani.

²⁸ Nã tsoakaxõ piaifãfekai tãpinifoma afeska fakĩ askafaimãkai. ²⁹ Atirifãfe shinãnifo: “Jesús Judas nĩchiaito Judaspa afara fitanõ Jesús nĩchi fista ayanã pixikĩ,” ixõ shinãnifo. Akka atirifãferi shinãnifo iskafakĩ: “Jesús Judas nĩchia a afaamaisfo

kori inātanō,” ixō shinānifo. Nā Judaspa āto kori kexexomis ini. ³⁰ Nāskax Judas koshi kani mā fakishaino.

Jesús Ifofamisfo noinā faatanātirofo

³¹⁻³² Nāskata mā Judas ato makinoax kaano Jesús ato yoini: “Iskaratīa ē naino Epa Niospa mato ōimani ēmāi āfe Fake sharakōikē. Nāskafīax ēfi yōra fakekōi. Ē afama mīshti akaito ōikaxō, ‘Epa Nios fāsi sharara,’ faxikani. Nāskakē mā tāpitiro ēmāi Niospa Fakekōikē a keskara sharakōi.

³³ “Ēfe fakefāfe, ēkai anā nono mato fe ifīinakama. Mā ea fenaxii. Ē judeofo yoita keskafakīri ē matori yoi. Ē kai arikai mā katiroma. ³⁴ Ēfe meka fenashara ē mato yoikai, noināi finakāfe. Nā ē mato noīai keskariai māri noinā faatanāsharakāfe. ³⁵ Mā noināiyaito yorafāfe ōinōfo mā eōxō tāpimiski,” Jesús ato fani.

“Ē Jesús ōimisma,’ Pedro ixiaino,” Jesús ato yoini (Mt. 26.31-35; Mr. 14.27-31; Lc. 22.31-34)

³⁶ Nāskata Pedro Jesús yōkani: “Ifo, ¿faki mī kaimē?” faito, nikakī Jesús kemani: “Ē kai arikai iskaratīa mī efe kayotiroma. Chipō mī kaxii,” faito, ³⁷ anā Pedro kemani: “¿Afeskai iskaratīa ē mefe katiromamē? Mē iskaratīa itipinīshara mīōnoax naxikī,” faito, ³⁸ anā Jesús kemani: “¿Mī chanīmamē? ¿Mā mī itipinīsharamē naxikī?” Jesús fani. Nāskaxō anā yoini: “Na fakishi takara keoyoamano mī ea iskafai: ‘Ēkai Jesús ōimisma,’ ixō mī ato yoi tres fakī,” Jesús fani.

14

Jesús fai keskara. Aõnoax nõ Nioski nokotiro

¹ Anã Jesús ato yoini: “Ëfe fakefãfe, mãto õiti fekaxtefayamakãfe. Nios chanĩmara fata, eari chanĩmara fakãfe. ² Ëfe Epa ika ano pexe ichapa sharakõifo. Ë mato itipinĩsharafaxõi kaikai. Askarayamakẽ ã mato yoikerana. ³ Ë kaxõ ã mato itipinĩshara faxõikai. Afianã oxõ ã mato ifiyoxii, a ã ika ari mato iyoxiki ari mã efe ãpaxanõ. ⁴ Mã mã fai tãpiaki a ã kai ari,” ato faito, ⁵ Tomás kemani: “Ifo, nõkai a mã kai ari tãpiama, afeskaxõ nõ fai tãpitiroma,” faito, ⁶ Jesús kemani: “Ëfi nã fai keskaraki. Ëfi chanĩmismaki. Eõnoax yorafo nãpaxatirofoki. Tsoakai ãfe Epa ika ano nokotiroma. Eõnoax fisti ãfe Epa ari nokotirofo.

⁷ “Ea tãpikõixõ ãfe Epari mã tãpikõitiro. Akka iskaratĩa mã ãfe Epa tãpikõikai. Nã mã ea õiai keskarari mã ãfe Epa mã õi,” ato Jesús faito, ⁸ Felipe kemani: “Ifo, noko Epa Nios õimafe. Mã noko Epa Nios õimanaino nõ inĩmakõitiro,” faito, ⁹ Jesús kemani: “Felipe, afetĩakai ã mato fe imisma. ¿Afeskakĩ mã ea tãpiyomismamẽ? Ea õikĩ ãfe Epari mã mã õi. ¿Afeskakĩ: ‘Ea Epa õimafe,’ mã ea faimẽ? ¹⁰ Ëfi ãfe Epa fe fisti keskarakõiki. ¿Nã mã chanĩmara faimamẽ? A ã mato yoiai ãa ã mato yoima ãfe Epaõnoa ã mato yoi. Epa Niospa nã apaiyai keskara ea famai efe imis. ¹¹ Ë mato yoi ãfe Epa efe rafea ãri ãfe Epa fe rafemiski. Nãskakẽ ea chanĩmara fakãfe. Nã tsõa atiroma keskarafori ã famis nã õixõ ea chanĩmara fakãfe.

¹² “Chanĩmakõi ã mato yoi. Nã ea chanĩmara faxõ nã ã akai keskarari faxii. Ëfe Epa ari kaxõ a ã

aka keskaramaroko finõmainĩfofã axikani. ¹³ Afara ěfe aneõxõ ěfe Epa mã yõkaito ě mato axoxii, eõxõ Epa Nios sharara fanõfo. ¹⁴ Afara fetsa ěfe aneõxõ mã Epa Nios yõkaito ě mato axotiro,” ixõ Jesús ato yoini.

“Epa Nios āfe Yõshi Shara ě matoki nĩchixii,” Jesús ato fani.

¹⁵ Anã Jesús ato yoini iskafakĩ: “Ea noikõikĩ nã ě mato yoiai keskai ikãfe. ¹⁶ Ě Epa Nios mato kĩfixoni mato fetsa nĩchixonõ, nãato mãto õiti fepeaxoyonõ. Nã Niospa Yõshi Shara, nãfi chanĩmismaki. Mato fe ipanaka. ¹⁷ A nikayamaifãfe õitirofoma. Askatari tãpitirofoma. Akka mãfi mã mã tãpimiski mato femãi ikẽ. Nãskatari mãto shinã mẽra mato fe ika.

¹⁸ “Akka ěkai mato fe ikima. Askafixõ ě mato potaima. Ě matoki anã oxii. ¹⁹ Ě anã nono ikima. A ea Ifofaifãfema anã ea õikanima. Akka mã ea õixii, ě niano. Nãskakẽ mãri efe nĩpanaka. ²⁰ Naax ě otoaito mã ea tãpitiro ěmã Epa Nios fe nĩpanakakẽ. Nãskarifiã mã efe ixii. Ěri ě mato fe ixii. ²¹ Nãskakẽ ě mato yoiaito mã ea nikakõixõ mã ea fãsi noi. Ea noixori ěfe Epari mã noi. Askatari ěri ě mato noi. Nã ě shinãi keskara ě mato tãpimani,” ixõ Jesús ato yoini.

²² Nãskaito Judas fetsa, Judas Iscariotema yõkani: “Ifo, ¿afeskakĩ a mia Ifofaifoma mã ato tãpimatama noko fisti mã tãpimanimẽ?” ixõ yõkaito, ²³ Jesús kemani: “Ea noikakĩ nã ě mato yoiai keskara ea nikakõitirofo. Ěfe Epa ato noiaino ěri ato noi. Nãskax nõ ato fe rafetiro. ²⁴ Ea noiyamakaxokai ě yoia keskara ea nikakanima. Na meka mã nikai

ēfe mekama, ēfe Ēpa meka ē mato yoi. Nā ea nīchinito āfe meka.

²⁵ “Mato fe iyoxō ē mato yoiyofafāina. ²⁶ Nāskaxō Epa Niospa āfe Yōshi Shara matoki nīchi eōxō mato fe ixō mātō ōiti mato inimamasharaxonō. Keyokōi mato tāpimani. Nā ē mato yoia keskara mato shināmani.

²⁷ “Ē mato makinoax kakī ē mato ōiti fepeax-osharafāinikai. Akka nā ea nikaifāfema mato ōiti fepeaxotirofoma, ē fistichi ē mato axotiro. Nāskakē shināchakayamakāfe. Rateyamakāfe. ²⁸ Ē mato yoiaito mā mā nikai ē mato makinoax kaikai. Askafīax ē anā matoki oxii. Ea noikōi^{ax} mā ekeki inimatiro ēmāi ēfe Epa ari kaino, ēfe Epamāi ea finōkōikē. ²⁹ Nā ē mato rama yoiai keskaito mā ea chanīmara fatiro. Mē mato yoi a ixiai mā ōixō mā ea chanīmara fanō.

³⁰ “Ē mato mēxotaima yoipaifiaino nā yōshi chakafāfe āto xanīfo Satanās chaka ekeki oi. Askafixō ea afeska fatiroma. ³¹ Akka ē Epa Nios fāsi noikōi. Nāskakē nā ea yoiai keskai ē akōini. Nāskaxō keyokōichi ea tāpikani ē fāsi aō noiaito. Fininīfofākāfe. Nonoax nō kanō,” ato fani.

15

Jesúsi fana āfe kaya keskaraki. Akka nā fana pōya keskarāfo a Ifofamisfo

¹ Anā Jesús ato yoini iskafakī: “Ēfi uva āfe kaya keskarakōiki. Akka ēfe Epa nā uva āfe ifo keskara. ² Akka mā na uva āfe pōya keskarāfo. Nā uva pōya fetsa fimiyamaito āfe ifāfe mexte-tiro potaxikī. Akka nā uva āfe pōya fimiyāfo nā āfe teshpa mīshti ifāfe xatetiro. Nāskax uva pōya

sharayakōi itiro fimi sharaya ixikī. ³ Nāskarifiakī mā ēfe meka nikaxō mā mātō chaka mā potax mā isharaxii. ⁴ Emakinoax paxkayamakāfe. Efe rafekāfe, nā ē mato fe ika keskariai. Akka uva pōya fisti fimitiroma āfe kayamaisax. Nāskarifiakī mā ēfe rafexoma nā ē mato amapaiyai keskara mā atiroma.

⁵ “Ēfi nā uva āfe kaya keskarakī. Akka mā na uva āfe pōyafō keskara. Akka nā efe rafekōiai ēri afe rafekōiaino ea keskarakōiri itiro. Ē mato fe ikamano mā afaa afeskatiro. ⁶ Uva āfe pōya chaka fimimais nō mextexō potatiro. Nāskaxō mā xinī tsasifaano nō ichafaxō nō kofatiro. Nāskarifiyai nā efe rafekaspaifo nāfo chiifā mēra fokani.

⁷ “Akka mā efe rafekōixō ēfe meka mā nikakī mātō ōiti mēraxō mā shinākī mā afarashta fapaikī ēfe Epa Nios mā kīfaiito mato axōi. ⁸ A ē mato amapaiyai keskara mā akī nāskax eōxō tāpimis mā iki. Mā askafaito ōikakī Epa Nios tāpitirofo Epa Niosmāi fāsi finakōikē. ⁹⁻¹⁰ A Epa Niospa noikōiai keskafakī ēri mato noikōi. Epa Niospa ea yoiai keskara ē afafāini. Akka ē afe imiskē ea noifafāini. Nāskafakīri nā ē mato yoiaito mā atiro māmāi efe ixō. Nāskakē ē mato noifafāini.

¹¹ “Anori ē mato yoi ē inimai. Nāskarifiyai māri mā inimanō. Ē mato yoiaito mā anori akī mā tāpitiro ē mato noiaino. ¹² Iskafakī ē mato yoi: Ē mato noiai keskai māri noinākāfe. ¹³ Nō fetsafo fe rafekōiax nō aō noikōiax nō aōnoax natiro. A mā nakī noiai keskarakōi tsōa finōtiroma. ¹⁴ Ē mato yoiai keskara aki mā efe rafemis mā itiro. ¹⁵ Akka a mato fe rafea mā tāpimatiro a mā shināi keskara. Nā ēfe Epa ea yoimis keskara ē matori tāpimani

māmāi efe rafeano. Nāskakē ea yonoxomisfora ĕ anā mato faima. Efe rafeafora ĕ mato faxii. ¹⁶ Mā ea ifiyamafiaino ĕ mato ifini ea keskara mā inō mātōxō fetsafāferi ea chanīmara fanōfo. Nāfāfe ea Ifofapanakafo efe ipaxakakī. Nāskaifono mā afarashta ĕfe Epa Nios ĕfe aneōxō mā yōkaito mato axosharaxii. ¹⁷ Nā ĕ mato yoiai keskai noinākāfe,” ixō Jesús ato yoini.

Jesús Ifofamisfo ato noikaspakani

¹⁸ Anā Jesús ato yoini iskafakī: “Anā ĕ mato yoi mato noikaspayokanima. Akka ea noikaspayokani. Mato iskaratīa noikaspafiaifono mā tāpitiro taefakī ea noikaspakani. ¹⁹ A ea Ifofaafoma fe mā ato fe rafeaito mato noikeranafo. Aa ranā noināifo keskari fakī matoro noikeranafo. Akka mā kai ato keskarama. Ē mato ifini a ea Ifofaifoma keskara mā inōma. Akka nā ea Ifofaafāfema mato noikaspakani. ²⁰ Nā ĕ mato yoiai keskara shinākāfe. Ē mato yoi iskafakī a yonoxomistokai āfe ifo finōtiro ma. Akka ea omiskōimakani matoro omiskōimaxikani. Akka a ĕ ato tāpimana nikakaxō matoro nikaxikani mā ato yoiaito. ²¹ Akka mā ea Ifofaito, nā ea amisfo keskafakakī matoro askafaxikani. Akka a ea nīchini tsōa tāpiama. Nāskaxō mato chakafaxikani.

²² “Ē atoki oyamaxō Niospa meka ĕ ato yoiyamaito tsōa tāpikeranafoma. Akka Niospa meka pishta tsōa nikayomisma afara chakafamisfo. Nāskax āto chaka atoō neama. Nāskafiaifono Niospa meka ĕ ato yoixiki ĕ oni. Nāskakē tsōa iskaratīa iskatiro ma: ‘Tsōa ea Niospa meka yoia ma.’ Askatari: ‘Ē afaa chakafamisma,’ itirofoma. Mā nikafikatsaxakakī āto chaka xateafoma.

Nāskax āto chaka atoõ nea. ²³ Ea noikaspayanã ěfe Epari noikaspakani. ²⁴ Niosxõ tsõa atiroma keskara ě ato ispamis. Askafikaxokai tsõa āto chaka xateafoma. Tsõa atiroma keskara ě feito õifikakĩ ea nikakanima. Nāskax shara ikanima. Akka ě afarafo shara fayamaito ea tãpikeranafoma. Nāskax ato chaka atoõ nekeranama. Akka ě afarafo shara feito mã õifikaxõ ea noikaspayanã ěfe Epari noikaspakani. ²⁵ A Niospa meka yoikĩ kirika kenenifo nẽ askakõi. Niospa meka yoikĩ eõnoa kirika kenenifo iskafakakĩ: ‘Ĕ afara chakafayamafiakẽ ea noikaspakani,’ ixõ eõnoa yoikĩ kirika kenenifo.

²⁶ “Matori noikaspaifono ěfe Epa Nios arixõ āfe Yõshi Shara ě matoki nĩchixii. Nãato mato õiti fepeaxosharanõ. Nãfi chanĩmakõikĩ eõnoa mato yoixii. ²⁷ Ĕ yorafo Niospa meka ato yoikĩ taefani. Nāskax mã efe imiski. Nāskarifiakĩ mãri eõnoa tãpixõ mã ato yoitiro.

16

¹ “A mã omiskõixiai ě mato yoiyoni mã iskakĩ shinãnõma: ‘¿Afeskai Jesús ěfe Ifo fiano ě omiskõimẽ?’ ixõ mã anori shinãkĩ mã ea potapaixii, anãkai mã ea chanĩmara faxima. ² Tãpikãfe. Mãto kaifãfe nã ea Ifofaafãfema mato potaxikani mã anã āto ichanãti pexe mẽra ikinõma. Ĕ mato yoikõi anã shinãshakanima. Fakirira shinãkani iskakakĩ: ‘Nã Niospa apaiyai keskara nõ faxõi. Nã Jesús Ifofaafõ nõ retei,’ ixõ anori shinãkani. ³ Ĕfe Epa tãpiafoma eari tãpiafoma. Nāskakaxõ mato chakafaxikani. ⁴ Akka nã mã ea Ifofakĩ taefanitã mã omiskõixii ě mato famisma,

ẽ mato fe ifiaxokai ẽ mato afaa yoimisma. Akka iskaratĩa ẽ mato yoi. Nãskakẽ mã mato omiskõimanaifono mã shinãxii nã ẽ mato yoimis keskara,” Jesús ato fani.

Niospa Yõshi Sharapa noko shinãmatiro

⁵ Anã Jesús ato yoini iskafakĩ: “Èfe Epa ea nĩchini. Iskaratĩa ẽ anã akiki kai. Akka mã, ‘¿Faki mĩ kaimẽ?’ mã ea faima. ⁶ È mato yoiaino mã shinãmitsai. ⁷ È mato yoikõi, ẽ mato maki-noax kaano mã shara ixii. Akka ẽ mato maki-noax kayamaino Niospa Yõshi Shara matoki oima. Nãskakẽ mãto õiti mato fepeaxoyoima. Nãskafiano ẽ mato makinoax kaxõ èfe Yõshi Shara ẽ matoki nĩchixii. ⁸ Nã èfe Yõshi Sharapa nai mēranoax oxõ a ea Ifofaafoma ato yoixii iskafakĩ: ‘Mã mã afarafo chakafamiski,’ ato faxii. Nãskatari a Niospa fichipaiyai ato tãpimaxii. Nãskaxõ a Nios Ifofaafoma ato yoixii iskafakĩ: ‘Mã mã afarafo chakafamiski, nãskakẽ mã omiskõi,’ ato faxii. ⁹ Nã ea Ifofaitoma afara chaka shinãi. Nãskakẽ èfe Yõshi Sharapa a afara chakafamis ispayoxii. ¹⁰ Èfi nã èfe Epa ea amapaiyai keskara ẽ amiski. Nãskax èfe Epa ari ẽ kai anã ea õinõfoma. Nãri Niospa Yõshi Sharapa ato tãpimaniyoxii. ¹¹ Nãskatari Niospa Satanás omiskõimaniyoxiai Niospa ãfe Yõshi Sharapa ato tãpimaniyoxii, nã Satanás ãto xanĩfo.

¹² “È mato meka ichapa yoipaifiaitokai mã tãpitiroma. ¹³ Nãskafikẽ Niospa Yõshi Shara matoki oxõ a Niospa ãfe meka chanĩmakõi mato tãpimaxii. Nãfi chanĩmisma. Akka ãfe meka mato yoitama nã èfe Epa shinãmanai anori mato tãpimaniyoi. Nã afarafo afeskara ixiai mato tãpimaniyoi. ¹⁴ Nãato

eōnoa yoisharakōixii. Nāskakē nā ē mato yoimis keskara Niospa Yōshi Sharapa mato tāpimaxii. ¹⁵ Nā ēfe Epanāfori ēfenāfori. Nāskakē nā ē yoiai keskara ēfe Epa āfe Yōshi Sharapa mato tāpimaxii,” ixō Jesús ato yoini.

Jesús aōxō tāpimisfo shināmitsafikanax chipo ini-maxikani

¹⁶ Anā Jesús ato yoini iskafakī: “Akka ēkai anā mato fe nono samarakaima. Mē ēfe Epa ari kai. Nāskakē mā ea ōiyoima. Nāskafiax anā ē samamashta oaito mā ea ōixii,” aōxō tāpimisfo Jesús ato fani.

¹⁷⁻¹⁸ Ato askafaito nikakani yoinānifo: “¿Afeskakī, ‘Ēfe Epa ari kaito mā anā ea ōiyoima,’ noko faimē? ‘Afianā ē oaito mā ea ōixii,’ noko fai. Na noko yoiai keskarakai nō tāpiama,” ikanax yoinānifo.

¹⁹ Nāskakaxō yōkapaiyaiāfē Jesús ato tāpini. “¿Na ē mato yoiai keskara mā tāpiamax mā yoinōnāimē?” ato fani. ²⁰ “Ē mato xafakīa yoinō. Mē omiskōiaino a ea Ifofaafoma fāsi inimakani. Akka māfi ea shināi mā oiai. Mā ea shināi oiafiāx chipo mā ekeki inimaxii. ²¹ Akka mā kēro fake kākī pae metiro. Nāskax mā fake kākīxō anā pae metiroma māmāi āfe fake kākīax. Nāskax inimasharakōitiro māmāi āfe fake kākīsharax. ²² Nāskarīfai ē mato makinoax kaino mā oiai omiskōixii. Nāskax ē anā chipo matoki oaino mā inimakōixii. Tsōakai mato xatematiro ma mā ekeki inimaito.

²³ “Ē naax ē otoax ē anā mato fe iyamaino mā anā afara mā ea yōkatiroma. Akka ēfe aneōxō mā Epa Nios yōkatiro. Afarashta ēfe aneōxō mā Epa Nios yōkaito mato axoxii. ²⁴ Ēfe aneōxokai ēfe Epa mā yōkayomisma. Akka ē naax otokē nāskakē ēfe

aneõxõ ãfe Epa mã yõkatiro. Mã yõkaito ãfe Epa mato inãxii. Mato inãino mã fãsi inimakõixii,” ixõ Jesús ato yoini.

Jesús keyokõi finõa

²⁵ Anã Jesús ato yoini iskafakĩ: “Ë mato meka fetsafaxõ yoiaito mã tâpiyomisma. Ëkairoko xafakĩa mato yoiaito mã tâpipanã. Akka iskaratĩa xafakĩa ã mato yoi Epa Niosnoa mã tâpinõ. ²⁶⁻²⁷ Nãskaxõ mã ea noi. Ëmãi Nios ariax matoki onikẽ mã mã ea chanĩmara faa. Nãskakẽ Epa Niospa matori noikõi. Akka, ‘Ë mato makinoax kakĩ anã ã mato Epa Nios kĩfixoni,’ ã mato faima. Mã mã yõkaxii ãfe aneõxõ. ²⁸ Ë Epa ariax nono mai ano oni. Nãskakẽ iskaratĩa nono mai anoax ãfe Epa ari ã kai,” ixõ ato Jesús yoini.

²⁹ Ato askafaino aõxõ tâpimisfãfe kemanifo: “Aicho, iskaratĩa xafakĩakõi mã noko yoikai. A mã noko taefakĩ yoiaito nõ tâpiyoitama. Anã meka fetsafaxõ mã noko yoima. ³⁰ Iskaratĩa mã nõ tâpia keyokõi mã tâpikõia. Nõ mia yõkapaiyaito mã noko tâpitiro. Nãskakẽ mã Nios ariax onikẽ nõ mia chanĩmara fai,” ixõ yoiaifãfe ³¹ Jesús anã ato kemani: “¿Chanĩmamẽ mã mã ea chanĩmara faimẽ?” ato fani. ³² Nãskaxõ anã ato yoini: “Chipõ mã emakinoax mã paxkakãinikai. Mã fakirira kai. Chanĩma, iskaratĩa mã emakinoax mã fakirira kai. Tsoakai efe nẽteima. Mã askafiainokai eres ã nẽteima. Ëfe Epa fe ã nẽtei. ³³ Nã ã mato yoi mãto õiti shara inõ. Akka nã ea chanĩmara faafoma fe mã nono nãmã nẽtei. Nãskakẽ mato omiskõimafiaifono shinãchakayamakãfe. Ë Satanás

yafi nã ea chanĩmara faafomafo ã ato finõkõia. Nãskakẽ ã mato kexesharatiro,” Jesús ato fani.

17

Aõxõ tãpimisfo Jesús Epa Nios ato kĩfixoni

¹ Nãskata Jesús nai foisnĩfofã Apa yoini: “Epa, iskaratĩa ã naano ato tãpimafo ã mĩ Fakekõiki. Mĩ ato tãpimanaino ãri ato tãpimatiro mĩ fãsi sharakõi. ² Mĩ ea nĩchini ã ãto xanĩfo inõ. Nãskaxõ mĩ ea ato inãni ã ato imasharapakexanõ. ³ Meres fisti mĩ Nioskõi. Akka ãfi Jesucristo nã mĩa nĩchini. Nã noko tãpiafo nãfo nipanakafo.

⁴ “Ë nono mai anoxõ afarafo ã ato ispa, mĩmã sharafinakõikẽ. Nã mĩa yoiai keskara mẽ aka. ⁵ Nõ mai onifamatai ã mia keskara xanĩfo shara iyopaoni. Nãskakẽ iskaratĩa ã mefe xanĩfo inõ ea xanĩfo imafe a ã ipaoni keskara.

⁶ “Nono mai anoa yorafo mĩ ea ato minini ã ato tãpimanõ mĩ afo keskaramãki. Nã mĩnãfofiano mĩ ea ato minini. Mĩ meka nikakõinifo. ⁷ A mĩ ea yoia keskara ã ato yoimis. Nãfo mã tãpikõiafo. ⁸ A mĩa yoiai keskara ã ato yoiaito ea chanĩmara fakõikani. A ã mia ariax oniri mã tãpiafo. Chanĩmara fakani a ea mĩa nĩchini.

⁹ “Ë mia ato kĩfixõfafãini. Akka a ea chanĩmara faafoma ã mia ato kĩfixonima. Nã ea mĩ ato mininiõxõ ã mia kĩfifafãini. Ë mia ato kĩfixõfafãini nãfomã mĩnãfokẽ. ¹⁰ Akka nã ãfenãfori mĩnãki. Nã mĩnãfori ãfenã. Nãskaxõ nã ea chanĩmara faafoõxõ fetsafãferi tãpitirofo ã sharakẽ.

¹¹ “Ëkai anã na mai ano ikima. Ë mikiki kai. Akka nã mia Ifofaafofi nono na mai ano nẽtekani. Epa, mĩ fãsi sharaki. Ato kexesharafe. Mĩ aneõxõ

ato kexesharafe. Nã mĩ ea inãni tii ato kexesharafe. Akka nõfi fisti keskaraki. Nãfori nofe fisti keskara inõfo. ¹² Ë ato fe iyoxõ ã ato kexeshara. Mĩoxõ ã ato kexeshara, ã fato fenoama. Akka nã Satanás ãfe fake fisti ã fenoa. Nã mĩ meka yoikĩ kirika keneyonifo keskarax nã fisti mã fenoa.

¹³ “Iskaratĩa ã mia ari kai. Ë kayoxoma ã ato yoiyoi nã ã ikai keskariai akairi inimakõinõfo. ¹⁴ Nã mĩ yoiai keskara mẽ ato tãpimani. A mia chanĩmara faafãfema ato noikaspakani, miamãi Ifofaafono. Nãskakẽ ato noikaspakani. Nãskakẽri ãrikai ato keskarama. Akka eari noikaspakani.

¹⁵ “Akka ã mia yoima na mai anoa mĩ ato ifinõ. Akka ã mia yoi na mai anoa mĩ ato kexesharanõ Satanás chakata ato afeska fanõma. ¹⁶ Nã mia Ifofaafo a mia chanĩmara faafomafo fe, ato fe rafetiroma. Ërikai ã ato fe rafetiroma. ¹⁷ Mĩ meka chanĩmakõi. Mĩ meka ato sharafafe mia keskara shara inõfo. ¹⁸ Ea mĩ mai ano nĩchini ã mĩ meka ato yoinõ. Nãskarifikĩ ã yorafo nĩchi mĩ meka shara ato yoitanõfo. ¹⁹ Mĩa ea yoia keskara ã akaino nããferi askari fanõfo.

²⁰⁻²¹ “Ëkai ato fistiõxõ kĩfifafãinima. Nã ea Ifofaafãfe ato yoiaifono nikakaxõ ea Ifofaxikani. Nãskakẽ ã mia ato kĩfixõfãfãini nã nõ shinãi keskara fisti shinãnõfo. Mĩ efe imis keskai nãfori nofe inõfo. Nõ ato fe tanaima niaito õikakĩ a ea chanĩmara faafãfema akairi chanĩmara fanõfo mĩ ea nĩchini. ²² Mĩ efe imis keskai ãri ato fe imiski. Nã nõ shinãi keskarafõ akairi shinãnõfo. ²³ Mĩ efe ika keskarari ãri ato fe ikaki. Akka nã mĩ shinãi keskarafõ nõri shinãtiro. Mĩ õiti keskara nõ itiro. Akka mĩ ea atoki nĩchini. Nã mĩ ea noiai keskari fakĩ nãfori mĩ ato noikõi. Mĩ askafaino nã ea chanĩmara faafãfema tãpitirofo.

24 “Epa, nã yorafo mĩ ea inãfo efe inõfo mĩ ika anoa mia keskara shara ea õinõfo. Mĩ mai onifay-oxoma mĩ ea noiyopaoni. 25 Epa, mĩ fãsi sharakõi. Nã ea chanĩmara faafãfemakai mia tãpiafoma. Akka ã mia tãpikõia. Mĩ ea nĩchini nã efe ikafãfe mã tãpiafo. 26 Mĩ afe keskaramãki mẽ mia ato tãpimamis nã mĩ ea noiai keskari fakĩ, nãfãferi fetsafo noikõinõfo ã ato fe ikano. Askatari ã ato õimafafãini,” ixõ Jesús Apa kĩfini.

18

Jesús achinifo

(Mt. 26.47-56; Mr. 14.43-50; Lc. 22.47-53)

1 Nãskata mã Apa kĩfikĩ nishpata aõxõ tãpimisfo fe fakishi Jesús kani, xexa Cedrón pishta poke-faini. Nãno ifi fanafãfe ãfe anefo olivos ini. Olivos mẽra ikitoshinifo. 2 Judaspa ato Jesús achimani kakĩ tãpini faki Jesús kaamãki, Olivos anomãi aõxõ tãpimisfo Jesús ato iyomiskẽ. 3 Nãnori Judaspa sorarofõ yoni Jesús achinõfo. Nã ato Nios kĩfixomis xanĩfofõfãfe askatari fariseofãferi Nios kĩfiti pex-efã kexemisfo nĩchinifo Judas fe fõtanõfo. Chi-ifofo kenofõfo koshatifofo ashifofo fonifo. 4 Mã achifõfãifõno Jesús ato tãpini. Mã nokoafõno ato yõkani: “¿Mã tsoa fenaimẽ?” ato faito, 5 “Nõ Jesús Nazarete anoa nõ fenai,” faifãfe, ato kemani: “Ëkã, nono ã ika,” ato fani. Ato askafaino nã Jesús ato achimani Judasri nãno ato fe ini. 6 “Ë nono ikaki,” Jesús ato faino, chetekiri ifiakekafãpakei fetsenifo. 7 Nãskaxõ Jesús anã ato yõkani: “¿Tsoa mã fenaimẽ?” Jesús ato faino, “Nõ Jesús Nazarete anoa nõ fenai,” faifãfe 8 anã ato yoini: “Ëkã nã mã

ea fenai ě mato faa,” ato fani. Nāskaxō ato yoini: “Mā ea fenamākai na eōxō tāpimisfo ato nīchikāfe fotanōfo,” ato fani.

⁹ Nā Jesúsnoa yoikī kirika keneyonifo iskafakī: “A mā ea minia fato fisti fenoima,” ixō kirika kenenifo. Nāskaxō nā kirika kenenifo keskarakōi Jesús Apa Nios kīfini. ¹⁰ Nāskaino Pedro āfe keno tsekani, āfe keno tsiostamexō. Mā āfe keno fixō nā ato Nios kīfixomisto āfe xanīfāfe yonomati paxteni. Nā xanīfāfe āfe yonomati āfe ane Malco ini. Nā Pedro paxteni. ¹¹ Pedro askafaito ōikī, “Mī keno fafe,” Jesús Pedro fani. “¿Mī shināimamē? Ĕfe Epa ea afara kechoki inā ě ayai,” ayatiki keparanākī Jesús Pedro yoini. “Nā ěfe Epa Niospa apaiyai keskara ě akikai,” ixō Jesús yoipaini.

Jesús Anás ano iyonifo

(Mt. 26.57-58; Mr. 14.53-54; Lc. 22.54)

¹² Sorarofāfe āfe xanīfo feta a Nios kīfiti pexefā kexemisfo feta osinākaxō Jesús achikaxō metexkere anifo. ¹³ Metexkere akaxō Anás pexe ano iyonifo. Nā Anás Caifás āfe rayos ini. Nā Caifás Nios ato kīfixomis xanīfokōi ini. ¹⁴ Nā Caifás āfe kaifo israelifo yoini: “Feronāfake fisti yorafoōnoax naa, sharaki,” ato fani.

“Ĕ Jesús ōimisma,” Pedro ini

(Mt. 26.69-70; Mr. 14.66-68; Lc. 22.55-57)

¹⁵ Askata Jesús iyoaifono Pedro fe a Jesúsxō tāpimis fetsa ato acho fonifo. Mā pexe ano nokoano nā Jesúsxō tāpimis fetsa xanīfāfe mā ōimis ini. Nā Jesús fe ikikaini. ¹⁶ Akka Pedro kāiti ano nēteni, ikinima. Akka nā Jesúsxō tāpimis fetsa ikikaini. Nāato xomaya a kāiti kexea yoini Pedrori

ikimanõ. ¹⁷ Mā Pedro ikiano nā kāiti kexemis xomayato yōkani: “¿Mīri mī Jesús āfe inamē?” faito, “Maa, ēkai Jesús āfe inama,” Pedro fani.

¹⁸ Mā fakishano matsinākōikanax chii ketefaax keyokōi chii yoonifo matsi meymaxikakī. Nā xanīfofo āto yonoxomisfo fe a Nios kīfiti pexefā kexemisfāfe chii ketefaax yoonifo. Pedrori ato fe yooni.

Judeofāfe xanīfāfe Jesús yōkani

(Mt. 26.59-66; Mr. 14.55-64; Lc. 22.66-71)

¹⁹ Nāskata ato Nios kīfixomisfāfe āto xanīfāfe Jesús yōkani iskafakī: “¿Fatofomē a mīōxō tāpimisfo? ¿Afaa mī ato yoimismē?” faito, ²⁰ “Ēkai one ato yoiamā. Keyokōichi ea nikanōfo ē ato yoimis. Ē māto ichanāti peXe mēranoa yafi a māto Nios kīfiti pexefā mēranoa ē ato yoimis. Ēkai ēfe meka ē onemisma. ²¹ ¿Afeskakī mī ea yōkaimē? Ea yōkakima a ea nikamisfo yōkafe. A ē ato yoimis tāpiafoki,” Jesús faito, ²² a Nios kīfiti pexefā kexemisto afe ketaxamei niato fepasyanā yoini: “¿Afeskakī nōko xanīfo mī anori yoimē?” faito, ²³ Jesús anā kemani: “Afaa chaka ē yoimē ea yoife. Akka ē afaa chaka yoiamā ¿afeskakī mī ea fepasimē?” Jesús fani.

²⁴ Askafaito nikakī Anás āfe rayos Caifás ano Jesús nīchini metexkere axō. Nā Caifás ato Nios kīfixomis āto xanīfokōi ini.

Pedro anā ato yoini: “Ēkai Jesús ōimisma,” ato fani

(Mt. 26.71-75; Mr. 14.69-72; Lc. 22.58-62)

²⁵ Nānoax Pedro ato fe chīi yooni. ato fe yooaito afianā Pedro yōkanifo: “Mīfi nā Jesús āfe ina fet-sakī,” faifāfe, “Maa, ēkai nā Jesús āfe inama,” ato fani.

²⁶ Ato askafaino nã paxteato afe yõra yõkani: “¿Ë mia õiamamẽ? Akka ã mia õia. Nã fanafo mapoa mẽranoa Jesús yafi ã mia õia,” nã paxteato afe yõra Pedro fani. ²⁷ “Maa. Ëkaima,” Pedro faino takara keoinãkafani.

Pilato ano Jesús iyonifo

(Mt. 27.1-2, 11-14; Mr. 15.1-5; Lc. 23.1-5)

²⁸ Nãskano fakishpari judeofãfe Caifás ãfe pexe anoxõ Pilato xanifo ano Jesús iyonifo. Nã judeofo Pilato ãfe pexe mẽra ikitiroma inifo. Pilatokairoko judeokẽ a mẽra ikipanãfãfe. “Nõ Pilato ãfe pexe mẽra ikiax nõ chakanatiro,” ikanax, ikikaspanifo. Nã judeofo a judeofoma fe rafexõ Pascua fistatĩa pitirofoma ipaonifo. Nãskara feyafamisfo ipaonifo. Nãskakẽ Pilato ãfe pexe mẽra ikikaspanifo. ²⁹ Nãskaifono pexe kachiori kãinãkafã Pilato ato yõkani: “¿Afaa chakafakẽ na feronãfake mã ea ano efeamẽ?” ato faito, ³⁰ “Afaa chakafayamakekai nõ mikiki efekeranama,” faifãfe, ³¹ ato Pilato yoini: “Iyotakãfe. Mãto xinifãfe yoini keskafakĩ omiskõimaxikakĩ. Nã keskara mã feyafamiski. Afaa chakafamãki mã akãfe,” ato Pilato faito, judeofãfe kemanifo: “Akka mãto xanifofofãfe yoinifo nõ tsoa retekĩ mastatiroma,” fanifo.

³² Jesús aõxõ tãpimisfo taeyoi yoini keskafakĩ nãskakõi fanifo ifi cruz ikaki mastakakĩ.

³³ Nãskano Pilato ãfe pexe mẽra Jesús ikimani yõkaxiki. Mã ikimaxõ yõkani: “¿Mĩmẽ judeofãfe ãto xanifo?” Pilato faito, ³⁴ Jesús kemani: “¿Mĩ ea shinãimẽ ã judeofãfe xanifo mia yoiãforaka?” Jesús faito, ³⁵ anã Pilato kemani: “¿Mĩ shinãmẽ ã judeo? Ë judeoma. Akka mĩ kaifo feta mĩ

xanĩfofofãfe mia ekeki efeafõ ã mia omiskõĩmanõ. ¿Mĩ afaa chakafakẽ mia ekeki efeafomẽ? Ea yoife,” Pilato faito, ³⁶ Jesús kemani: “Ëkai na mai anoax xanĩfoma. Ë nonoax xanĩfokẽ a ea Ifofaafãfe yorafa setekeranafo ea achiyamanõfo. Akka ãkai na yorafãfe ãto mai anoax ã ãto xanĩfoma,” Jesús faito, ³⁷ Pilato kemani: “¿Akka mĩ xanĩfo rakikĩa?” faito, “Nã ea mĩa yoiai keskarakĩa ã xanĩfo. Nãskakẽ ã yõra fakekõĩ kãini meka chanĩmakõĩ ato yoixikĩ. A meka chanĩmakõĩ fisti nikapaiyaiãfe nããfe ea nikamisfo,” Jesús faito, ³⁸ “¿Afaamẽ a meka chanĩmakõĩ?” Pilato fani.

Pilato ato yoini Jesús retenõfo

(Mt. 27.15-31; Mr. 15.6-20; Lc. 23.13-25)

Askafata Pilato pexe kachiori kãinãkafani. Kãinãkafaxõ judeofo yoini: “Ë na feronãfake yõkakĩ ãkai aõnoa afaa chaka nikama,” ato fani. ³⁹ “Iskaratĩa na Pascua fistatĩa ã yora fisti karaxa mẽranao ã mato kãimaxomis, nãskaramãĩ mãto feyafamiskẽ. ¿Akka ã mãto xanĩfo ã mato kãimaxotiomẽ katanõ?” ato faino, ⁴⁰ fãsikõĩ mekainĩfofãnifo: “¿Jesús tsekakima! ¿Barrabás noko kãimaxõfel” fanifo. Nã Barrabás yometso ini.

19

¹ Nãskaxõ Pilato ato yoiano Jesús iyonifo so-rarofãfe koshatinĩ koshaxikakĩ. ² Askano so-rarofãfe moxa chainipafo maiti fakaxõ maimanifo. Akiki kaxepaiyanã nãskatari tari õshi nana safemanifo. ³ Nãskax akiki kaxepai kakĩ iskafanifo: “Aicho. Mĩfi judeofãfe ãto xanĩfoki. Mĩ mẽxotaima nipanakaki,” iyanã fepasketsanifo.

4-5 Askafaifono Pilato Jesús pexe xaki mēranoa kāimani ōinōfo. Jesús tari ōshi nana safeax kāikaini, moxari maiti fakaxō maimanafono. Nāskaxō Pilato ato yoini: “Ōikapo na feronāfakekai afaa chakafaa ē nikama ē chakafapanā,” ato fani. ⁶ Ato askafaito judeofāfe āto xanīfoyxō a Nios kīfiti pexefā kexemisfāferi fāsikōi mekafanifo: “¡Mastafe! ¡Mastafe!” faifono, “Mā iyokaxō mastatakāfe. Ēkai aōnoa afaa chaka ē nikama ē chakafapanā,” Pilato ato fani. ⁷ Ato askafaino judeofāfe kemanifo: “Akka na feronāfāke noko yoimis: ‘Ēfi Niospa fakeki,’ noko famis. Akka nōko xinifāfe yoini: ‘Ē Niospa fakera ikai natiro,’ fanifo. Nāskakē na feronāfake nayamaima,” fanifo.

⁸ Askafaifāfe nikai Pilato ratekōini. ⁹ Nāskaxō āfe pexe mēra Jesús anā iyoni. Iyoxō yōkani: “¿Fanīamē mī?” faino, Jesús kemanima. ¹⁰ Pilato anā Jesús yoini: “¿Ea mīa kemaimamē? ¿Ea mīa tāpiamamē ē xanīfo? Ē mia kāimatiro, askayamai ē mia ato mastamatiro,” Pilato askafaino, ¹¹ Jesús kemani: “Niospa mia xanīfo imayamainokai mī ea afeska fakeranama. Akka mī ea ato mastamanax mī chaka iki. Akka nā ea mikiki efea nā chakafinakōi iki mī ea reteano,” Jesús fani.

¹² Askafaito nikakī Pilato Jesús kāimapaini. Kāimapaiyaino nikakani fāsikōi judeofo mekainīfofākata yoinifo: “Fatora fetsa xanīfo ipaikī nāato César xanīfo chakafai. Akka na Jesús xanīfo ipai. Akka mī Jesús kāimaxō mī anā nōko xanīfo César tanaima,” fanifo.

¹³ Askafaifāfe nikakī afianā Pilato Jesús pexe mēranoa kāimani. Nāskax Pilato a xanīfāfe tsaoti ano tsaoni. Nā xanīfāfe tsaoti pexe emāiti

ini tokiri sapa kamaki âfe tsaotiki tsãoni. Nã tokiri hebreofãfe âto mekapa anemisfo Gabata fakakĩ. ¹⁴ Mã Pascua fista ikaino xini keya Pilato tsoaxõ ato yoini mã Jesús kãimaxõ, “Nakĩa õikapo mãto xanĩfo,” ato fani. ¹⁵ Ato askafaino fãsikõi mekainĩfofãkata yoinifo: “¡Iyoxõ mastatãfe ifi cruz ikikakĩnoax nanõ!” faifono, “¿Mã õipaimẽ ã mãto xanĩfo mastanõ?” ato Pilato faino, “César fisti nõko xanĩfokõi. Anã ano nõko xanĩfo fetsama,” judeofãfe âto xanĩfofãfe Pilato fanifo.

¹⁶ Askafaifono Pilato ato Jesús nĩchixonĩ iyoxõ mastatanõfo.

Jesús ifi cruz ikaki mastanifo

(Mt. 27.32-44; Mr. 15.21-32; Lc. 23.26-43)

¹⁷ Nãskano sorarofãfe Jesús iyonifo. Iyoaifono ãakõĩ ifi cruz ika Jesús iyaxõ foni. A mastaifo ano nokoni. A mastaifo nãno ãfe ane ini: “Mapo Xao,” fanifo anakakĩ. Judeofãfe mekapa Gólgotara fapaonifo. ¹⁸ Nãskata Jesús yafi yometso raferi mastanifo. Takai rafe yometso rafe mastanifo. Akka Jesús nẽxpakĩa anifo.

¹⁹ Mã Jesús mastakaxõ ãfe mapo mãnãori kenõfo Pilato ato yoini. “Jesús Nazarete anoa judeofãfe âto xanĩfokõĩ,” fanifo kene kakĩ. ²⁰ Jerusalén ano yora fetsafo osiafo ichapakõifo inifo. Nãnoxõ Jesús Jerusalén chaimashtaxõ mastafa ini. Nãnoxõ Pilato meka fetsa fetsatapafo ato kenemani Jesús judeofãfe âto xanĩfokẽ tãpinõfo. Judeofãfe âto meka keneta, griegofãfe âto meka keneta, romanõfãfe âto mekari kenenifo. ²¹ Nãskax judeofãfe âto xanĩfofo Pilato ano fonifo yoi fokani: “Jesús nõko xanĩfoma. Nãskakẽ ato kenemayamafe iskafakĩ:

‘Jesús judeofāfe āto xanĩfokōi,’ askara ato kenemayamafe. Akka, ‘Jesús yoimis, “Ĕ judeofāfe xanĩfora” imis.’ Nānori mĩ ato kenematiro,” faifāfe, ²² Pilato ato yoini: “Nā ě ato kenemana keskara ě ato kenemani. Ĕkai anā afaa fetsa ě ato kenematiroma,” Pilato ato fani.

²³ Sorarofāfe Jesús mastafono āfe rapati fīanifo. Nāskax paxkanāi fetsenifo Jesús āfe rapati soraro cuatropa Jesús rapati finifo. Nāskata nā āfe tari chainipari fīanifo. ²⁴ Nāskax yoinānifo: “Nā tari nō faxteimākai fetsakanāyamaxikĩ. Nāskara memashara nō finō,” inifo. Nāskax āfe tariya kaxenifo āto kaxetiya. “Na finōmanato Jesús āfe tari fii kiki,” inifo. Nānori Niospa meka yoikakĩ keneyonifo. A Jesús inōpokoai yoikakĩ keneyonifo. Iskafakĩ kenenifo: “Ĕfe rapati paxkanāxikani. Askata ěfe tari chainipayari āto kaxetiya kaxexikani. Nā finōmanato ěfe tari fixii,” ixō kirika keneyonifo. Nāskakē sorarofo Jesús āfe tariya kaxenifo.

²⁵ Nāskano nā Jesús mastafono ano chaimashta Jesús āfe afa nini. Āfe afa fetsari nāno nini. Nā Cleofaspa āfe āfinō María Magdalenanō nāno chaimashta ninifo. ²⁶ Nā aōxō tāpimis fisti āfe yamakōi a Jesús noikōipaoni afa fe ketaxamei nikē Jesús ōini. Nāskaxō Jesús afa yoini: “Na feronāfakefi mĩ fakeki,” fani. ²⁷ Nāskata nā feronāfakeri Jesús yoini: “Nafi mĩ efaki,” fani. Askafaino nikakĩ María āfe pexe ano iyoni kexesharaxikĩ.

Jesús nani

(Mt. 27.45-56; Mr. 15.33-41; Lc. 23.44-49)

28 Jesúsnoa yoikĩ Niospa meka keneyonifo keskakõini. Mã Jesús täpoxõ yoini: “Ë nõamãiki,” ato fani. 29 Ato askafaino fimi ene kacha ocha mefetiki tsaano nã mĩxa fikaxõ fimi ene kachaki momokaxõ Jesús ayamapainifo tafa xatekĩ rõtati fakaxõ. 30 Mã fimi kacha ayaxõ Jesús yoini: “Keyokõi ãfe Ëpa ea yoia keskara mẽ aka,” ato fani. Ato yoita nãskax nai tepopakekafãni.

Soraronõ Jesús ãfe pishi nãmã chachini

31 Mã Pascua fista ikaino Jesús yafi yometso rafe ifi cruz ikakĩnoa judeofãfe õikaspanifo. Nã fistaĩa ato pena tenetiĩa ini. Nãskax mã fista ikaino Pilato ano fonifo yoi fokani iskafakakĩ: “Mã penama nõko fista iki kiki. Nã Jesús yafi nã yometso rafe ãto fitax xao tẽkerisa fanõfo koshi nanõfo ato yoife. Mã penama nõko fista iki kiki nã ato mastafa ano anã inõfoma nõko fistaĩa,” judeofãfe ãto xanĩfofõfãfe Pilato fanifo. 32 Nãskafaifono Pilato sorarofõ yoini iskafakĩ: “Ãto fitax xao ato tẽkerisa fakãfe koshi nanõfo.” Ato askafaino fokaxõ õiafo yometso rafe naafoma inifo. Naafomano ãto fitax xao ato tãkenifo nanõfo. 33 Akka Jesúski fokaxõ õiafo mã Jesús naa õinifo. Nãskakẽ tsõa ãfe fitax xao tẽkenima. 34 Akka soraro fistichi ãfe ãshi ãfe pishi nãmã chachiaino ãfe imi fakaya siini.

35 Ëkĩa Juan na kirika ã keneai nã ã õimis keskara ã mato yoi na kirika kenekĩ mã chanĩmara fanõ. Ëfi chanĩmakõi mato yoi. 36 Niospa meka yoimisto a Jesús inõpokoai yoikĩ kirika keneni iskafakĩ: “Ãfe xaokai tsõa tẽkexikanima,” ixõ kirika keneyonifo. 37 Askatari, “A ãfe pishi chachiaifono õixinõfo,” a Niospa meka yoimisto nãnorikõi kirika keneyoni.

*Jesús makex kini mēra maifanifo**(Mt. 27.57-61; Mr. 15.42-47; Lc. 23.50-56)*

³⁸ Nāskano José Arimatea ano ikax Pilato ano kani. Kaxō Jesús āfe yora yōkani: “Ifi cruz ikakīnoa ē Jesús fotomapai maifaxikī,” José faito, “Atāfe,” Pilato fani. Nā José Jesús Ifofamis ini. Jesús Ifofaifaxō ato yoinima. Judeofāfe āto xanīfokoki mesekī ato yoinima. ³⁹ Nicodemo feta José Jesús ifi cruz ikakīnoa fotomanifo maifaxikakī. Nā Nicodemo Jesúski fakishi kaxō yōkayoni. Nāato āfe pirofomā shara treinta kilo feni Jesús āfe yora raish axiki fena pisiyamanō. Fetsa āfe ane mīrra ini. Fētsa aneri áloes ini. Nā rafe osia ini. ⁴⁰ Askano José feta Nicodemo sama oxo shara pirofomā raish axō aō rakonifo. Judeofāfe āto kaifo maifakī askara feyafamisfo ini. ⁴¹ Nā ifi shara mīshti mapoa anoxō chaimashtaxō Jesús mastanifo. Nānori mafa kini fena, tsoa a mēra maiyomisma ini. ⁴² Mā judeofāfe āto pena teneti chaimashta ikaino mā xini kaino Jesús maifanifo. Nāskakē nā mafa kini chaimashta nā mēra Jesús maifanifo.

20*Jesús otoni**(Mt. 28.1-10; Mr. 16.1-8; Lc. 24.1-12)*

¹ Nāskano nomīkonō fakishparikōi María Magdalena kani nā Jesús mafa kini mēra maia ano. Kaxō ōia mā mafa kini fepekemea ini. Nā tokirinīfā aō fepoitafo mā fepekemea ini. ² María ōifaini ichoni Pedro yafi nā Jesúsxō tāpimis fetsa nā Jesús āfe yamakōi chanifaikai kani. Ato yoini: “Nōko Ifāfe āfe yora kini mēranoa mā fakira oneafo nōkai tāpiama,” ato fani.

³ Ato askafaino Pedro fe a Jesúsxõ tãpimis fetsa õifokani ichonifo. Mafa kini ano õifokani. ⁴ Nã fẽtsa Pedro xonõfaini rekẽ nokoikakĩ. Akka Pedro chipo nokotoshini. ⁵ Rekẽ nokotoshixõ a Jesús maia ano mafa kini mẽra tẽkepakekafã naisni. Ari naiskĩ õia a aõ rakoitafo sama mania ini. ⁶ Nãskata Pedrori chipo nokotoshini. Nokoax mafa kini mẽra ikikaini. Ikikaixõ õia aõ rakoitafo mania ini. ⁷ A aõ mapoki marakoitafo nã fosoita ariri ãfe sama mania ini chaimashta. ⁸ Askaino a Pedro fe kaari kini mẽra ikikaini. Ikikaikĩ õia ano Jesúsma ini. Nãskaxõ chanĩmara fani. ⁹ A Jesús otoxiai Niospa meka yoikĩ kirika kenenifo tsõa tãpiyonima. ¹⁰ Nãskata mã õita ãto pexe ano fenifo.

*Jesús María Magdalenaki nokoni
(Mr. 16.9-11)*

¹¹ Mã foaifono María kanima. Mafa kini kachiori niax María oiani. Oiayanã nãatoro kini tẽkepakekafã naiski õini. ¹² Niospa ãfe ãjiri rafe rapati oxokõi safekanax tsaoafo ini Jesús rakaita ano. Nã fosoita ariri fetsa tsaoa, fetsari ãfe tae ikita ariri tsaoa ini. ¹³ Nãskaxõ Niospa ãfe ãjiri rafeta yoini: “¿Afeskai mĩ oiaimẽ?” faifono, “Èfe Ifãfe ãfe yora mã fakira oneafo ã tãpiama,” ato fani.

¹⁴ Nãskata María texkeakekafã õia Jesús a kachiori niano tãpinima. ¹⁵ Jesús María yõkani: “Kẽromã, ¿afeskai mĩ oiaimẽ? ¿Mĩ tsoa fenaimẽ?” faito, María shinãni: “Nã fanafõ kexemisra,” fani. Nãskaxõ María yõkani: “Mĩ èfe Ifãfe ãfe yora fanĩ mĩ faamẽ ea yoife, ã afianã nono maifanõ,” faito, ¹⁶ Jesús: “María,” faito, foisnĩfofã María õia nã Jesús ãfe fesokõi ini. Nãskaxõ María judeo mekapã: “Rabonĩ,” fani. Rabonĩ fakĩ, “Noko tãpimamisto,”

fani. ¹⁷ Askafaino, “Ea ramāyamafe. Ēfe Epa ari ě kaamaki. Akka ea ramākima efe yorafo ea ato yoixotāfe, mā ěfe Epa Nios ari ě kaikai. Nā ěfe Epari mātō Epaki. Nā ěfe Niosri mātō Nioski, ato fatāfe,” fani. ¹⁸ Askafaino María kaxō aōxō tāpimisfoki nokoxō ato yoini: “Mē nōko Ifo ě ōiaki,” ato fani. Nā āfe Ifāfe yoia keskara ato yoini.

Jesús aōxō tāpimisfoki nokoni

(Mt. 28.16-20; Mr. 16.14-18; Lc. 24.36-49)

¹⁹ Nāskata nomīkonō mā xini kaino a aōxō tāpimisfāfe judeofoki mesekakī āto pexe fepoti feponifo ichanākakī. Mā ichanāifono āto nēxpakīa Jesús nirisatani. Ato yoini: “Mātō ōiti fepeakax inimasharakāfe,” ato fani. ²⁰ Ato askafata a mifiki rāfomā mastaitafo āfe tsefe ato ispani. A āfe pishiki āshi chachitafori ato ispani. Ato ispaito ōikani āto Ifoki fāsi inimakōinifo.

²¹ Afianā Jesús ato yoini: “Mātō ōiti fepeakax inimasharakāfe. Nā ěfe Ēpa ea nīchini keskafakīri iskaratīa ě matori nīchikai,” ato fani. ²² Nāskaxō ato yoini: “Na ěfe Epa āfe Yōshi Shara fikāfe,” ixō atoki axfainākafa ato xoō ani. ²³ “Fatora fetsa mā āto chaka soaxonaino Niospari āto chaka soaxoxii. Mā ato chaka soaxoyamaino atoō chaka nepakenaka,” ixō Jesús ato yoiax nāskax ato makinoax kani.

²⁴ Ato Jesús yoiainkai Tomás ato fe ano inima. Nā Tomásri Jesúsxō tāpimis ini. Āfe ane fetsa “Rafe Kāini” fapaonifo. ²⁵ Tomás atoki oaino yoinifo: “Mā nōko Ifo nokoki oaito nō ōia,” faifāfe Tomás ato yoini: “Ē āfe mifi natakinōa a rāfo tsefefe ě meikerana a āfe pishi tseferi ě meikerana nāskaxō ě chanīmara fakerana. Akka ě āfe tsefefe

ramākayamaxō a mā Jesús ōia ē chanīmara faima,”
ato Tomás fani.

Jesús aōxō tāpimisfoki anā nokorisatani

²⁶ Nāskata ocho nia oxata Jesús aōxō tāpimisfo
anā kene mēranoax ichanāfono Tomásri nāno ato
fe ini. Pexe fepoti fepokōiafono Jesús atoki noko-
risatani. Anā ato yoini: “Māto ōiti fepeakax in-
imasharakāfe,” ato fani. ²⁷ Nāskaxō Jesús Tomás
yoini: “Ea mī mīfi ramāfe ēfe mifi nataki. Ēfe pishi
nāmāri ea ramāfe. Anā ea chanīmara fakima, ea
chanīmara fafe,” Jesús faito, ²⁸ Tomás kemakī: “Mīfi
ēfe Ifoki. Mīfi ēfe Nioski,” faito, ²⁹ “Ea mīa ōikī
mī ea chanīmara fai,” fani. “Akka ea ōiyamafikakī
ea chanīmara faifofi Epa Niospa ato shara faxii.
Inimakōixikani,” Jesús fani.

Juan kirika keneni tāpinōfo

³⁰ Akka afama mīshti tsōa atiroma keskakakī
Jesús aōxō tāpimisfo ato ōimamis. Afara fetsafori
Jesús aka ē afo mato kenexonama. ³¹ Epa Niospa
Jesús nīchini nōko Ifo inō. Nāfi Niospa Fakeki.
Ē mato Jesúsnoa kenexoni mā chanīmara fanō.
Chanīmara faax mā aōnoax Nios fe nīpaxanō.

21

Īamāfā kesemē Jesús aōxō tāpimisfoki nokoni

¹ Nāskano Jesús anā aōxō tāpimisfoki atoki nokoni.
Īamāfā Tiberias kesemē nāno atoki nokoni. Ē mato
yoinō afeskax Jesús onimāki.

² Pedro fe Tomás (nā Tomás “Rafe Naneni” fa-
paonifo), Natanael Caná anoa ini Galilea mai
anoa, Zebedeo fake raferi ini, Jesús fe rafemis
raferi ato fe ichanānifo. ³ Nāskaxō Pedro ato yoini:

“Ē rinipa fii kaikai,” Pedro ato faino, “Nōri mefe kai,” fanifo. Nāskax fonifo kanōanāfānē nane-fainifo. Fōkata rini potenifo nā rini fakishchāi potefikaxokai tsōa foe finifoma.

⁴ Mā penaino Jesús ĩamāfā kesemē atoki noko-risatani. ĩamāfā kesemēxō aōxō tāpimisfāfe tsōa Jesús tāpinifoma. ⁵ “¿Ēfe fakefāfe, mā foe fiamamē?” ato faino, “Nō fīama,” fanifo. ⁶ Askafaifono ato yoini: “Māto pōya kayakai aōri māto rini potekāfe. Askafaxō mā fitiroki,” ato faino nikakakī nā ato yoiai keskafanifo āto rini potekakī āto pōya kayakai aōri. Nāskaxō meafō mā foe kayakōi fia menifo. Ato kanōanāfā mēra nanepaikakī ranānifo. ⁷ Nā Jesúsxō tāpimis fētsa nā Jesús āfe yamakōi ipaonito Pedro yoini iskafakī: “¡Nāfi nōko Ifoki!” fani. Askafaito nikai Pedro koshikōi āfe rapati safeni nāskax kanōanāfā makinoax ĩamāfānaki pakekaini āfe Ifoki nokorisapai. ⁸ Nāskaito ōikani atiri kanōanāfānē acho fonifo. Āto rini foe fospikōiano ninifonifo ĩamāfā kesemē chaimashta nokoxikakī.

⁹ Mā ĩamāfā kesemē nokokaxō ōiafo chii mǎnǎ mǎnǎ ikaito ōinifo. Foe yafi pǎa xoimea chii ketokonō raka ōinifo. ¹⁰ Askata Jesús ato yoini: “A mā rama foe fia niri fekāfe,” ato fani.

¹¹ Akka Pedro kanōanāfāoxō rini ninifoni ĩamāfā kesemē rataxiki. Mā rini fixō ōia foe rini mēra fospikōia ōini. Ciento cincuenta y tres ini. Akka fōe rini faxtenima. ¹² Askaifono Jesús ato yoini: “Piyoi fekāfe,” ato fani. Akka tsōa yōkanima: “¿Mī tsoamē?” tsōa fanima māmāi tāpikaxō āto Ifomāiyakē. ¹³ Nāskaxō Jesús ato pimakī ato pǎa yafi foe ato ināni.

14 Mā reteafono otoitaxakī aōxō tāpimisfoki nokoni. Tres ves ini atoki oi.

Jesús Pedro yoini

15 Mā pixō Jesús Simón Pedro yoini: “Simón mīfi Juan fakeki. ¿Na fetsa finōmainīfofā mī ea noimē?” faito, “Èje Ifo. Mā mī tāpiaki ē mia noiaito,” Pedro faito, Jesús yoini: “A ea noisharaxō a ea rama Ifofaifori ato kexesharafe ea Ifosharafanōfo. A oveja kexemisto āfe oveja fake kexemis keskafafe ato kexekī,” fani.

16 Anā Jesús Pedro yōkani: “Simón, mīfi Juan fakeki. ¿Chanīmamē mī ea noimē?” faito, “Èje, Ifo. Mā mī tāpia ē mia noiaito” Pedro faito, anā Jesús yoini: “A ea noisharaxō ea Ifofamisfo ato kexesharafe ea Ifosharafanōfo. A oveja kexemisto āfe oveja kexemis keskafafe ato kexekī,” fani.

17 Nāskaxō anā Jesús yōkani: “Simón, mīfi Juan fakeki. ¿Ea mīa noikōimē?” ixō Jesús yōkari faino Pedro anā tooxinima. Nāskaxō anā Pedro kemani: “Ifo, mīfi afama mīshti tāpiaki. Mā mī tāpia ē mia noiaito,” fani. Askafaino anā Jesús yoini: “A ea Ifofamisfo ato kexesharafe ea Ifofasharanōfo.

18 È mia yoikōinō. Mī naetapakī nā mī apaiyai keskara mī fapaoni. Askatari nā mī kapaiyai ari mī kapaoni. Akka mā mī anifoax mī takairafe mēshax kaxii mia iyoaifono a mī kapaiyamai ari mia iyoxikani,” Jesús fani. 19 Askafakī Jesús Pedro tāpimani afeskax naximākai. Pedro Jesúsnoax naxiaino yorafāfe mā tāpikaxō, “Nios finakōia,” faxikani. Nāskano Jesús Pedro yoini: “Ea Ifosharafafe,” fani.

²⁰ Askafaino Pedro texkeakekafã Juan fichini acho oaino. (Nã Juanri Jesúsxõ täpimis ini, Juan Jesús noikõia ini. Jesús reteyoafomano aõxõ täpimisfo feta fakishi piyoni. Akka Juan afe ketaxamei tsoxõ Jesús yõkani iskafakĩ: “¿Ifo, tsõakai mia ato achimaximẽ?” fani Jesús reteyoafomano afeta pikĩ.) ²¹ Nãskaxõ Pedro nã Juan fichixõ Jesús yõkani: “¿Ifo, afeskax na Juan naximẽ?” fani.

²² Askafaino Jesús kemani: “A ã nimapaikĩ ã nimaino niyoxii nã ã anã oaitãa. Akka mĩkai aõnoa shinãchakatiroma. Askatamaroko ea Ifofatitaifafe. Eõnoa fisti shinãfafaife,” fani. ²³ Nãskax Jesúsxõ täpimisfo ãa ranã yoinãnifo: “Juankai nanakama,” fanifo. Askafafiaifono Jesúska Pedro anori yoinima. Akka iskafakĩ yoini: “A ã nimapaikĩ ã nimaino niyoxii nã ã anã oaitãa. Akka mĩkai Juanõnoa mĩ shinãchakatiroma,” fani. Nãnori fisti Jesús Pedro yoini.

²⁴ Ëkã Juan ã kirika kenexõ ã mato yoi. Ëri Jesúsxõ täpimis. Ea Jesús noikõia. Jesús afarafo faito ã õimis. Nãfo ã mato kenexoni. Jesús afarafo akaito mẽ õimis. Nãskakẽ mã ãfe meka chanĩmara fatiro. Ë mato yoiaito mã Jesús chanĩmara fatiro. ²⁵ Jesús afama mĩshti fani afo yoikĩ nõ kirika kenekĩ mitotiroma. Ëkã Juan ã mato kirika kenexoni. Nã tii.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

6c7b7ce2-9d87-5405-91e6-71ce1387adcc